

# Cu'aezixrjil Sul

Yirsaexllixl Su Ca Mel Aezixr Goxrjia Goxr Sol

**1** <sup>1</sup> Yirsaexllixl su ca mel hherdder Yargel ddei ssor mel cirhhexr-cirhhexr Yargel dax cirgo a Aezixr goxrjia gga ssi ci a. Yaa ddei mi mel mel dder: <sup>2</sup> Liurbil, Simixl, Lixlweixl, Yoxrdaxl, <sup>3</sup> Yirsarjia, Xiboxrluixr, Bixlyarmir, <sup>4</sup> Daxl, Naxrfuxrtaxl, Jiadaexr, Yalsaexl nga a. <sup>5</sup> Yargel ddei ssormine nei lilbol-lilmo maelmaerjjia a mel sirceimo zza. Yargel ddei ssor Yuesaexl nael, neixrneixr-sisi dder Aezixr goxrjia gga hher dae ho a. <sup>6</sup> Giedae, Yuesaexl nei yar ddei arzzi-nimar, halae yar dax hal zeix ca mellei si jjia a. <sup>7</sup> Yaa giedae ca hherdder Yirsaexllixl su ca mel nael ho bei ho miur dax, ho bei ho oxnix, yarzi sexr yarzi ddo, Aezixr goxrjia gga zzarvul-zzarmae lei hher dae.

<sup>8</sup> Giedae Aezixr goxrjia gga mel zzirmar ar ddei lael box a. Zzirmar eil ddei mel Yuesaexl leil nr saexl. <sup>9</sup> Yar Aezixr goxrjia su ca mel dax bbeix: “Nia ardae i! Yirsaexllixl su ca mel mel bir niul leil lei miur leixl, bir niul leil lei ddo leixl. <sup>10</sup> Lei! Niul baxlfaxr ar ddei xiar nia. Nr nga a, yaa zeixleixr ca miur dax a, arddolcar zaxlddaexr a, yaa niul leil vuxryixr su ca mel dax cir piar a bei a, niul leil ddaexr leilei, niul dax eilmaex lei nr hher, ssi du si leilei.” <sup>11</sup> Yel Aezixr su ca mel dder vaervaerpor mel leil yaa leil guaxr dae lol, ddoddo-nrddo yaa leil miar lirlirmo hal mel bei lol a yaa leil ke. Yaa Aezixr goxrjia ddei zzirmar hherdder Faxrlar te leil azo lerler jiggyie zzi nr zzir zi gger, hherdder Birdo zzi nei Laxrsae zzi. <sup>12</sup> Nael Aezixr su ca mel yaa leil nr nor a ci a giel, yaa ca mel nr nor a miur dax a, ho bei ho zzarvul-zzarmae lei hher dae a. Yel Aezixr su ca mel dder Yirsaexllixl su ca mel leil gexr a, <sup>13</sup> ddoddo-nrddo yaa leil yarzi sulku miar mel bei lol. <sup>14</sup> Yaa leil nilnaexl giex, zua cu, mi gga cirza-hanga miar bei solsol hal mel bei lol a, yaa leil goxr sol teixl lei nr xie lol. Aezixr su ca mel yaa leil bixr gex dae a miar lixrlixr mel bei lol.

<sup>15</sup> Xiboxrlaexr su<sup>a</sup> aniux ggux gger su ssormaer nnel zza. Cir ddei leil a nael, Sifurla mi; cir ddei leil a nael, Pur'a mi. Aezixr goxrjia ddei zzirmar te yaa leil miardal a bbeix: <sup>16</sup> “Nia Xiboxrlaexr su ssormaer mel leil aniux ggux gger car, yaa caporsor xiu teixl lei arddeirnga a nael, bei zil gger nia; ssormaerssor xiu teixl lei arddeirnga a nael, gol dae lol,” eine bbeix a. <sup>17</sup> Nael aniux ggux gger su eil nnel mel Arbosobo leil gexr, yel zzirmar te miardal dae mel sael a nr bei, caporsor mel leil lei gol dae lol. <sup>18</sup> Yel zzirmar te yaa nnel leil ae si lei a bbeix: “Nia arsaenga a eine bei, arsaenga a caporsor mel leil lei gol dae lol leir?” <sup>19</sup> Yaa Faxrlar leil ddarkoxl a bbeix: “Xiboxrlaexr su ssormaer mel Aezixr su ssormaer mel le-nr-sel. Yaa ggecir ddei yarzi seir, ngua ssi nr ci seir dder yaa xiu teixl lei ho a,” eine bbeix a.

<sup>20</sup> Arbosobo mel aniux ggux gger su ssormaer eil nnel leil seir lol. Yirsaexllixl su ca mel miur zzae miur, ddo zzae ddo. <sup>21</sup> Aniux ggux gger su nnel mel Arbosobo leil gexr a, Arbosobo dder yaa leil armael ddei ake ar hhexr zza lol a.

<sup>22</sup> Giedae Faxrlar te Aezixr su ca mel leil miardal a bbeix: “Xiboxrlaexr su ca mel xiu teixl lei caporsor maelmaerjgia leil Nixrloxr lazzarmo zex gga piar ji gger nia, ssormaerssor maelmaerjgia leil nael, gol dae lol nia,” eine bbeix a. cons checked

### Moxrxi Leil Xiu

**2** <sup>1</sup> Lixlweixl su ca ar ddei a, yar dax cir cuxr su ssormaer ar ddei leil bbeix a yar maerssor bei lol a. <sup>2</sup> Ssormaer hal ddei aniux niar a, ssor ar ddox hier wo a. Yar leil i dae a yarzi igax zae a, yar leil so xiubbo kerzi a. <sup>3</sup> Giedae zeixleixr lei kerzi ssei nr ddo a, yaa dder bokiex bei teixl lei bellerzzi ar taex vei si lei a, ajjix ddir lol nr var taxrvixrka nei bbiursul mei deix a, aniux ddox leil bellerzzi taex gga dol ji gger a, lazzarmo qir leil bokiex cili mel gga dol ji gger a. <sup>4</sup> Aniux yardaxl ddox vimirmir ggie ngier dae a, yar arsaenga var bbe i dae.

---

<sup>a</sup>1:15 Xiboxrlaexr su ca Xiboxrlaexr su ca mel dder Yirsaexllixl su ca mel nga a.

<sup>5</sup> Halcar malmal, Faxrlar ssormaer ddei ggecir cir lei a, lazzarmo qir leil ssi ci a. Yar leil visser su ssormaer mel lazzarmo qir leil ssi dae. Yar bokiex cili gga bellerzzi taex leil mia a dder yar leil visser su ssormaer ar ddei leil miardal a, vei si lei lol. <sup>6</sup> Yar bellerzzi taex ddaexr kae a, aniuux ddox leil mia a. Aniuux ddox mel nge dae a, yar dder zoxlnixr a bbeix: “Aniuux eil ddox mel Xiboxrlaexr su ca mel ddei a,” eine bbeix a. <sup>7</sup> Aniuux yardaxl ddox Faxrlar ssormaer dax bbeix: “Ngo ni leil Xiboxrlaexr su ssormaer mel gga baxrda gger su ar ddei qie gger si lei a, aniuux eil ddox leil baxrda gger lol ssa ssa?” <sup>8</sup> Faxrlar ssormaer ddei bbeix: “Nga ddo,” eine bbeix a. Aniuux yardaxl ddox dder aniuux yarma ddei leil ae si lei a. <sup>9</sup> Faxrlar ssormaer ddei aniuux yarma ddei leil bbeix: “Ni aniuux eil ddox leil deix si a ngo leil hier gger dae, baxrda gger dae. Ngo ni leil worper gger var.” Ssormaer ddei dder aniuux ddox leil deix si a baxrda gger dae a. <sup>10</sup> Aniuux ddox vaer du lei a, ssormaer ddei aniuux ddox leil Faxrlar ssormaer dax halmaex hier mal a dder yar ddei ssor bei dae a. Yar bbeix: “Ngo aniuux eil ddox leil ajjix gga gga teixl lei a,” eine bbeix a, yel dder yar leil Moxrxi<sup>b</sup> mi gger a.

### Moxrxi Mirdixl Pa Mal

<sup>11</sup> Giedae Moxrxi ca vaer loxr a. Eine ar boxl a, yar zalbbaer ddux a yar dax cir mermi su ca mel dax ssi a, yaa miar lirlirmo hal mel bei dae ggie mia a. Yar halae Aezixr su ca ar ddei a yar dax cir mermi su Xiboxrlaexr su ca ar ddei leil deil ggie mia a. <sup>12</sup> Yel yar vael piar a yo piar a arleixr i a, ca nr mia a dder Aezixr su ca hal ddei leil deil zil gger a, sa cili gga giexl kerzi gger a. <sup>13</sup> Giedae cir ni yar yoxl ddux a, Xiboxrlaexr su ca nnel a zzi deil ggie mia a dder yaa nnel gga waxlwoxrwoxrmo hal te leil bbeix: “Ni arsaenga a ni dax cir mermi su ca mel leil deil leir?” <sup>14</sup> Ca hal te yar leil ddarkoxl a bbeix: “Arseir ni leil ngua ddei vaervaerpor nei ngua leil sersuca bei lol a leir? Holbbaexl ni ngo leil Aezixr su ca hal ddei leil seixl mel sael a seixl niazzir dae a ngo?” Moxrxi dder gexr du lei a, nixmox

---

<sup>b</sup>2:10 Moxrxi “Moxrxi” nei “gga teixl lei” ddar eil nr qir zzi dax te lesel.

zzar xiar dae a bbeix: “Ca mel arsaebeilei eimel leil saexl ho a.”

<sup>15</sup> Faxrlar eimel leil bbejiur a dder Moxrxi leil seixl niazzir dae a. Nael Moxrxi Faxrlar leil pa a, Mirdixl pa mal a halmaex goxr dae a.

Eine ar ni a, yar lurddur qir leil cux dae car, <sup>16</sup> Mirdixl su Arbosobo leil zi su Yelteixlloxr ddei ssormaer sirler lei a, ajjix ti lei. Yaa lultur gga ti bbi a, yarbbor ddei acixl mel leil da niazzir dae. <sup>17</sup> Acixl-loxlsu ar mel lei a, yaa leil ggaxr pixl gger a. Moxrxi zzael yaa leil wor jjiu, yoxl yaa ddei acixl mel leil ajjix da. <sup>18</sup> Giedae yaa yarbbor dax halmaex jjixr ci a, yarbbor yaa leil biex a bbeix: “Nia eilni arsaenga a einezeixl jjixr lei neixr leir?”

<sup>19</sup> Yaa ddarkoxl a bbeix: “Aezixr su ca ar ddei a ngua leil wor jjiu a, ngua leil ci su acixl-loxlsu mel leil ggaxr pixl gger, halae yoxl ngua leil acixl mel leil ajjix ti da jjiu.”

<sup>20</sup> Yarbbor dder yar ssormaer mel leil biex a bbeix: “Ca hal ddei arddolmaex hher dae? Nia arsaenga a yar leil zalbbaer hher dae lol leir? Yar leil qie si lei a, niul dax cirgo a almeixr zzor lei lol nia.”

<sup>21</sup> Moxrxi mel Yelteixlloxr dax cirgo a hher yuex, yel yar dder yar ssormaer Xipola leil Moxrxi maerssor bei lol a. <sup>22</sup> Xipola mel ssor ar ddox hier wo a. Moxrxi bbeix: “Ngo mel piar nr saexl mix nr mia ggie hher dae ca ar ddei a,” eine bbeix a. Yel yar aniuX ddox leil Gexrsuixl<sup>c</sup> mi gger a.

<sup>23</sup> Hormo nixixl goxr ho a, Aezixr goxrjia zzirmar ddei si a. Yirsaexllixl su ca mel miar yarzi sulku mel bei dae a, yaa goxr sol a ae dae a Arbosobo leil qiuxr a, yaa leil beijjiu lol. Yaa qiuxr dae mel, Arbosobo dax ddeix ci a. <sup>24</sup> Arbosobo mel yaa qiuxr dae mel leil bbejiur a dder yar Yalboxrlahar, Yirsar, Yargel yaa dax bbeixharzaxr dae mel holcir du lei a. <sup>25</sup> Arbosobo mel Yirsaexllixl su ca mel yarzisael goxr sol ggie mia a, yaa arsaesae nga saexl. cons checked

### Arbosobo Moxrxi Leil Tiur

**3**<sup>1</sup> Moxrxi mel yar yoxrpor Mirdixl su Arbosobo leil zi su Yeltexlloxr leil acixl loxl gger dae. Cir ni a, yar acixl mel leil hierbolpae gga hier gel ta a, Hexrlixl worga hherdder Arbosobo ddei worga

<sup>c</sup>2:22 Gexrsuixl "Gexrsuixl" nei "piar nr saexl mix nr mia ggie hher dae ca" ddar eil nr qir zzi dax te leisel.

hal ga leil ssi ci a. <sup>2</sup> Yihexrhuaxr ddei Tisir ddei alcur cili adoxlle mel gga Moxrxi leil mia lol. Moxrxi i a, alcur cili mel leil adoxl bbiu dae ggie mia a; nael cu nr pixl. <sup>3</sup> Moxrxi bbeix: “Ngo gger a, murgurgurmo eil ddei leil arleixr i ssi nia. Arsaenga a alcur cili ddei cu pixl nr var leir?”

<sup>4</sup> Yihexrhuaxr mel yar ssi naer lei a, i lei niazzir dae ggie mia a dder alcur cili gga ae dae a bbeix: “Moxrxi! Moxrxi!” Yar ddarkoxl a bbeix: “Ngo eilmaex gga hher dae.” <sup>5</sup> Arbosobo bbeix: “Ni lei naer lei nr ddo. Ni ngier ggie middei eilmaex mel ngo hher ggie seirceix-seirmaer middei ddei nga a. Yel ni qihher leil ddexr dae qixnex zze lixr teixl nia. <sup>6</sup> Ngo mel niabbor ddei Arbosobo, Yalboxrlahar ddei Arbosobo, Yirsar ddei Arbosobo, Yargel ddei Arbosobo,” eine bbeix a. Moxrxi Arbosobo leil mia leilei a gexr a dder qiaxrmeix ddei leil bbe gex du lei a.

<sup>7</sup> Yihexrhuaxr bbeix: “Ngo ddei cassor-worssor mel Aezixr goxrjia gga arsaer lerler goxrsol dae mel, ngo yarzi mia a. Aezixr su ca mel yaa leil bixr a, yaa ae nge dae a, ngo bbejjiur a. Yaa goxr sol dae mel lei ngo saexl. <sup>8</sup> Ngo zei lei a mel, yaa leil Aezixr su ca mel leixrga gga jiuxl teixl lei a, yaa leil middei hal ddei gga hier teixl lei a, middei kuaxkuaxmo, narcixlcixlmo, baxr nei bbiurvi pe ggie mermi<sup>d</sup> hier mal nia, hherdder Jianaxr su ca, Hexl su ca, Yalmoxrlixl su ca, Birlixlxir su ca, Xiweixl su ca nei Yibulsi su ca mel hher ggie nga a. <sup>9</sup> Eilboxl Yirsaexllixl su ca mel ae nge dae a, ngo bbejjiur a; Aezixr su ca mel yaa leil arsaer lerler bixr lei ngo mia a. <sup>10</sup> Yel eilcar, ngo ni leil miardal a, ni leil Faxrlar dax ssi lol a, ngo ddei cassor-worssor Yirsaexllixl su ca mel leil Aezixr goxrjia gga hier teixl lei lol.”

<sup>11</sup> Moxrxi Arbosobo dax bbeix: “Ngo azo ca suax bbeixleir; arsaer Faxrlar dax ssi a, Yirsaexllixl su ca mel leil Aezixr goxrjia gga hier teixl lei cexr?” <sup>12</sup> Arbosobo ddarkoxl a bbeix: “Ngo ni dax cirgo a hher dax dae. Ni cassor-worssor mel leil Aezixr goxrjia hier teixl lei ho a, nia worga eil ga leil ngo leil visser nia. Eil ddei leil mia a dder ngo ni leil miardal teixl arddeir a saexl ddo a.”

---

<sup>d</sup>3:8 baxr nei bbiurvi pe ggie mermi Yilsir mel dder middei hal ddei yarzi naxrcixl, cirza-hanga lei zza, yarzi goxr seir.

<sup>13</sup> Moxrxi Arbosobo leil bbeix: “Ngo Yirsaexllixl su ca mel dax ssi a, yaa leil bbeix: ‘Nia porpor mel ddei Arbosobo ngo leil nia dax eilmaex miardal si lei a,’ eine bbeix a, yaa ngo leil ‘Yar leil arsae mi?’ biex arddeirnga a, ngo yaa leil arsae ddarkoxl bbeixleir?”

<sup>14</sup> Arbosobo Moxrxi leil bbeix: “Ngo mel dder ngo. Yar yoxl bbeix: “Ni Yirsaexllixl su ca mel dax eine bbeix nia: ‘Ngo mel dder ngo bbeix su hal ddei ngo leil miardal a nia dax lei lol.’”

<sup>15</sup> Arbosobo yoxl Moxrxi leil bbeix: “Ni Yirsaexllixl su ca mel leil ‘Yihexrhuaxr,<sup>e</sup> nia porpor mel ddei Arbosobo hherdder Yalboxrlahar ddei Arbosobo, Yirsar ddei Arbosobo, Yargel ddei Arbosobo ddei ngo leil miardal a nia dax lei lol,’ eine bbeix gger nia.

Ngo leil mel arddolcar ci lei Yihexrhuaxr mi. Cirzeix-hanga lei ngo leil eine mi holcir dae nia. <sup>16</sup> Ni Yirsaexllixl su ca mel leil guaxr su camar mel leil ae pex du lei a, yaa leil bbeix: ‘Yihexrhuaxr nia porpor mel ddei Arbosobo, hherdder Yalboxrlahar ddei Arbosobo, Yirsar ddei Arbosobo, Yargel ddei Arbosobo ddei, ngo leil mia lol a bbeix:

Ngo nia leil zabbar seilseir i dae a, Aezixr su ca mel nia leil arsae bei mel leil mia dae.

<sup>17</sup> Ngo lei bbeix, nia leil Aezixr goxrjia goxrsol-goxrnaxr mel gga hier teixl lei a,

Jianaxr su ca, Hexl su ca, Yalmoxrlixl su ca, Birlixlxir su ca, Xiweixl su ca nei

Yibulsi su ca mel hher ggie hier mal nia, hherdder baxr nei bbiurvi pe ggie mermi nga a.’

<sup>18</sup> Ni eine bbeix a, yaa dder ni ddar no var. Ni nei Yirsaexllixl su ca leil guaxr su camar mel Aezixr goxrjia zzirmar ddei dax ssi a, yar leil bbeix: ‘Xiboxrlaexr su ca mel ddei Arbosobo Yihexrhuaxr ngua dax zzi a. Eilcar ni ngua leil so ni meirne jjiumo ssi a hiebolpae gga ssi lol la. Eine nga a ngua, ngua ddei Arbosobo Yihexrhuaxr leil zicexr,’ eine bbeix nia. <sup>19</sup> Nael ngo saexl, ngo leixrhher ddei ddoddo-

<sup>e</sup>3:15 Yihexrhuaxr Xiboxrlaexr ddar gga "Yihexrhuaxr" nei "ngo mel dder ngo" bbeix a zzidax bbeix lesel, yilsi lei lesel.

mo nr bei arddeirnga a, Aezxir goxrjia zzirmar ddei nia leil ssi lol nr yuex. <sup>20</sup> Yel ngo leixrhher ddei cei teixl a, Aezixr goxrjia gga murgurgurmo cirza-hanga bei a, yaa leil faxr nia. Eine nga a saelnei, yar nia leil ssi lol yuex. <sup>21</sup> Ngo Aezixr goxrjia su ca mel nia leil i du lol nia. Yel nia ssi car, nia leil leixrku-leixrler ssi lol nr var. <sup>22</sup> Yirsaexllixl su ssormaer mel yaa dax goxr naer dae Aezixr su ssormaer mel dax nei yaa ake ngol hher dae ssormaer mel dax piu, sae nei pia mel li ssi a, nia ddei ssormine mel leil veixr lol nia. Yel nia dder Aezixr su ca mel ddei zzaegu naxrcixlcixl mel vei si a.”

### Arbosobo Moxrxi Leil Ddoddomo Bei Var Quexrlixl Gger

**4** <sup>1</sup> Moxrxi ddarkoxl a bbeix: “Yaa ‘Yihexrhuaxr mel ni leil mia lol nr goxr’ bbeix var. Yel yaa ngo leil ddarzzi nr var, ngo ddei ddar no nr var.’” <sup>2</sup> Yihexrhuaxr Moxrxi leil bbeix: “Ni leixrhher ddei gga azo ar ddei vei dae?” Yar bbeix: “Zzargger ar caex vei dae.”

<sup>3</sup> Yihexrhuaxr bbeix: “Zzargger caex middur ddei leil piar dol gger nia.” Yar piar dol gger a, zzargger caex dder sae ar ddei loxr a, Moxrxi dder beix pixl si a. <sup>4</sup> Nael Yihexrhuaxr Moxrxi leil bbeix: “Ni leixrhher ddei cei teixl la a, sae maeldae ddei leil zox gex dae nia.” Moxrxi dder leixrhher ddei cei teixl lei a, sae maeldae ddei leil zox gex dae a, sae ddei dder zzargger ar caex loxr xixl a. <sup>5</sup> Yihexrhuaxr lei bbeix: “Eine nga a mel, Yirsaexllixl su ca mel dder yaa porpor ddei Arbosobo hherdder Yalboxrlahar ddei Arbosobo, Yirsar ddei Arbosobo, Yargel ddei Arbosobo ni leil mia lol a ddarzzi var.”

<sup>6</sup> Yihexrhuaxr yoxl yar leil bbeix: “Ni leixrhher ddei xilbebbor gga hex ji dae nia.” Yar dder leixrhher ddei xilbebbor gga hex ji a. Nael yar leixrhher ddei cei teixl lei a qie nopae a; wor mel sael a piu.

<sup>7</sup> Yihexrhuaxr bbeix: “Ni leixrhher ddei zeixleixr xilbebbor gga hex ji xixl nia.” Yar dder hex ji xixl a. Nael yar cei teixl lei a qie kor gaxzi a; ggecir ddei leil kebal hoxrneixr mel dax ciryoxr a nga a.

<sup>8</sup> Yihexrhuaxr bbeix: “Yaa ni ddei ddar no-nr-ni, ni ddoddomo bei beil hal ddei leil ddar-nr-zzi arddeirnga a, yaa giedae bei dae ddei leil ddarzzi var. <sup>9</sup> Nael yaa ni ddoddomo bei dae eil nnel jjia leil lei ddar-nr-zzi, ni ddar bbeix dae mel leil lei no-nr-ni arddeirnga a, ni

dder Nixrloxr lazzarmo gga ajjix ar mel vei si la a, hieltebbor dox dol gger. Ni Nixrloxr lazzarmo gga vei si lei ajjix mel sirnilni loxr nia.”

<sup>10</sup> Moxrxi Yihexrhuaxr dax bbeix: Seirpor, ngo halleix tortor lei ddar biar nr var. Eilcar ni ngo dax ddar biar ho a lei, ngo ddar biar nr var. Ngo mel ddar nr zza arddeir a.

<sup>11</sup> Yihexrhuaxr yar leil bbeix: “Arseir ca leil meir niar lol a neil? Arseir ca leil ddar te nr var lol, nolbbar lol, mia xie nei mia nr xie lol a neil? Nr nga a dder ngo Yihexrhuaxr nga a zzarmar? <sup>12</sup> Eilcar ni ssi ddo a! Ngo ni leil ddar biar var lol, ni bbeixlabox ddar mel ni leil mul gger.” <sup>13</sup> Nael Moxrxi bbeix: “Seirpor, ni kebal arseir leil ssi lol niazzir arseir leil ssi lol ddo a!

<sup>14</sup> Yihexrhuaxr Moxrxi leil sirzzi a bbeix: “Nr nga ni doxl Lixlweixl su ca niago Yalluixr mi ar ddei zza zzarmar? Yar mel hazzi ddar biar var ngo saexl. Eilcar, yar ddux lei a ni leil zi lei a. Yar ni leil mia a, nixmox zzar dder ggese. <sup>15</sup> Ni yar leil bbeixlabox ddar mel biar gger. Ngo lei ni lei nei yar leil ddar biar var lol, nia beilabox mel nia leil mul gger. <sup>16</sup> Yar ni ddei dirtu bei a cassor-worssor mel dax ddar biar. Ni yar leil ni ddei meir i mal gger nia, yar ni leil Arbosobo i mal gger nia. <sup>17</sup> Ni leixrhher gga zzargger eil caex vei dae a, ddoddomo hal mel bei cexr.”

### Moxrxi Aezixr Goxrjia Jjixr

<sup>18</sup> Yel Moxrxi dder yar yoxrpor Yeltexlloxr dax jjixr a, yar dax bbeix: “Ni leil qiuxr, ngo leil Aezixr goxrjia gga ngo cirssor mel zza zza dae seir bbe i jjixr lol la.” Yeltexlloxr yar leil ddarkoxl a bbeix: “Ni zzasoso a jjixr ddo a!” <sup>19</sup> Moxrxi halae Mirdixl mermi hher dae seir car, Yihexrhuaxr yar leil bbeix: “Ni leil seixl niazzir su ca mel maelmaerjjia lei si ho a. Ni Aezixr goxrjia gga jjixr ddo a.” <sup>20</sup> Moxrxi dder yar maerssor nei yar ssor nrnel leil hier dae a, yaa leil tarlo-daex ddei leil zzaer dae lol a, Aezixr goxrjia gga jjixr du a. Moxrxi leixrhher gga Arbosobo ddei zzargger caex vei dae.

<sup>21</sup> Yihexrhuaxr Moxrxi leil bbeix: “Ni Aezixr goxrjia gga jjixr ci ho a, ngo ni leil bei var lol murgurgurmo hal mel leil holcir dae a, Faxr-



lar ddei meixsaer qir leil bei nia. Nael ngo yar leil nixmox ddei gex lol a, yar cassor-worssor mel leil ssi lol nr [yuex/var]. <sup>22</sup> Ni Faxrlar dax bbeix:

‘Yihexrhuaxr bbeix:

Yirsaexllixl mel ngo ddei ssor a; ngo ddei ssor vaervaer ddei a.

<sup>23</sup> Ngo ni dax bbeix

ni ngo ssor leil ngo leil visser ssi lol a, yar leil ssi lol nia.

Nael ni zzael yar leil nr ssi lol. I ddo a! Ngo ni ssor vaervaer ddei leil seixl zil gger nia,’ ” eine bbeix nia.

<sup>24</sup> Moxrxi jjiumo car gga xixl ggie ar maex xixl dae a, Yihexrhuaxr yar dax zzi a, yar leil seixl niazir dae. <sup>25</sup> Yel yar maerssor Xipola dder legelbbe teixvilvilmo ar pir vei a, yar ssor ddei sirbeixlddur ol-niuxniux zzi ddei caer teixl lei a, yar capor qihher ddei leil piar deix gger a bbeix: “Ni mel ngo sirnilni capor ddei nga a.” <sup>26</sup> Eine sael-nei Yihexrhuaxr yar leil piur. Xipola bbeix “ni mel dder ngo sirnilni capor ddei nga a,” eine bbeix a yar gelir bei arddeir a.

<sup>27</sup> Giedae Yihexrhuaxr Yalluixr leil bbeix: “Ni mipaerbbae gga ssi a Moxrxi leil zi ssi nia.” Yar dder ssi a, Arbosobo ddei worga ga leil Moxrxi dax zzi a dder yar leil jiuxl. <sup>28</sup> Moxrxi dder Yihexrhuaxr yar leil bbeix lol ddar mel nei ddoddomo bei lol hal mel, maelmaerjjia lei Yalluixr leil bbeix gger a. <sup>29</sup> Moxrxi nei Yalluixr dder Yirsaexllixl su ca leil guaxr su camar maelmaerjjia leil ae pex ssi a. <sup>30</sup> Yalluixr dder Yihexrhuaxr Moxrxi leil bbeix gger ddar mel maelmaerjjia yaa leil biar gger a. Yar cassor-worssor mel meixsaer qir leil ddoddomo hal mel bei a. <sup>31</sup> Cassor-worssor mel ddarzzi a. Yaa Yihexrhuaxr yaa leil zoxlnixr nei yaa goxrsol dae mel mia a bbejjiur a dder cizixl gger dae a yar leil bbeixzae gger.

Moxrxi Nei Yalluixr Aezixr Goxrjia Ddei Zzirmar Dax Ssi

**5** <sup>1</sup> Giedae Moxrxi nei Yalluixr ssi a Faxrlar leil bbeix: “Yirsaexllixl su ca mel ddei Arbosobo Yihexrhuaxr bbeix: ‘Ngo ddei cassor-worssor mel leil ssi lol nia, yel yaa hierbolpae gga jiax goxr a ngo leil zi cexr,’ ” eine bbeix a. <sup>2</sup> Faxrlar ddarkoxl a bbeix: “Yihexrhuaxr bbaexl arseir a leir? Ngo arsaenga a yar ddei ddar no a, Yirsaexllixl

su ca mel leil ssi lol? Ngo Yihexrhuaxr leil nr saexl, Yirsaexllixl su ca mel leil lei nr ssi lol.”<sup>3</sup> Yaa bbeix: “Xiboxrlaexr su ca mel ddei Arbosobo ngua dax zzi a. Ngua leil so ni meirne jjumo ssi lol a, hierbolpae gga ssi lol la. Yel ngua ddei Arbosobo Yihexrhuaxr leil zi cexr. Nr nga a, yar ngua leil nogielno lol bbeixsael altor sser a ngua leil bei zil gger leilei.”<sup>4</sup> Aezixr zzirmar ddei yaa leil bbeix: “Moxrxi, Yalluixr, nia arsaenga a cassor-worssor mel leil miar nr bei lol leir? Nia nia daxr billabox mel bil ssi ddo a!”<sup>5</sup> Nia i ddo a! Eilmaex gga hher dae Yirsaexllixl su ca mel eilleix yarzisael miur, nael nia halae yaa leil daxr ddei nr bil lol!”

<sup>6</sup> Hal cir ni malmal, Faxrlar ddei wormu su mel leil guaxr su nei vaervaerpor mel leil miardal a bbeix:<sup>7</sup> “Nia cassor-worssor mel leil zua beilabox silbbar mel zeixleixr gger nr ddo, yaa armael ddei armael leil silbbar zo ssi lol nia.”<sup>8</sup> Nia halae yaa dax yaa zoxl a zua bei teixl lei dae mel miumiu li nia, cir taex lei nganiul lol nr ddo. Yaa mel bbaeyo a ae dae a qiuxr a bbeix: ‘Ngua leil ngua ddei Arbosobo leil zi ssi lol la,’ eine bbeix.<sup>9</sup> Nia yaa leil miar lirlirmo hal mel bei lol a, yaa yarzi sulku a, ca leil fur dae ddar hal mel leil no-nr-ni a.

<sup>10</sup> Faxrlar ddei wormu su mel leil guaxr su nei vaervaerpor mel cassor-worssor mel leil bbeix: “Faxrlar bbeix: ‘Ngo nia leil silbbar nr gger.’<sup>11</sup> Nia armael arddolmaex silbbar zo wo ddo dder arddolmaex zo ssi ddo a. Nael nia miar beilabox mel cirdoxr lei nganiul nr var,’ eine bbeix a.”<sup>12</sup> Yel ca mel dder Aezixr goxrjia gga zzarvulzzarmae ssi a, silbbar ggux ssi.”<sup>13</sup> Faxrlar ddei wormu su mel leil guaxr su mel yaa leil zul a bbeix: “Nia cir ni ddei miar mel cir ni bei jjia nia, hherdder halleix nia leil silbbar gger dae mel dax ciryoxr a nga.”<sup>14</sup> Faxrlar ddei wormu su mel leil guaxr su mel Yirsaexllixl su ca ar mel tiur teixl lei a, vaervaerpor bei lol a ca mel leil guaxr dae lol. Yaa Yirsaexllixl su vaervaerpor eil mel leil deil a bbeix: “Arni nei eilni nia arsaenga a halleix bei teixl lei dae zua hal mel miumiu nr bei, nia miar ddei bei nr jjia leir?”

<sup>15</sup> Yel Yirsaexllixl su ca leil guaxr su vaervaerpor mel Faxrlar leil qiuxr lei a bbeix: “Arsaenga a ni leil wormu gger su mel leil eine bei leir?”<sup>16</sup> Ni ddei wormu su mel leil guaxr su mel silbbar zzae ngua leil

nr gger, zua zzae ngua leil halleix miumiu bei teixl lei lol! Yaa ngua leil deil a mel, nia Aezixr su ca mel zzi a nga arddeir a.”<sup>17</sup> Nael Faxrlar bbeix: Ca bbaeyo eil mel nia! Nia mel miar \*\*bei nia-nr-zzir a ‘Nguua leil Yihexrhuaxr leil zi ssi lol la,’ eine bbeix arddeir a.<sup>18</sup> Eilcar nia miar bei ssi ddo a! Silbbar nael nia leil nr gger, zua nael halleix miumiu bei teixl lei nia,” eine bbeix.<sup>19</sup> Yirsaexllixl su ca leil guaxr su vaervaerpor mel, “Nia bbecir-bbeni beilabox zua mel cir-doxr lei nganiul lol nr ddo,” eine bbejjiur a dder yaa zoxr a saexl a.<sup>20</sup> Giedae yaa Faxrlar dax halmaex ddux lei a, Moxrxi nei Yalluixr yaa nrnel zalbbaer ngier dae a yaa leil xia dae ggie mia a<sup>21</sup> dder yaa dax bbeix: “Nia mel Faxrlar nei yar leil vissersu vaervaerpor mel leil ngua leil vuxryixr lol, altor baex yaa leixrga gga vei ji gger a ngua leil seixl lol. Yihexrhuaxr leil nia bei dae mel leil mia lol nia, nia leil ser lol nia.”

### Moxrxi Yihexrhuaxr Dax Sol Biar

<sup>22</sup> Yel Moxrxi Yihexrhuaxr dax jjixr ci a bbeix: “Seirpor, ni arsaenga a cassor-worssor eilmel leil ke leir? Arsaenga a ngo leil miardal a yaa dax eilmaex lei lol leir?<sup>23</sup> Ngo Faxrlar ddei dax ssi a, ni ddei mi ddei leil sser dae a ddar biar cirdae, yar dder ni ddei cassor-worssor eilmel leil ke, ni zzael yaa leil cir-doxr lei nr jiuxl.”

**6**<sup>1</sup> Yihexrhuaxr Moxrxi dax bbeix: “Eilboxl ni ngo Faxrlar leil ar-sae lerler bei dae ggie mia nia. Ngo leixrhher ddei cei teixl a ddoddomo hal mel bei a, Faxrlar dder Yirsaexllixl su ca mel leil ssi lol lar nr nga a nei, halae yaa leil yar ddei mi ddei hal ddei gga ggaxr teixl gger nia.”

### Arbosobo Moxrxi Leil Saexl Lol

<sup>2</sup> Arbosobo Moxrxi leil bbeix gger a bbeix: “Ngo mel Yihexrhuaxr a.<sup>3</sup> Ngo halleix Yalboxrlahar, Yirsar, Yargel leil ngo mel cirza-hanga ddo zzir Arbosobo a mia lol a. Nael ngo leil Yihexrhuaxr mi mel yaa leil zeixleixr lei saexl lol nr seix.<sup>4</sup> Ngo yaa dax yaa ngol hher dae Jianaxr mermi hal ddei yaa leil gger nia bbeixharzaxr goxr a.<sup>5</sup> Eilboxl Aezixr goxrjia su ca mel Yirsaexllixl su ca mel leil ddoddo-

nrddo miar mu lol a, yaa cix a, ae dae a, ngo bbejjiur a; ngo lei halleix ngo yaa dax bbeixharzaxr goxr ddei leil holcir dae.

<sup>6</sup> Yel ni Yirsaexllixl su ca mel dax eine bbeix nia: ‘Ngo mel Yihexrhuaxr a. Ngo nia leil Aezixr su ca mel ddei daxr lirlir ddei woxrke ddux lei lol nia. Ngo nia leil yaa ddei zebol nr mu lol jiuxl teixl lei nia. Ngo ngo ddei leihher bbor cei teixl lei a ddoddomo bei a, yaa leil faxr/ser a, nia leil vae xixl lei nia. <sup>7</sup> Ngo nia leil ngo ddei cassorworssor bei lol nia, ngo lei nia ddei Arbosobo bei nia. Nia ngo mel dder nia ddei Arbosobo Yihexrhuaxr ddei nga, nia leil Aezixr goxrjia su ca mel ddei daxr lirlir gga jiuxl teixl lei su ddei nga a saexl nia. <sup>8</sup> Ngo nia leil ngo Yalboxrlahar, Yirsar, Yargel dax bbeixharzaxr goxr a yaa leil gger middei hal ddei gga hier dil nia, middei hal ddei nia leil gger nia. Ngo mel Yihexrhuaxr a.’ ”

<sup>9</sup> Moxrxi Yirsaexllixl su ca mel leil eine bbeix gger a. Nael yaa nixmox zzar yarzi zzasol, halae miar bei a yarzi sulku a dder Moxrxi ddei ddar noni nr yuex.

<sup>10</sup> Giedae Yihexrhuaxr Moxrxi leil bbeix gger a bbeix: <sup>11</sup> “Ni ssi a Aezixr goxrjia zzirmar Faxrlar leil bbeix Yirsaexllixl su ca mel leil yar mermi ddei gga ddux lol nia,” eine bbeix nia.

<sup>12</sup> Moxrxi Yihexrhuaxr leil ddarkoxl a bbeix: “Ngo mel ddar lei biar nr var ca ar ddeir a. Yirsaexllixl su ca mel lei ngo ddei ddar nr no mel, Faxrlar ddei arsae ngo ddei ddar no var bbeixleir?” eine bbeix.

<sup>13</sup> Yihexrhuaxr Moxrxi nei Yalluixr leil Yirsaexllixl su ca mel dax nei Aezixr goxrjia zzirmar Faxrlar ddei dax arsae ddar bbeix nia miardal a, Yirsaexllixl su ca mel leil Aezixr goxrjia gga hier teixl lei lol.

### Moxrxi Nei Yalluixr Ddei Porpor

<sup>14</sup> Yirsaexllixl su ca mel ddei porpor mel leil jiasibbor biar dae: Yirsaexllixl ddei ssor vaervaer Liurbil ddei ssor mel Hanor, Farlul, Xisiluixr nei Jiamir nga a. Eimel mel dder Liurbil ddei cuxr gga jiacuxr mel nga a.

<sup>15</sup> Ximixl ddei ssor nael Yimurlixl, Yarmir, Axiaxr, Yarjie, Sorxiaxr nei Jianaxr su ssormaer ddei ssor Sarloxr nga a. Eilmel mel dder Ximixl ddei cuxr gga jiacuxr mel nga a.

<sup>16</sup> Lixlweixl ddei ssor mel leil nael Gexrsuixl, Gexiaxr, Mirlalixl mi. Lixlweixl mel cirxiu soceisir (137) koxl gol ci a. Yar ddei ssormine mel jiasibbor biar dae mel nga a.

<sup>17</sup> Gexrsuixl ddei ssor mel Lixlnixr nei Sixlmeir nga a.

<sup>18</sup> Gexiaxr ddei ssor nael Allaxr, Yirsiha, Xiboxrluixr nei Wuxue nga a. Gexiaxr mel cirxiu soceiso (133) koxl gol ci a.

<sup>19</sup> Mirlalixl ddei ssor nael Moxrlixl nei Mursixl nga a.

Eil mel mel dder Lixlweixl ddei cuxr gga jiacuxr mel nga a.

<sup>20</sup> Allaxr mel yarbbor nimo Yuezibir leil bbeix a yar maerssor bei lol. Yuezibir yar leil ssor nnel hier gger a; Yalluixr nei Moxrxi nga a. Allaxr cirxiu soceisir (137) koxl gol ci a.

<sup>21</sup> Yirsiha ddei ssor mel nael Kerla, Nixrfei, Xiljilixl nga a.

<sup>22</sup> Wuxue ddei ssor mel nael Mirsalixl, Yirlixlsarfaxr, Xitixrlixl nga a.

<sup>23</sup> Yalluixr mel Yirlixlsaba leil bbeix a yar maerssor bei lol. Yirlixlsaba mel Yalmirnaxrdaxr ddei ssormaer, Naxrsuixl ddei nimo a. Yirlixlsaba Yalluixr leil ssor hier gger mel nael Naxrdaxr, Yalbirfuxl, Yirlixlyalsar nei Yirtamar nga a.

<sup>24</sup> Kerla ddei ssor mel nael Yalxi, Yirlixljianaxr, Yalbiryalsar nga a. Eilmel mel dder Kerla ddei giedae ca mel ddei jiacuxr mel nga a.

<sup>25</sup> Yalluixr ddei ssor Yirlixlyalsar mel Purtixr ddei ssormaer ar ddei leil bbeix a yar maerssor bei lol. Yar maerssor yar leil ssor ar ddox hier gger a; Feinixrha mi.

Eilmel mel dder Lixlweixl giedae ca mel ddei jiacuxr gga vaer-vaerpor mel nga a.

<sup>26</sup> Halleix Yihexrhuaxr miardal a bbeix: “Yirsaexllixl su ca mel leil Aezixr goxrjia gga circir-circir hier teixl lei nia,” bbeix dae ca hal

nrnel mel dder Moxrxi nei Yalluixr nga a. <sup>27</sup> Yaa nrnel mel dder Aezixr zzirmar Faxrlar dax Yirsaexllixl su ca mel leil Aezixr goxrjia hier teixl lei nia bbeix su ca mel nga a.

<sup>28</sup> Yihexrhuaxr Aezixr goxrjia gga Moxrxi dax ddar biar hal cir ni, <sup>29</sup> yar Moxrxi leil bbeix gger a bbeix: “Ngo mel Yihexrhuaxr a. Ngo ni dax ddar bbeix dae hazza lei ni Aezixr goxrjia zzirmar Faxrlar leil bbeix gger nia.” <sup>30</sup> Moxrxi ddarkoxl a bbeix: “Ni ardae i, ngo mel ddar lei biar nr var ca ar ddei a. Faxrlar arsae ngo ddei ddar no var bbeixleir?”

### Moxrxi nei Yalluixr Faxrlar Dax Ddar Biar

**7** <sup>1</sup> Yihexrhuaxr Moxrxi leil bbeix: “I ddo a! Ngo ni leil Faxrlar ddei meixsaer qir leil Arbosobo sael a nga lol; niago Yalluixr mel ni ddei xiezi bei nia. <sup>2</sup> Ha ngo ni leil miardal dae mel ni dder bbeix nia. Niago Yalluixr nael, Faxrlar dax Yirsaexllixl su ca mel leil yar ddei middei gga ddux lol, eine bbeix nia. <sup>3</sup> Ngo mel Faxrlar leil nixmox gex lol nia, yel ngo Aezixr goxrjia gga ddoddomo murgurgurmo cirke bei nia. <sup>4</sup> Nael Faxrlar nia leil noni nr var. Ngo leixrhher ddei cei teixl a, Aezixr goxrjia su ca mel leil larhorhormo faxr a, ngo ddei cassor-worssor Yirsaexllixl su ca mel leil circir-circir Aezixr goxrjia gga hier teixl lei nia. <sup>5</sup> Ngo leixrhher ddei cei teixl a, Aezixr goxrjia su ca mel leil faxr a, Yirsaexllixl su ca mel leil yaa dax hier teixl lei car, yaa dder ngo mel Yihexrhuaxr a saexl a,” eine bbeix a.

<sup>6</sup> Moxrxi nei Yalluixr eilmel sael a bei a. Yihexrhuaxr yaa leil arsae miardal yaa dder arsae bei a. <sup>7</sup> Yaa nrnel Faxrlar dax ddar biar ssi car, Moxrxi mel heixlcei koxl loxr a; Yalluixr nael, heixlcei so koxl loxr a.

### Yalluixr Ddei Zzargger Caex

<sup>8</sup> Yihexrhuaxr Moxrxi nei Yalluixr leil bbeix gger a bbeix: <sup>9</sup> “Faxrlar nia leil ‘Nia murgurgurmo hal mel ar jji bei lar’ bbaexl eine bbeix arddeirnga a, ni dder Yalluixr leil miardal a bbeix: ‘Zzargger caex Faxrlar meixsaer qir leil piar dol a, zzargger caex leil sae loxr lol,’ eine bbeix nia.”

<sup>10</sup> Moxrxi nei Yalluixr Faxrlar dax halmaex ssi a, Yihexrhuaxr yaa leil miardal dae mel sael a bei a. Yalluixr zzargger caex Faxrlar nei yar leil vissersu vaervaerpor mel meixsaer qir leil piar dol gger a, zzargger caex dder sae loxr a. <sup>11</sup> Yel Faxrlar dder sulsaxlsu nei neirisu mel leil ae si lei a. Yaa mel dder Aezixr goxrjia gga neirbeisu mel nga a. Yaa neir bei a, Moxrxi nei Yalluixr sael a bei a. <sup>12</sup> Yaa armael ddei zzargger caex middur ddei leil piar dol gger a, zzargger caex dder sae loxr a. Nael Yalluixr ddei zzargger caex mel yaa ddei zzargger mel leil ixl ji a. <sup>13</sup> Eine nga a lei, Faxrlar ddei nixmox gex a, Moxrxi nei Yalluixr bbeix dae ddar mel leil no-nr-ni, hherdder Yihexrhuaxr bbeix dae mel sael a nga.

## Aezixr Goxrjia Gga Goxrsol-Goxrnaxr Hal Mel

### 1. Ajjix Mel Sirnilni Loxr Lol

<sup>14</sup> Yihexrhuaxr Moxrxi leil bbeix: “Faxrlar mel nixmox gex a, cassor-worssor mel leil nr ssi lol. <sup>15</sup> Arggenehe yar ddux lei a, lazzarmo zex dax ssi car, ni lazzarmo qir leil ssi a, yar leil zi ssi nia. Leixrhher gga nael, sae loxr goxr zzargger caex vei dae a, <sup>16</sup> yar dax bbeix: ‘Xiboxrlaexr su ca ddei Arbosobo Yihexrhuaxr ngo leil miardal a ni leil bbeix: “Ngo ddei cassor-worssor mel leil ssi lol nia, yel yaa hierbolpae gga ngo leil zi cexr,” eine bbeix a. Nael eilcar ci a lei, ni halae no-nr-ni. <sup>17</sup> Yihexrhuaxr yoxl bbeix: “Ngo leixrhher gga zzargger caex sser a, lazzarmo gga ajjix mel leil deil a, ajjix mel dder sirnilni loxr a. Yel ni ngo mel dder Yihexrhuaxr a saexl var. <sup>18</sup> Ajjix gga ngol mel si jjia nia, ajjix mel lei bbeirne nia, yel Aezixr goxrjia su ca mel dder lazzarmo zex gga ajjix mel leil dda nr cexr a,”” eine bbeix a.

<sup>19</sup> Yihexrhuaxr Moxrxi leil bbeix gger a bbeix: “Ni Yalluixr leil bbeix: ‘Ni zzargger caex Aezixr goxrjia gga ajjix hazza ggaxrne, hherdder yaa ddei lazzarmo vaervaer, vixiur, vi bbeddur, ajjix bbeddur mel ggaxrne dor dae nia, yel ajjix mel leil sirnilni loxr lol nia. Six beiteixllel ajjix jilabox gga nei loxga gga lei sirnilni a nga a. Aezixr goxrjia gga zzarvul-zzarmae lei sirnilni a nga a””

<sup>20</sup> Yel Moxrxi nei Yalluixr dder Yihexrhuaxr yaa leil miardal dae mel sael a bei a. Yalluixr mel Faxrlar nei yar leil vissersu vaervaerpor mel meixsaer qir leil zzargger caex bil du lei a, lazzarmo gga ajjix mel leil deil a, ajjix mel maelmaerjgia lei sirnilni loxr a. <sup>21</sup> Ajjix gga ngol mel si a; ajjix mel lei bbeirne a. Aezixr goxrjia su ca mel dder lazzarmo gga ajjix mel dda nr cexr a. Aezixr goxrjia gga mel zzarvul-zzarmae lei sirnilni a nga a.<sup>f</sup> <sup>22</sup> Giedae Aezixr goxrjia neirisu mel lei neir bei a, ajjix mel leil sirnilni loxr lol a. Faxrlar ddei nixmox gex a, Moxrxi nei Yalluixr ddei ddar no-nr-ni, hherdder Yihexrhuaxr bbeix dae mel sael a nga. <sup>23</sup> Giedae Faxrlar ddei yar hherggie xi gga ddir jjixr si a. Eil ddei leil nixmox gga lei nr ji dae. <sup>24</sup> Aezixr goxrjia su ca mel lazzarmo gga ajjix mel dda nr cexr a, lazzarmo nr piar nr bbu leil suddu giexl a, ajjix dda wo niazzir.

<sup>25</sup> Yihexrhuaxr lazzarmo leil deil ho sir nibbi a.

## 2. Zzarvul-Zzarmae Gelerdo Zza Lol

**8** <sup>1</sup> Yihexrhuaxr Moxrxi leil bbeix gger a bbeix: “Ni Faxrlar leil i ssi a, yar leil bbeix: ‘Yihexrhuaxr bbeix: Ngo ddei cassor-worssor mel leil ssi lol nia, yel yaa ngo leil visser ssi cexr. <sup>2</sup> Ni yaa leil nr ssi lol arddeirnga a, ngo dder gelerdo mel leil ni mermi zzarvul-zzarmae bei xiaxr gger lol nia. <sup>3</sup> Lazzarmo gga gelerdo ho bei ho miur nia. Yaa ddeix lei a ni hherggie xi gga nei ni yixrggie ddir nia, ni yixrgguci ddei leil ddeix nia, ni leil vissersu vaervaerpor mel nei ni ddei ca mel ddei xi gga ddir nia, halae ni adoxl zi ggie nei ni aba ggiex faexddu larggu gga tiuxl dil nia, <sup>4</sup> yoxl ni nei ni leil vissersu vaervaerpor, halae ni ddei cassor-worssor mel ggecir leil ddeix nia,’ ” eine bbeix a.

<sup>5</sup> Yihexrhuaxr Moxrxi leil bbeix gger a bbeix: “Ni Yalluixr dax bbeix: ‘Ni zzargger caex lazzarmo vaervaer, vixiur nei vi bbeddur ggaxrne dor dae nia, yel gelerdo mel leil Aezixr goxrjia hieltebbor ddeix lei lol nia.’ ” <sup>6</sup> Yalluixr dder zzargger caex Aezixr goxrjia ajjix

<sup>f</sup>7:21 Aezixr su ca mel lazzarmo ddei neir leil zi. Yel Arbosobo Yihexrhuaxr lazzarmo gga ajji maelmaerjgia leil sirnilni loxr lol a mel yaa leil yar meldder ddo zzir Arbosobo ddei nga saexl lol.



maelmaerjjia ggaxrne dor dae a, gelerdo mel dder ddeix lei a, Aezixr goxrjia gga zzarvul-zzarmae lei gelerdo a nga a. <sup>7</sup> Neirisu mel lei neir bei a, eilmel sael a gelerdo mel leil Aezixr goxrjia hieltebbor ddeix lei lol a.

<sup>8</sup> Faxrlar ddei Moxrxi nei Yalluixr leil ae si lei a bbeix: “Nia Yihexrhuaxr [leil qiuxr a/dax ddar biar a], gelerdo mel leil ngo nei ngo ddei ca mel dax tor nr hher lol a, ngo dder cassor-worssor leil Yihexrhuaxr leil zzeir seixl zi ssi lol.” <sup>9</sup> Moxrxi Faxrlar leil bbeix: “Arsae bei ni lozza! Ngo arddolcar ni nei ni leil vissersu vaervaerpor, halae ni ddei ca mel leil Arbosobo dax ddar biar gger a, ni dax nei ni hher ggie gelerdo mel leil bei zil gger a, lazzarmo gga lar hher lol nia neil?” <sup>10</sup> Yar bbeix: “Arggeni.” Moxrxi bbeix: “Ni bbeix dae mel sael a bei ddo a! Yel ni leil arseir lei Yihexrhuaxr ngua ddei Arbosobo lesel su nr zza saexl lol. <sup>11</sup> Gelerdo mel ni dax nei ni hher ggie xi gga nr hher, halae ni leil vissersu vaervaerpor nei ni ddei ca mel dax nr hher, lazzarmo gga lar hher.”

<sup>12</sup> Yel Moxrxi nei Yalluixr dder Faxrlar dax nr hher, ddux a. Gelerdo mel Faxrlar leil ke a, Moxrxi yar leil Yihexrhuaxr dax qiuxr gger a. <sup>13</sup> Yihexrhuaxr dder Moxrxi yar leil qiuxr dae mel sael a bei a. Ha ake gga, zzaexggu gga, mi gga hher dae gelerdo mel si jjia a. <sup>9</sup> <sup>14</sup> Aezixr goxrjia su ca mel dder gelerdo sima mel leil cirmar-cirmar mar du lei a, cirmaex-hanga lei bbeirne a. <sup>15</sup> Nael Faxrlar gelerdo mel si jjia a mia a dder nixmox ddei gex du lei a, yaa ddei ddar nr no, hherdder Yihexrhuaxr bbeix dae mel sael a nga.

### 3. Nilme Mel Leil Korxi Loxr Lol

<sup>16</sup> Yihexrhuaxr Moxrxi leil miardal a bbeix: “Ni Yalluixr leil bbeix: ‘Ni ddei zzargger caex sser a, middurbbor nilme mel leil deil nia, yel Aezixr goxrjia gga zzarvul-zzarmae nilme mel leil korxi loxr lol.’ ” <sup>17</sup> Yaa dder eilmel sael a bei a. Yalluixr leixrhher ddei cei teixl a, zzargger caex middurbbor nilme mel leil deil a, ca ggecir nei zzeir

---

<sup>9</sup>8:13 Aezixr su ca mel gelerdo leil zi, bei zil gger nr ddo. Yel Arbosobo Yihexrhuaxr gelerdo maelmaerjjia si lol a mel yaa leil yar meldder ddo zzir Arbosobo ddei nga saexl lol.

ggecir leil dder korxi zza a. Aezixr goxrjia gga zzarvul-zzarmae nilme mel lei korxi loxr a.<sup>h</sup> <sup>18</sup> Neirisu mel lei neir bei a, korxi ddux lei lol niazzir, nael ddux lei lol nr xie. Halcar ca ggecir nei zzeir ggecir leil lei korxi zza a. <sup>19</sup> Neirisu mel dder Faxrlar dax bbeix: “Eilmel mel Arbosobo bei a.” Nael Faxrlar halae nixmox gex a, Moxrxi nei Yalluixr leil no-nr-ni, hherdder Yihexrhuaxr bbeix dae mel sael a nga.

#### 4. Aezixr Goxrjia Gga Yamir Cirke Zza Lol

<sup>20</sup> Yihexrhuaxr Moxrxi leil bbeix: “Arggenehe ni neixrneixr-sisi ha du lei nia, Faxrlar ajjix qir leil lei ci a, ni yar xilmeir ngier dae a yar dax bbeix: ‘Yihexrhuaxr bbeix: Ngo ddei cassor-worssor mel leil ssi lol nia, yel yaa ngo leil visser cexr. <sup>21</sup> Ni ngo ddei cassor-worssor mel leil nr ssi lol arddeirnga a, ngo dder ninei ni leil vissersu vaer-vaerpor, halae ni ddei ca mel ggecir leil yamir circir-circir nor lei lol, ni ddei xi gga dir lol, halae Aezixr goxrjia su ca mel ddei xi gga nei middur leil lei yamir lillil a nga lol nia. <sup>22</sup> Hal cir ni, ngo, ngo ddei cassor-worssor mel hher ggie Gesa mermi ddei bbe teixl lei nia, yel halmaex gga yamir circir-circir mel nr zza lol a, ni leil ngo mel mer woxrke Yihexrhuaxr ddei nga a saexl lol. <sup>23</sup> Ngo, ngo ddei cassor-worssor mel leil nei ni ddei cassor-worssor mel leil bbe kae gger nia. Arggeni dder ddoddomo eil ddei bei nia,’ ” eine bbeix a.

<sup>24</sup> Giedae Yihexrhuaxr dder eine bei a. Yamir mel seirseil ar cir loxr a, Faxrlar hher ggie xi nei yar leil vissersu vaervaerpor mel ddei xi gga ddir a. Aezixr goxrjia gga zzarvul-zzarmae lei dder yamir eil cir bei xiaxr gger a.<sup>i</sup>

<sup>25</sup> Faxrlar Moxrxi nei Yalluixr leil ae si lei a bbeix: “Nia ssi ddo a! Goxrjia eil ddei gga nia ddei Arbosobo leil zzeir seixl zi ssi ddo a!”

---

<sup>h</sup>8:17 Aezixr su ca mel middur leil guaxr su neir ddei leil zi. Yel Arbosobo Yihexrhuaxr Aezixr goxrjia zzarvul-zzarmae nilme mel korxi loxr lol a mel yaa leil yar meldder ddo zzir Arbosobo ddei nga a saexl lol.

<sup>i</sup>8:24 Aezixr su ca mel yamir leil zi. Yel Arbosobo Yihexrhuaxr yamir mel leil Aezixr goxrjia zzarvul-zzarmae bei xiar gger lol a mel yaa leil yar meldder ddo zzir Arbosobo ddei nga a saexl lol.

<sup>26</sup> Nael Moxrxi bbeix: “Ngua eilmaex ngua ddei Arbosobo Yihexrhuaxr leil zzeir seixl zi a mel, Aezixr goxrjia su ca mel ngua bei dae mel leil vuxryixr var. NguA Aezixr goxrjia su ca mel meixsaer qir leil yaa vuxryixr dae hal mel bei a, zzeir seixl zi arddeirnga a mel, yaa legelbbe sser a ngua leil zax zil gger leilei. NguA eine bei a mel hoxr-nr-sil. <sup>27</sup> NguA jjiimo so ni meirne ssi a, hierbolpae gga ssi nia, ngua ddei Arbosobo Yihexrhuaxr miardal dae mel sael a yar leil zzeir seixl zi ssi nia.” <sup>28</sup> Faxrlar bbeix: “Ngo nia leil ssi lol a, hierbolpae gga nia ddei Arbosobo Yihexrhuaxr leil zzeir seixl zi ssi lol, nael nia ssi vimir nr ddo. Elcar nia ngo leil Arbosobo dax ddar biar gger nia.” <sup>29</sup> Moxrxi bbeix: “Ngo ddux a Yihexrhuaxr leil qiuxr ssi a, arggeni dder yamir circir-circir mel leil ni dax nei ni leil vissersu vaervaerpor halae ni ddei ca mel dax nr hher lol. Nael Faxrlar, ni zeixleixr ngua leil fur nr ddo a; ngua leil Yihexrhuaxr leil zzeir seixl nr zi ssi lol bei nr ddo a.” <sup>30</sup> Yel Moxrxi dder Faxrlar dax nr hher, ddux a, Yihexrhuaxr dax ddar biar ssi a. <sup>31</sup> Yihexrhuaxr dder Moxrxi yar dax biar dae mel sael a bei a, yamir mel leil Faxrlar nei yar leil vissersu vaervaerpor halae yar ddei cassor-worssor mel dax nr hher lol, yel cir ddei lei nr zza a. <sup>32</sup> Nael eilboxl lei Faxrlar mel yoxl nixmox gex a, Yirsaexllixl su ca mel leil nr ssi lol.

## 5. Zzeir Mel Leil Nogielno Lol

**9** <sup>1</sup> Yihexrhuaxr Moxrxi leil bbeix: “Ni Faxrlar dax ssi a yar leil bbeix: ‘Xiboxrlaexr su ca ddei Arbosobo Yihexrhuaxr bbeix: “Ngo ddei cassor-worssor mel leil ssi lol nia, yel yaa ngo leil zi cexr,” eine bbeix a. <sup>2</sup> Ni yaa leil nr ssi lol, zeixleixr ddoddo-nrddo yaa leil hher dae lol arddeirnga a, <sup>3</sup> Yihexrhuaxr dder ni mi gga hher dae zzeir mel leil, hherdder mur, tarlodaex, loxltoxr, niur nei acixl ya mel leil larhorhormo nogielno lol nia. <sup>4</sup> Yihexrhuaxr, Yirsaexllixl su ca ddei zzeir mel leil nei Aezixr su ca ddei zzeir mel leil bbe teixl lei nia, yel ha Yirsaexllixl su ca ddei zzeir mel dder cir ddei lei nr si.’ ” <sup>5</sup> Yihexrhuaxr dder nixixl ddei bbeix har zaxr a bbeix: “Arggeni ngo eilmaex gga eilmel bei nia.” <sup>6</sup> Giedae cir ni, Yihexrhuaxr dder eilmel sael a bei a. Aezixr su ca ddei zzeir mel si jgia a; nael

Yirsaexllixl su ca ddei zzeir mel zzael, cir ddei lei nr si.<sup>j</sup> <sup>7</sup> Faxrlar ca leil miardal a i ssi lol, arseir lei xiar nr ci, Yirsaexllixl su ca ddei zzeir mel cir ddei lei nr si. Nael Faxrlar zzael nixmox gex a, Yirsaexllixl su ca mel leil nr ssi lol.

## 6. Zzeir Nei Ca Leil Ggierrgier Lol

<sup>8</sup> Yihexrhuaxr Moxrxi nei Yalluixr leil bbeix: “Nia loxzoxl gga kurlu nr dex sael dex dae a Moxrxi mel, Faxrlar meixsaer qir leil kurlu mel merlabbor xiu du lei nia. <sup>9</sup> Kurlu eilmel Aezixr goxrjia gga zzarvul-zzarmae nilme loxr nia, cirmaex-hanga ddei ca nei zzeir mel ggecir leil ddeix a dder ggierrgier a, pur du lei nia.” <sup>10</sup> Moxrxi nei Yalluixr dder loxzoxl gga kurlu dex si lei a, Faxrlar meixsaer qir leil ngier dae a. Moxrxi kurlu mel merlabbor xiu du lei a dder ca nei zzeir ggecir leil ddeix a, ggierrgier a pur du lei a. <sup>11</sup> Neirbeisu mel ddei ggecir leil nei Aezixr su ca maelmaerjjia ddei ggecir leil lei ggierggier a, pur du lei a; yel neirbeisu mel dder Moxrxi meixsaer qir leil ngier ver nr xie a.<sup>k</sup> <sup>12</sup> Yihexrhuaxr Faxrlar leil nixmox gex lol a, yar dder yaa ddei ddar nr no; hherdder Yihexrhuaxr Moxrxi dax bbeix goxr mel sael a nga.

## 7. Wortaxlaex Lei Lol

<sup>13</sup> Giedae Yihexrhuaxr Moxrxi leil bbeix: “Arggenehe ni neixrneixr-sisi ha du la a, Faxrlar ddei dax ssi a, yar xilmeir ngier dae a, yar dax bbeix: ‘Xiboxrlaexr su ca ddei Arbosobo Yihexrhuaxr bbeix: Ngo ddei cassor-worssor mel leil ssi lol nia, yel yaa ngo leil visser cexr. <sup>14</sup> Eilboxl ngo, larhorhormo hal mel ni nei ni leil vissersu vaervaerpor, halae ni ddei cassor-worssor mel leil ddeix lol nia, ni leil mer woxrke mel ngo lesel su ar ddei

---

<sup>j</sup>9:6 Aezixr su ca mel loxrbbex leil zi. Yel Arbosobo Yihexrhuaxr yaa ddei loxrbbex maelmaerjjia si lol a mel, yaa leil yar meldder ddo zzir Arbosobo ddei nga a saexl lol.

<sup>k</sup>9:11 Neir zi su mel nilme xiux a mel ca mel leil seir lol niazzir, nael Arbosobo Moxrxi leil ca mel leil nilme xiux deix gger lol a yaa leil ggierrgier lol a mel, yaa leil yar meldder ddo zzir ddei nga a saexl lol.

nr zza saexl lol. <sup>15</sup> Ngo leixrhher ddei cei teixl a ni nei ni ddei cassor-worssor mel leil nogielno lol arddeirnga a, nia halleix dder middurbbor mier ho a. <sup>16</sup> Nael ngo ni leil gol dae lol a mel, ni leil ngo ddoddomo bei ggie mia lol, halae ngo ddei mi ddei mer woxrke cirmaex-hanga biar ci lol niazzir a nga arddeir a. <sup>17</sup> Nael ni halae ngo ddei cassor-worssor mel dax olvaer a, yaa leil nr ssi lol a ngo? <sup>18</sup> Arggeni eilcar sael ci a, ngo wortaxlaex vaervaermo lei lol nia. Aezixr goxrjia ddei goxrjia ar ddei loxr cirdae a lei, zeixleixr lei eilmel sael a lei nr seix. <sup>19</sup> Yel eilcar ni ca mel leil miardal a, ni ddei zzeir mel nei ni mi gga cirza-hanga mel leil ake jjixr lei lol. Ha ake jjixr nr ci mel, ca bbeixsael zzeir nga zzorbbeixlei, wortaxlaex mel yaa ggecir ddei leil deil gex dae a, yaa dder si lalnga a.' ”

<sup>20</sup> Faxrlar leil vissersu vaervaerpor cirmelmel a Yihexrhuaxr ddar bbeix dae eilmel leil gexr a dder yaa ddei zebol mel leil nei yaa ddei zzeir mel leil ake ddir jjixr lei lol a. <sup>21</sup> Nael Yihexrhuaxr ddei ddar no-nr-ni su ca mel zzael yaa ddei zebol mel leil nei yaa ddei zzeir mel leil mi gga hher dae lol.

<sup>22</sup> Giedae Yihexrhuaxr Moxrxi leil bbeix: “Ni leixrhher ddei cei teixl a, merlabbor dor dae a, Aezixr goxrjia gga zzarvul-zzarmae wortaxlaex lei lol nia. Yel ca nei zzeir ggecir mel leil, halae mi gga ciryoxr-hanga varssor-varne mel leil deil deix lol.” <sup>23</sup> Moxrxi zzargger caex merlabbor dor dae a, Yihexrhuaxr dder almer er lol, wortaxlaex lei lol nei almer bbiexr lol a, middurbbor bbiexr ze ci a. Yihexrhuaxr Aezixr goxrjia gga wortaxlaex lei lol a. <sup>24</sup> Halcar mel, wortaxlaex mel dax adoxl lei caxiux dax dae a, yarzi-sael gexrddo, Aezixr goxrjia ddei goxrjia ar ddei loxr cirdae a lei, zzarvul-zzarmae lei eilmel sael a eine nga nr seix. <sup>25</sup> Aezixr goxrjia gga zzarvul-zzarmae lei wortaxlaex deil dae a, mi gga ca nei zzeir, varssor-varne, halae cirza-hanga sixzzei maelmaerjjia leil lei deil xiaxr gger a. <sup>26</sup> Yirsaexllixl su ca mel hher ggie Gesa mermi larni wortaxlaex nr zza.<sup>1</sup>

---

<sup>1</sup>9:26 Aezixr su ca mel merlabbor hher dae neir mel leil zi. Arbosobo wortaxlaex lei lol a, yaa ddei cirza-hanga deil xiaxr gger a, yaa zi dae merlabbor hher dae neir mel yaa leil beijjiu nr cexr saexl lol. Yar mel ddo zzir ddei nga saexl lol.

<sup>27</sup> Faxrlar ca leil miardal a Moxrxi nei Yalluixr leil ae si lei lol a yaa leil bbeix: “Eilboxl ngo zuixl bei a. Yihexrhuaxr mel bei hor; ngo nei ngo ddei cassor-worssor mel bei nr hor. <sup>28</sup> Almer lei er loxr a; wortaexlaex lei lei loxr a. Nia leil qie, ngua leil Arbosobo dax qiuxr gger a, ngo dder nia leil ssi lol a, zeixleixr nia leil nr hher dae lol a.” <sup>29</sup> Moxrxi yar dax bbeix: “Ngo zzi gga ddux a dder leixrhher ddei bil du lei a, Yihexrhuaxr dax ddar biar a, almer er nor lol nia, wortaexlaex lei zeixleixr nr lei lol nia, yel nia leil middurbbor hazza lei Yihexrhuaxr ddei a saexl lol nia. <sup>30</sup> Nael ngo saexl, ni nei ni leil vissersu vaervaerpor mel mel halae Arbosobo Yihexrhuaxr leil nr gexr.” <sup>31</sup> Halcar, ssu mel ne ddux dae a; zzir mel lei veix dae a; yel eilmel leil mel wortaexlaex deil xiaxr gger a. <sup>32</sup> Nael so mel mel ne nr ddux seir, yel so mel leil nael, deil xiaxr nr gger. <sup>33</sup> Giedae Moxrxi Faxrlar dax nr hher zzi gga ddux a, leixrhher ddei bil du lei a, Yihexrhuaxr dax ddar biar a dder almer er nor a; wortaexlaex lei lei nor a; middurbbor lei almer lei nr zei lei a. <sup>34</sup> Faxrlar almer er nor, wortaexlaex lei nor, almer lei lei nor a mia a dder zeixleixr zuixl bei. Yar nei yar leil vissersu vaervaerpor mel lei nixmox ddei yoxl gex du lei a. <sup>35</sup> Faxrlar ddei nixmox gex a, Yirsaexllixl su ca mel leil nr ssi lol, hherdder Yihexrhuaxr Moxrxi leil bbeix lol goxr mel sael a nga.

## 8. Aezixr Goxrjia Gga Zzarvul-Zzarmae Zaxbiul Zza Lol

**10** <sup>1</sup> Yihexrhuaxr Moxrxi leil bbeix: “Ni Faxrlar dax ssi nia. Ngo yar nei yar leil vissersu vaervaerpor mel leil nixmox gex lol a mel, yaa dax ddoddomo hal mel bei niazzir a nga arddeir a. <sup>2</sup> Halae ni leil ngo Aezixr goxrjia gga ddoddomo bei dae mel nei Aezixr su ca mel leil larhorhormo bei dae hal mel, ni ddei ssor nei ni ddei lilbol mel leil biar gger lol a, nia leil ngo mel Yihexrhuaxr a saexl lol niazzir a nga arddeir a”

<sup>3</sup> Moxrxi nei Yalluixr dder Faxrlar dax ssi a bbeix: “Xiboxrlaexr su ca ddei Arbosobo Yihexrhuaxr bbeix: ‘Ni ngo meixsaer qir leil arddolcar olvaer ci niazzir dae neil? Ngo ddei cassor-worssor mel leil ssi lol nia, yel yaa ngo leil visser ssi cexr. <sup>4</sup> Ni ngo ddei cassor-

worssor mel leil nr ssi lol arddeirnga a, ni i dae la ddo a; arggeni ngo zaxbiul mel leil ni ddei goxrjia gga ddir lei lol nia. <sup>5</sup> Middurbbor lei yarlib-iarhiexr nga a middur ddei leil lei mia nr ddo, halae wor-taexlaex deil nr dae mel leil nei mi gga cirza-hanga yarzzei mel leil lei zzor jjia nia. <sup>6</sup> Ni hher ggie xi nei ni leil vissersu vaervaerpor mel ddei xi, halae Aezixr su ca mel ddei xi maelmaerjjia gga lei zaxbiul hher bbi jjia lol nia. Ni ddei porpor nei ni ddei porpor ddei porpor mel [eilmaex goxr dae/gol dae seir] cirdae a eilleix zzeze lei, eilmel sael a eine mia nr seix, ' " eine bbeix a. Moxrxi bbeix jjia a dder za xixl a, Faxrlar ddei dax nr hher ddux si a.

<sup>7</sup> Faxrlar leil vissersu vaervaerpor mel Faxrlar dax bbeix: "Ca eil ddei niul leil arddolcar ke ci niazzir dae leir? Ni Yirsaexllixl su ca mel leil ssi lol a, yaa ddei Arbosobo Yihexrhuaxr leil visser ssi lol hor. Aezixr goxrjia ddei bei xiaxr gger ho a ni halae nr saexl a ngo? <sup>8</sup> Yel dder Moxrxi nei Yalluixr leil Faxrlar dax ae xixl lei a yaa leil bbeix: "Nia, nia ddei Arbosobo Yihexrhuaxr leil visser ssi ddo a. Nael arseir lerler ssi neil?" <sup>9</sup> Moxrxi ddarkoxl a bbeix: "Nguamel Yihexrhuaxr bbeix dae jiax ddei goxr nia, yel ngua, ngua ddei marmar-leixlleixl, ssormaer-ssorne mel dax cirter a ssi nia. Halae acixl, ya, niur maelmaer leil lei ggaxr si nia." <sup>10</sup> \*\*\*\*Faxrlar ddarkoxl a bbeix: "Yihexrhuaxr nia dax hher dax dae bbaexl! Nia nei nia ddei ssormaer anix mel ssi ddo sa a! Nia nr seir bei ssi nia zzirdae mel arseir nr saexl bbeixleir? <sup>11</sup> Ssormaer anix mel ssi nr ddo, capor mel lar Yihexrhuaxr leil visser ssi ddo. Eil ddei mel dder nia qiuxr dae ddei nga a." Yel dder yaa leil Faxrlar meixsaer qir leil ggaxr teixl gger a.

<sup>12</sup> Yihexrhuaxr Moxrxi leil bbeix: "Ni leixrhher ddei cei teixl a, zzargger caex Aezixr goxrjia ddei leil dor dae nia, yel zaxbiul mel leil Aezixr goxrjia middur ddei leil lei lol a, wortaxlaex deil nr dae varssor-varne maelmaerjjia leil zzor jjia lol." <sup>13</sup> Moxrxi dder zzargger caex Aezixr goxrjia leil dor dae a, Yihexrhuaxr dofa piar a gga mersi jia mal lei lol a, cir xixl cir ni jia a. Eilneixr-nehe ci a mel, dofa piar a gga jia mal lei mersi mel dax zaxbiul jia dax si lei a. <sup>14</sup> Zaxbiul mel lei a, Aezixr goxrjia cirmaex-hanga lei hher dae a, yarzisael

larhor. Halleix lei zaxbiul eilmel sael a miur zza nr goxr, arddolcar lei eilmel sael a miur zza nr var. <sup>15</sup> Zaxbiul mel middurbbor yarlixl-yarhiexr hher dae a, middur ddei leil lei hher neix jjia a. Yoxl middur ddei leil wortaxlaex deil nr dae cirza-hanga varssor-varne nei sixzzei leil saer mel zzor. Yel Aezixr goxrjia gga cirmaex-hanga sixzzei bbeixsael mi gga varssor-varne mel lei nibaexbaex lei ardoxr nr zza a.<sup>m</sup>

<sup>16</sup> Faxrlar dder jiuur-jiuur-maemae Moxrxi nei Yalluixr leil ae si lei a bbeix: “Ngo, nia ddei Arbosobo Yihexrhuaxr leil de dae a; nia leil lei de dae a. <sup>17</sup> Eilcar ni leil qiuxr, ngo ddei zuixl mel leil eilboxl lar ssoxrsuxl ssa. Nia ddei Arbosobo Yihexrhuaxr leil lei qiuxr a, ngo leil eilboxl tor nr si lol.” <sup>18</sup> Moxrxi dder Faxrlar dax nr hher, ddux a, Yihexrhuaxr leil qiuxr ssi a. <sup>19</sup> Yihexrhuaxr dder xifa piar a gga mersi daxlgaxl jia xixl lei lol a, zaxbiul mel leil jia du lei a, neixvi nilni hal bbe gga jia ji gger a. Aezixr goxrjia zzarvul-zzarmae zaxbiul lei ar ddei nr zza a. <sup>20</sup> Nael Yihexrhuaxr mel Faxrlar ddei leil nixmox gex lol a, yar Yirsaexllixl su ca mel leil nr ssi lol a.

## 9. Aezixr Goxrjia So Ni Neixmar Lol

<sup>21</sup> Yihexrhuaxr Moxrxi leil bbeix: “Ni leixrhher ddei cei teixl a, zzargger caex merlabbor dor dae nia, yel Aezixr goxrjia ddei leil neixmar lol. Neixmarmar eil ddei leil mox dae ddo sael a nga.” <sup>22</sup> Moxrxi leixrhher ddei cei teixl a, zzargger ceix merlabbor dor dae a, Aezixr goxrjia zzarvul-zzarmae dder neixmar zildu so ni nga a. <sup>23</sup> Eil so ni gga mel ca mel lei zzicarzzi leil mia nr ddo a, arseir lei armael hher ggie ssi nr pixl. Nael Yirsaexllixl su ca mel hher ggie maelmaerjjia lei bbelele zza.<sup>n</sup>

---

<sup>m</sup>10:15 Aezixr su ca mel loxlmoxr leil guaxr su neir mel leil zi. Yel Arbosobo Yihexrhuaxr zaxbiul mel leil yaa ddei loxlmoxr mel zzor ji lol a mel, yaa leil yar meldder ddo zzir Arbosobo ddei nga a saexl lol.

<sup>n</sup>10:23 Aezixr su ca mel merni nei xiubbo leil zi. Yel Arbosobo Yihexrhuaxr merni nei xiubbo mia nr ddo lol a mel, yaa leil yar meldder ddo zzir Arbosobo ddei nga a saexl lol.



<sup>24</sup> Faxrlar dder Moxrxi leil ae si lei a bbeix: “Nia Yihexrhuaxr leil visser ssi ddo a. Nia ddei maerssor nei aniuX mel lei nia dax cir-go a ssi cexr, nael nia acixl, ya nei niur mel leil ggaxr si nr ddo.”

<sup>25</sup> Nael Moxrxi bbeix: “Ni ziddu nei adoxl gga cu a ziddu zzeir mel ngua leil ggaxr si lol nia, yel ngua ngua ddei Arbosboo Yihexrhuaxr zi cexr. <sup>26</sup> Ngua zzeir mel gga ar mel sser a, ngua ddei Arbosobo Yihexrhuaxr leil zi nia. Ngua halmaex ssi nr ci seir mel, azo sser a Yihexrhuaxr leil zi nia nr saexl seir. Yel ngua zzeir mel leil ggaxr si nia, eilmaex gga cir ddei lei nr hher lol. <sup>27</sup> Nael Yihexrhuaxr Faxrlar leil nixmox gex lol a, yar yoxl Yirsaexllixl su ca mel leil nr ssi lol a.

<sup>28</sup> Faxrlar Moxrxi leil bbeix: “Ni ngo dax tor nr hher hor! Ni fadae nia, ni ngo leil zeixleixr mia lol nr ddo a! Ni ngo leil mia hal cir ni, ni si nia!” <sup>29</sup> Moxrxi bbeix: “Ni yarzi bbeix hoxr! Ngo zeixleixr lei ni leil mia nr var a.”

## 10. Ssor Vaer Zzir Ddei Leil Seixl Zil Gger Lol

**11** <sup>1</sup> Giedae Yihexrhuaxr Moxrxi leil bbeix: “Ngo zeixleixr Faxrlar nei Aezixr su ca mel leil maelele ar boxl goxrsol lol nia, yel yar dder nia leil ssi lol var. Yar nia leil ssi lol car, nia leil mi ddei eil ddei gga ggaxr teixl jiax gger nia. <sup>2</sup> Ni Yirsaexllixl su ca mel leil bbeix gger a, capor, ssormaer mel leil lei yaa dax goxr naer dae Aezixr su ca mel dax piu, sae li ssi lol nia. <sup>3</sup> Yihexrhuaxr Aezixr su ca mel leil Yirsaexllixl su ca mel leil i du lol. Halae Faxrlar leil vissersu vaervaerpor nei cassor-worssor mel lei Moxrxi leil yarzisael i du.

<sup>4</sup> Moxrxi bbeix: “Yihexrhuaxr bbeix: ‘Merxixl-soxiu sael ci a, ngo ddux a Aezixr goxrjia gga zzarvul-zzarmae ssi za nia, <sup>5</sup> ha Aezixr goxrjia zzirmar baxrde taex leil cux dae Faxrlar cirdae a, nger gga su ssormaer zebol zzezze ssor hier beil ddei, halae zzeir cer beil mel, maelmaerjia lei si nia. <sup>6</sup> Aezixr goxrjia gga zzarvul-zzarmae lei bbialil-bbialor aenge ggie bbejjiur nia. Halcar tortor lei eilmel sael a zza nr seix, arddolcar lei eilmel sael a zza nr var. <sup>7</sup> Yirsaexllixl su ca mel leil bbeix ci a nael, ca bbeixsael zzeir nga zzorbbeixlei, anol lei yaa leil lu nr bel, 'eine bbeix a. Yel nia leil Yihexrhuaxr Aezixr su ca nei Yirsaexllixl su ca mel leil bbe teixl lei saexl lol. <sup>8</sup> Ni

leil vissersu vaervaerpor maelmaerjgia lei middur leil puxr gex dae a ngo leil qiuxr lei a bbeix: ‘Ni nei ni dax mae dae ca mel lei ssi hor,’ bbaexl eine bbeix a sael ngo ssi.” Yel Moxrxi dder Faxrlar dax nr hher, seifu-faexfaexmo ddux si a.<sup>o</sup>

<sup>9</sup>Yihexrhuaxr Moxrxi leil bbeix: “Faxrlar nia ddar nr no a, ngo Aezixr goxrjia gga murgurgurmo bei dae mel miur dax lol.” <sup>10</sup>Moxrxi nei Yalluixr mel Faxrlar meixsaer qir leil murgurgurmo eilmel maelmaerjgia bei a. Nael Yihexrhuaxr Faxrlar leil nixmox gex lol a, yar halae Yirsaexllixl su ca mel leil nr ssi lol.

### Yuxlyuexl Jiax

**12** <sup>1</sup>Yihexrhuaxr Aezixr goxrjia gga Moxrxi nei Yalluixr leil bbeix gger a bbeix: <sup>2</sup>“Eil xiubbo mel Guxlsixlxu nga a; cir koxl gga goxr beil hal xiubbo nga a.<sup>p</sup> <sup>3</sup>Nia Yirsaexllixl su ca maelmaerjgia leil bbeix gger a bbeix: ‘Eil xiu gga ddeix cei cir ni, nia ake hhexr ca seirpor ddei mel ake ca hhexr leil yassor bbeixsael acixlssor ar ddei tiur gger.’ <sup>4</sup>Ca hhexr nganiul a cir ddei zzor jjia nr xie arddeirnga a mel, yar dder yar dax goxr naer dae ca mel dax cirgo a ar ddei bei har zaxr. Nia bei har zaxr car, ca oldde dax zox dae nei arseir hormo zzor dil ddo ddei dax zox dae a, bei har zaxr. <sup>5</sup>Nia ya bbeixsael acixl lei sser ddo, nael cir koxl loxr yربول mel nga nia, halae noddexr dae nr ddo. <sup>6</sup>Nia acixlssor bbeixsael yassor ddei leil eil xiu ceili cir ni zeil ci a, mercixl car, Yirsaexllixl su ca mel maelmaerjgia lei acixlssor bbeixsael yassor ddei leil seixl. <sup>7</sup>Ca mel sirnilni ardoxr vei a, yaa yassor bbeixsael acixlssor hor zzor ggie ake alddur peixl nrpiar-nrbbu nei alddur ggaxrne mei gex gger. <sup>8</sup>Hal cir xixlmei, yaa hor mel adoxl teixl leil kal a, var kar nei miljiazi ji nr goxr aba mel dax cirgo a zzor dax. <sup>9</sup>Hor mel yarzzeir zzor nr ddo, zeixl lei zeixl

<sup>o</sup>11:8 Aezixr su ca mel zzir dae a Farlaxr nei yar ddei ssor Arbosobo sael nga. Yel Arbosobo Yihexrhuaxr Farlaxr ddei ssor vaervaer leil si lol a mel, yaa leil yar mel ddo zzir Arbosobo ddei nga a saexl lol.

<sup>p</sup>12:2 Yixrsaexllixl su ca mel Aezixr goxrjia ddux lei xilmeir leil cir koxl gga goxr beil hal xiubbo mel loxlmoxr se zi halleix nga a. Yirsaexllixl su ca mel zzir dae a Arbosobo loxlmoxr se zi halleix merlo-milo coxl.

leil nr ddo, oldde, qihher, xilbezzar mel jiujiu adoxl teixl leil kal leil lalddo. <sup>10</sup> Zzor nirzwei a arggenehe cirdoxr lei dol ci lol nr ddo. Zzor nirzwei zza arddeirnga a dder cu pixl gger. <sup>11</sup> Nia zzor car, maelsael neixl dae, qixnex ddexr dae, leixrhher gga zzargger vei dae a, nialnga sael zzor. Eil ddei mel Yihexrhuaxr ddei Yuxlyuexl jiax. <sup>12</sup> Hal cir xixlmei ngo {mel} Aezixr goxrjia gga zzarvul-zzarmae lei za jiax a, Aezixr goxrjia gga ca xiu teixl lei beil nei zzeir cer teixl lei beil maelmaerjia leil bei zil gger, yoxl Aezixr goxrjia neir maelmaerjia leil faxr. Ngo mel Yihexrhuaxr a. <sup>13</sup> Sirnilni eilmel nia hher ggie xi ddei leil hoxltexr bei nia. Ngo sirnilni eilmel leil mia a dder nia leil xir gel si a. Ngo Aezixr goxrjia gga ca xiu beil nei zzeir cer beil mel leil bei zil gger car, nia leil bei zil gger nr var. <sup>14</sup> Nia nixixl eil ni leil holcir dae a, cirzeix-hanga Yihexrhuaxr ddei jiax goxr nia. Jiax eil ddei mel cirse-cirsil lei nia ddei lixfaxr a.

### Miljiazi Ji Nr Goxr Aba Zzor Jiax

<sup>15</sup> Nia miljiazi ji nr goxr aba sir ni zzor. Jiax goxr beil cir ni dder miljiazi mel ake gga zza dae lol nr ddo. Arseir jiax goxr beil cir ni cirdae a sir ni cir ni zzeze lei miljiazi ji goxr aba mel zzor arddeirnga a dder, yar leil ngo ddei Yirsaexllixl su ca mel dax [ggaxr teixl gger/bbe kae gger], yel miljiazi ji goxr aba mel zzor nr ddo. <sup>16</sup> Nia goxr beil cir ni nei sir ni cir ni bbe teixl lei a, cirgo a hher dae a Arbosobo leil bbeixzae gger. Eil nr ni gga, nia zzorddu lar bei har zaxr ddo, kebal miar cirza lei bei nr ddo. <sup>17</sup> Ngo miljiazi ji nr goxr aba zzor jiax eil ni gga nia circuxr-hanga leil Aezixr goxrjia gga hier teixl lei a, nia jiax eil ddei goxr nia. Jiax eil ddei cirse-cirsil lei nia ddei lixfaxr, yel cirzeix-hanga lei jiax eil ddei goxr nia. <sup>18</sup> Guxlsixl-xiu ceili cir xixlmei cirdae a nrzei teixl cir xixlmei zzeze lei, nia miljiazi ji nr goxr aba zzor. <sup>19</sup> Eil sir ni gga mel nia ake gga miljiazi zza dae lol nr ddo. Ha miljiazi ji goxr aba mel zzor arddeirnga a, yar Yirsaexllixl su ca bbeixsael kebal mermi su ca nga zzorbbeixlei, Yirsaexllixl su ca mel dax [ggaxr teix gger/bbe kae gger]. <sup>20</sup> Ha miljiazi ji goxr zzorddu mel, nia dder zzor nr ddo; nia hher ggie cirmaex-hanga lei miljiazi ji nr goxr aba zzor.

## Yuxlyuexl Jiax Goxr Beil Boxl

<sup>21</sup> Yel Moxrxi dder Yirsaexllixl su ca leil guaxr su camar maelmaerjjia leil ae si lei a bbeix: “Nia hormo hhexr zza ddei dax zox dae a yassor bbeixsael acixlssor tiur teixl lei nia, yel Yuxlyuexl jiax goxr a seixl nia. <sup>22</sup> Niuxrxicar ar bo vei a, larggu ddei gga sirnilni mel niuxl a, alddur peixl nrpiar-nrbbu nei alddur peixl ggaxrne mei deix gger. Eilneixr-nehe zzezze ci a lei, nia arseir lei armael ddei ake alddur peixl leil ddux nr ddo. <sup>23</sup> Yihexrhuaxr Aezixr goxrjia za jiax a, Aezixr su ca mel leil seixl lei car, alddur peixl nrpiar-nrbbu nei alddur peixl ggaxrne mei deix dae sirnilni mel leil mia a dder alddur hal peixl leil xir gel si a, seixl lei su mel leil nia ake ddir a nia leil nr seixl ssi lol. <sup>24</sup> Nia miardal dae eil ddei bei zei si nia. Eil ddei mel cirse-cirsil lei nia nei nia giedae ca mel ddei lixfaxr a. <sup>25</sup> Arddolcar, nia Yihexrhuaxr nia leil gger nia bbeix har zaxr dae middei hal ddei gga ddir ci car, nia dder leiddur eil ddei bei nia. <sup>26</sup> Nia aniux mel nia leil ‘Leiddur eil ddei arddolyox yilsi zza?’ biex arddeirnga a, <sup>27</sup> Nia dder yaa leil ddarkoxl a bbeix: ‘Eil ddei mel Yuxlyuexl jiax goxr a Yihexrhuaxr leil ziddu ddei nga a. Yirsaexllixl su ca mel Aezixr goxrjia hher dae seir car, yar Aezixr goxrjia su ca mel leil seixl; yar Yirsaexllixl su ca mel ddei xi mel leil xir gel si a, niul cirhhexr-hanga leil olga jiuxl wo a,’ eine bbeix nia.” Yel cassor-worssor mel dder cizixl gger dae a, Yihexrhuaxr leil bbeixzae gger. <sup>28</sup> Yihexrhuaxr Moxrxi nei Yalluixr leil arsae miardal mel, Yirsaexllixl su ca mel dder arsae bei a.

## Aezixr Goxrjia Gga Ssor Xiu Beil Mel Leil Seixl Zil Gger

<sup>29</sup> Soxiu-baxlyixl ci a, Yihexrhuaxr Aezixr su ca mel ddei ssor vaer-vaer ddei, hherdder zzirmar baxrde leil cux dae Faxrlar cirdae a, cageggie ge ji dae ca mel ddei ssor vaervaer ddei zzezze, halae zzeir cer beil maelmaerjjia leil seixl zil gger a. <sup>30</sup> Faxrlar nei yar leil vissersu vaervaerpor maelmaerjjia, halae Aezixr su ca mel maelmaerjjia lei hal cir xixlmei zucur a, ha du lei a. Aezixr goxrjia gga mel cirhhexr-hanga lei ca si a, zzarvul-zzarmae lei yarzi larhor

bbialil-bbialor aenge ggie bbejjiur ddo. <sup>31</sup> Faxrlar hal cir xixlmei dder Moxrxi nei Yalluixr leil ae si lei a bbeix: “Nia ssi hor! Nia Yirsaexllixl su ca mel leil hier dae a, ngo ddei ca mel dax tor nr hher, nia bbeix dae mel sael a, Yihexrhuaxr leil zi ssi ddo a! <sup>32</sup> Nia lei nia bbeix dae mel sael a, acixl ya nei niur mel leil ggaxr dae a, ssi ddo a! Nia halae ngo leil seir lol nia,” eine bbeix a.

<sup>33</sup> Aezixr goxrjia su ca mel bbeix: “Nguua si jjia lalnga a!” Yel yaa dder Yirsaexllixl su cassor-worssor mel leil zul a nialngasael ssi lol.

<sup>34</sup> Yirsaexllixl su cassor-worssor mel dder miljiazi ji nr goxr aba bex mel larggu gga ji dae a, pia sser a tex du lei a, paezixlleixr ddei leil bil dae a. <sup>35</sup> Yaa halae Moxrxi yaa leil miardal dae mel sael a bei a, Aezixr su ca mel dax piu, sae nei pia mel li. <sup>36</sup> Yihexrhuaxr Aezixr su ca mel leil Yirsaexllixl su ca mel leil seir lol a, yel Yirsaexllixl su ca mel azo li, Aezixr su ca mel dder yaa leil azo gger. Eine nga a, yaa dder Aezixr su ca mel ddei zzaegu naxrcixlcixl mel vei si a.

### Yirsaexllixl Su Ca Mel Aezixr Goxrjia Gga Ddux

<sup>37</sup> Yirsaexllixl su ca mel Laxrsae zzi cirdae jjiimo ssi a, Suxge mer-mi ssi mal, ssormaer nei anix nr ca, capor lillil a nga lei qiuxlcei meir (600,000) sael zza. <sup>38</sup> Kebal su ca lei cirke ca dae, yoxl acixl ya nei niur lei cirke ggaxr dax dae. <sup>39</sup> Yaa leil Aezixr goxrjia gga ggaxr teixl gger a, yaa halmaex hher nr cexr, yaa lei zzorlabox bei har zaxr nr wo, yel yaa Aezixr goxrjia gga vei teixl lei, faex nr goxr aba mel kal.

<sup>40</sup> Yirsaexllixl su ca mel Aezixr goxrjia gga lixiu socei (430) koxl hher a. <sup>41</sup> Lixiu socei koxl bbi hal cir ni malmal, Yihexrhuaxr ddei cassor-worssor mel gga circuxr-hanga lei Aezixr goxrjia gga ddux lei a. <sup>42</sup> Hal cir xixlmei mel, Yihexrhuaxr yaa leil Aezixr goxrjia gga hier teixl lei a; yel hal cir xixlmei mel Yihexrhuaxr ddei a. Yirsaexllixl su ca mel dder cirzeix-hanga lei hal cir xixlmei leil holcir dae a jiax goxr nia.

## Yuxlyuexl Jiax Miardal Dae Mel

<sup>43</sup> Yihexrhuaxr Moxrxi nei Yalluixr leil bbeix: “Yuxlyuexl jiax goxr a lixfaxr mel dder eilmel nga a: Yirsaexllixl su nr nga ca mel Yuxlyuexl jiax goxr a zzorddu mel zzor nr ddo. <sup>44</sup> Nael nia zzirbae sser a vae si lei zebol mel, gelir bei goxr ho a mel dder zzor ddo. <sup>45</sup> Nia dax ngol hher dae ca mel nei kebal mermi su nia leil miar bei gger dae ca mel lei zzor nr ddo. <sup>46</sup> Nia zzor car, xi cir giex gga hher dae a zzor nia; hor zalbbaer cirdoxr lei vei teixl nr ddo. Ya ssor bbeixsael acixlssor ddei hherggar cir caex lei ngaxl te lol nr ddo. <sup>47</sup> Yirsaexllixl su ca maelmaerjjia lei jiax eil ddei goxr nia. <sup>48</sup> Nael nia dax hher dae Yirsaexllixl su nr nga ca mel Yihexrhuaxr ddei Yuxlyuexl jiax ddei goxr yuex arddeirnga a, yar ake capor maelmaerjjia gelir bei nia. Eine nga a saelnei yaa nia dax cirgo a jiax eil ddei goxr ddo, yaa lei dder Yirsaexllixl su ca mel dax ciryoxr a nga a. Nael gelir nr bei su ca mel dder zzor nr ddo. <sup>49</sup> Yirsaexllixl su ca nei nia dax hher dae Yirsaexllixl su nr nga ca mel lei lixfaxr eilmel dax bei mae dae nia.”

<sup>50</sup> Yihexrhuaxr Moxrxi nei Yalluixr leil arsae miardal mel, Yirsaexllixl su ca maelmaerjjia dder arsae bei a. <sup>51</sup> Hal cir ni malmal, Yihexrhuaxr Yirsaexllixl su ca mel leil Aezixr goxrjia gga circircircir hier teixl lei a.

**13** <sup>1</sup> Yihexrhuaxr Moxrxi leil bbeix gger a bbeix: <sup>2</sup> “Yirsaexllixl su ca mel gga ssor hier beil nei zzeir cer beil hazza lei ngo ddei a. Yel ni yaa leil bbe teixl lei a ngo ddei bei nia.”

## Cuxrjiaxl Jiax

<sup>3</sup> Moxrxi Yirsaexllixl su ca mel leil bbeix: “Yihexrhuaxr mel ddo-ddomo leixrhher zze sser a, nia leil nia zebol mu ggie Aezixr goxrjia gga hier teixl lei, yel nia nixixl hal cir ni leil holcir dae nia. Nia miljiazi ji goxr aba mel zzor nr ddo. <sup>4</sup> Nia Yalbir xiu<sup>q</sup> gga nixixl eilni Aezixr goxrjia gga ddux lei a. <sup>5</sup> Arddolcar, Yihexrhuaxr nia leil nia

<sup>q</sup>13:4 Yalbir xiu Yalbir xiu mel saxngaxiu nei lixiu nga a.

porpor mel dax bbeixharzaxr goxr mermi mel gga hier dil nia, hherdder Jianaxr su ca, Hexl su ca, Yalmoxrlixl su ca, Xiweixl su ca nei Yibulsi su ca ddei mermi nga a. Eilmel gga mel baxr nei bbiurvi pe dae ggie mermi nga a.<sup>5</sup> Hane ci a, nia eil xiubbo gga jiax eil ddei leil holcir dae a goxr nia. <sup>6</sup> Nia miljiazi ji nr goxr aba sir ni zzor nia. Sir ni cir ni ci a mel, nia Yihexrhuaxr ddei jiax eil ddei goxr nia. <sup>7</sup> Eil sir ni gga mel, nia miljiazi ji nr goxr aba mel zzor nia. Nia hher ggie zaza-lili mel miljiazi bbeixsael miljiazi ji goxr zzorddu cirdoxr lei zza lol nr ddo. <sup>8</sup> Hal cir ni, nia, nia ssor mel leil bbeix gger a bbeix: ‘Nguua, Yihexrhuaxr nguua leil Aezixr goxrjia gga hier teixl lei car, yar bei dae mel leil holcir dae a, jiax eil ddei goxr arddeir a,’ eine bbeix gger nia. <sup>9</sup> Yihexrhuaxr ddoddomo leixrhher zze sser a, nia leil Aezixr goxrjia gga hier teixl lei a. Yel nia jiax eil ddei goxr a mel, yar bei dae mel holcir dae lol, Yihexrhuaxr ddei lixfaxr mel bbeix teixl lei holcir dae lol, hherdder nia leixrhher ddei leil nei ngexrgazo ddei leil hoxltexr bei dae sael a nga. <sup>10</sup> Yel nia bbecir-bbekoxl lei nixixl eil ddei dax zox dae a, jiax eil ddei goxr nia.”

### Ssor Hier Beil Nei Zzeir Cer Beil Mel Yihexrhuaxr Leil Gger

<sup>11</sup> “Arddolcar, Yihexrhuaxr, yar nia nei nia porpor mel dax bbeixharzaxr goxr ddei dax zox dae a, nia leil Jianaxr mermi hier dil nia, mermi eil ddei nia leil gger nia. <sup>12</sup> Halcar, ni ssor hier beil mel, halae zzeir cer beil maelmaerjjia Yihexrhuaxr leil gger nia. Yarboll hazza lei Yihexrhuaxr ddei bei nia. <sup>13</sup> Ha cer beil tarlodaex mel, nia yassor mel sser a bo xixl lei nia. Bo nr xixl lei arddeirnga a dder yar leibbei ddei deil te gger nia. Ha ni ssor hier beil ddei leil dder bo xixl lei nia. <sup>14</sup> Arddolcar, ni ssor ddei ni leil biex a bbeix: ‘Eine bei a, arddolyox yilsa?’ Ni dder bbeix: ‘Yihexrhuaxr mel ddoddomo leixrhher zze sser a, nguua leil Aezixr goxrjia gga zebol mu ggie hier teixl lei a. <sup>15</sup> Halcar, Faxrlar nixmox gex a, nguua leil nr ssi lol a, Yihexrhuaxr dder Aezixr goxrjia gga ssor hier beil nei zzeir cer beil maelmaerjjia leil seixl zil gger a. Yel nguua cer teixl lei beil zzeirbol

<sup>5</sup>13:5 baxr nei bbiurvi pe dae ggie mermi nga a Yilsir ddei mel dder middei hal ddei yarzi naxrcixl, cirza-hanga lei zza, yarzi goxr seir.

maelmaerjjia Yihexrhuaxr leil seixl zi. Ssor hier beil mel leil nael, yassor sser a dir ssi. <sup>16</sup> Yihexrhuaxr ddoddomo leixrhher zze sser a, ngua leil Aezixr goxrjia gga hier teixl lei a. Yel nia bei dae eil mel hherdder nia leixrhher ddei leil nei ngexrgazo ddei leil hoxltexr bei dae sael a nga.’ ”

### Hiebolpae Gga Ssi Dae

<sup>17</sup> Faxrlar Yirsaexllixl su ca leil ssi lol car, Feilixlsixl mermi dax jjiumo hal zex leil ssi a naer bbeixarnar a, nael Arbosobo bbeix: “Yaa zzi deil ggie mia a waxlhuixr a, Aezixr goxrjia gga jjixr si lei,” bbaexl eine bbeix a, yar yaa leil hier dae a, hal zex leil nr ssi. <sup>18</sup> Yel Arbosobo yaa leil hier dae a jjiu za ssi a, hiebolpae gga ssi gel a, neixvi nilni bbe dax ssi. Yirsaexllixl su ca mel Aezixr goxrjia gga ddux lei car zzi deil labox vei dae. <sup>19</sup> Yuesaexl gol dae seir halcar, yar Yirsaexllixl su ca mel leil bbeix: “Yihexrhuaxr arsaebeilei nia leil guaxr dae var, nia Aezixr goxrjia gga ddux car, ngo ddei hher-ggar ddei vei dax si nia,” eine bbeix goxr a. Yar mel yaa leil yar dax eine bbeix har zaxr lol goxr a. Yel Moxrxi dder Yuesaexl ddei hherggar ddei vei dax si a.

<sup>20</sup> Yaa Suge mermi cirdae ssi a, hiebolpae qir leil Yirtar mermi ssi ci a, halmaex xixl dae a. <sup>21</sup> Yihexrhuaxr yaa xilmeir ssi dae a, eilnir-ggu nael, sseigu lesel zico mel yaa leil jjiumo hier; eilmerxixl nael, sseigu lesel adoxlle mel yaa leil jjiumo bbele lol. Eine nga a mel, yaa merxixl-merni lei ssi cexr. <sup>22</sup> Yihexrhuaxr eilnir-ggu nael sseigu lesel zico yaa leil hier dae lol, eilmerxixl nael sseigu lesel adoxlle yaa leil bbele lol, cirleixr lei nr nor yaa xilmeir yaa leil jjiumo hier dae lol.

### Neixvi Nilni Bbe Leil Gger

**14** <sup>1</sup> Yihexrhuaxr Moxrxi leil bbeix gger a bbeix: <sup>2</sup> “Ni Yirsaexllixl su ca mel leil miardal a doxdoxsi jjixr lol a, Birhaxiluxl zzi xilmeir, Mixldoxr zzi nei neixvi agala gga, Balixlxirfei zzi deixrgoxr neixvi qir dax naer dae ggie hher dae lol. <sup>3</sup> Faxrlar bbeix: ‘Yirsaexllixl su ca mel jjiumo zo wo nr xie a, hierbolpae gga ddux lei nr xie



a,' eine bbeix nia. <sup>4</sup> Ngo Faxrlar leil nixmox gex lol a, yar nia leil ggaxrmae lei nia. Ngo Faxrlar nei yar ddei meixr maelmaerjgia leil sser dae a, ngo leil middux lol a, Aezixr su ca mel dder ngo mel Yihexrhuaxr a saexl a," eine bbeix. Yel Yirsaexllixl su ca mel dder eilmel sael a bei a.

<sup>5</sup> Aezixr zzirmar ddei bbejjiur a bbeix: "Yirsaexllixl su ca mel pa du si a!" Faxrlar nei yar leil vissersu vaervaerpor mel yaa xiar dae mel gierbox a bbeix: "Niul Yirsaexllixl su ca mel leil ssi lol a, niul leil zeixleixr vi-nr-sser lol a, azo bei suax leir?" eine bbeix a. <sup>6</sup> Faxrlar zzirmar dder yar ddei zaxlddaexrddu marcae geso a, meixr mel leil hier dae a cirter a ssi a. <sup>7</sup> Yar tiur teixl lei zaxlddaexrddu marcae naxrcixl zzir hal qiuxlxiu jiaxl nei Aezixr goxrjia ddei kebal zaxlddaexrddu marcae maelmaerjgia leil hier dae, halae zaxlddaexrddu marcae mel leil guaxr su meixr vaervaerpor mel leil hier dae. <sup>8</sup> Yihexrhuaxr Aezixr zzirmar Faxrlar leil nixmox gex lol, yel Yirsaexllixl su ca mel nixmox vaervaermo Aezixr goxrjia ddux lei car, yar dder Yirsaexllixl su ca mel leil ggaxrmae ssi. <sup>9</sup> Aezixr su ca mel yaa leil ggaxrmae ssi a, Faxrlar ddei mur, zaxlddaexrddu marcae, mur zzaer su meixr nei meixr maelmaerjgia dder neixvi qir leil Birhaxiluxl zzi dax naer dae, Balixlxirfei zzi deixrgoxr yaa hher ggie halmaex ggaxrmae ci a.

<sup>10</sup> Faxrlar ssi naer ci niazzir dae car, Yirsaexllixl su ca mel i du lei a gie Aezixr su ca mel ggaxrmae lei ggie mia a dder yarzisael gexr a, Yihexrhuaxr leil qiuxr. <sup>11</sup> Yaa Moxrxi leil bbeix: "Holbbaexl Aezixr goxrjia lixrbbaex nr zza a, ni ngua leil hierbolpae gga hier mal lei a si zil dae lol a ngo? Ni arsaenga a ngua leil eine bei a, ngua leil Aezixr goxrjia hier teixl lei leir?" <sup>12</sup> Ngua Aezixr goxrjia hher dae a car: 'Holbbaexl ni leil ngua leil tor nr guaxr lei, ngua leil Aezixr su ca mel leil visser lol la,' bbeix nr goxr a ngo? Aezixr su ca mel leil visser a bir hierbolpae gga si zil dae mel leil seir." <sup>13</sup> Moxrxi ddarkoxl a bbeix: "Nia eilni mia dae Aezixr su ca mel leil zeixleixr lei mia nr ddo a. Yel nia gexr nr ssa. Nia ngier dae a, Yihexrhuaxr eilni nia leil arsae jiuxl bbe i ddo a. <sup>14</sup> Yihexrhuaxr nia leil weix a zaxlddaexr, nia arjjiuljjiu a hher dae lalssa."

<sup>15</sup> Yihexrhuaxr Moxrxi leil bbeix: “Ni arsaenga a ae dae a ngo dax qiuxr leir? Ni Yirsaexllixl su ca mel leil bbeix gger, yilzi a ssi. <sup>16</sup> Ni leixrhher ddei bil du lei a zzargger caex neixvi gga dor dae a, ajjix mel leil bbe kae gger, Yirsaexllixl su ca mel neixvi gga ze i a hieltebbor ssi nia. <sup>17</sup> Ngo mel Aezixr su ca mel leil nixmox gex lol a, yaa dder ze i mae dax nia, ngo Faxrlar nei yar ddei meixr maelmaerjjia, zaxlddaexrddu marcae, mur zzaer su meixr mel leil sser dae a ngo leil daxlgaxl-daxllixl middux lol nia. <sup>18</sup> Ngo Faxrlar nei yar ddei zaxlddaexrddu marcae, halae mur zzaer su meixr mel leil sser dae a ngo leil middux lol car, Aezixr su ca mel dder ngo mel Yihexrhuaxr a saexl a.”

<sup>19</sup> Yirsaexllixl su ca mel xilmeir ssi dae Arbosobo ddei Tisir ddei yaa giedae za xixl ci a. Sseigu lesel zico mel lei yaa xilmeir cirdae a yaa giedaebbaer za xixl ci a hher dae a. <sup>20</sup> Yel Aezixr su ca mel nei Yirsaexllixl su ca mel agala gga zico zza. Cir piar a nael neixmar, cir piar a nael bbele, cirxixl-lorbba zzicarzzi dax lei naer nr cexr.

<sup>21</sup> Moxrxi zzargger caex neixvi gga dor dae a, Yihexrhuaxr dder dofa piar a gga mersi vaervaermo cir xixl jia mal lei lol a, ajjix mel bbe kae a neixvi agala gga hieltebbor loxr a. <sup>22</sup> Yirsaexllixl su ca mel neixvi gga ze i a hieltebbor ssi, ajjix mel yaa ddei yo piar a nei vael piar a gga lu loxr a. <sup>23</sup> Aezixr su ca mel yaa leil ggaxrmae lei a, Faxrlar ddei mur, zaxlddaexrddu marcae nei mur zzaer su meixr maelmaerjjia lei yaa dax mae dae a, neixvi gga ze i ci a. <sup>24</sup> Merteir niazzir dae car, Yihexrhuaxr zico nei adoxl gga Aezixr su meixr mel leil i a, Aezixr goxrjia ddei meixr mel leil luaxl du lei lol. <sup>25</sup> Yoxl yaa ddei zaxlddaexrddu marcae luixrzi mel ddux si lol a, yarzi ssi sol lol. Aezixr su ca mel dder bbeix: “Yihexrhuaxr Yirsaexllixl su ca mel leil weix a niul leil ddaexr lei a; niul yaa meixsaer qir leil pa nia a!”

<sup>26</sup> Giedae Yihexrhuaxr Moxrxi leil bbeix: “Ni zzargger caex neixvi gga dor dae a, ajjix mel Aezixr su ca nei yaa ddei zaxlddaexrddu marcae, halae yaa mur zzaer su meixr mel leil mil hex lol.” <sup>27</sup> Moxrxi dder zzargger caex neixvi gga dor dae a, merteir a qie, ajjix mel dder zoxlzoxl sael a loxr a. Aezixr su ca mel ajjix gga pa teixl niazzir, nael Yihexrhuaxr yaa leil neixvi gga dder guirle gger a. <sup>28</sup> Ajjix

ddei doxdoxsi pe xil lei a, zaxlddaexrddu marcae nei mur zzaer dae meixr mel leil mil hex gger a. Yirsaexllixl su ca mel dax neixvi gga zeï mae su Faxrlar ddei meixr maelmaerjjia, cir ddei lei nr zza a. <sup>29</sup> Nael Yirsaexllixl su ca mel zzael, neixvi gga hieltebbor ssi dae. Ajjix mel yaa yo piar a nei vael piar a lu loxr a.

<sup>30</sup> Hal cir ni, Yihexrhuaxr eine bei a Yirsaexllixl su ca mel leil Aezixr su ca mel leixrga gga jjiuxl teixl lei a. Yaa Aezixr su ca sima mel neixvi qir leil guir dae ggie mia a. <sup>31</sup> Yaa Yihexrhuaxr Aezixr su ca mel leil ddoddomo bei dae mel leil mia a dder Yihexrhuaxr leil gexr yar leil i du, yoxl yar leil nei yar leil miar bei gger su Moxrxi leil ddarzzi.

### Moxrxi Ddei Caxlgo

**15** <sup>1</sup> Halcar, Moxrxi nei Yirsaexllixl su ca mel Yihexrhuaxr dax caxlgo caxl a bbeix: “

Yihexrhuaxr mel mu zzir ggie hher dae ddei nga a;  
yel ngo yar dax caxlgo caxl nia.

Yar mur nei mur zzaer su mel leil neixvi gga piar ji gger a.

<sup>2</sup> Yihexrhuaxr mel ngo leil worni lol su ddei nga a;  
ngo caxlgo caxl dae mel nga a;  
yar lei ngo leil jiuxlsu ddei loxr a.

Yar mel dder ngo ddei Arbosobo ddei nga a;  
ngo yar leil bbeixzae gger nia;  
ngabbor ddei Arbosobo ddei nga a;  
ngo yar leil i du nia.

<sup>3</sup> Yihexrhuaxr mel zaxlddaexr su a;  
yar ddei mi ddei mel Yihexrhuaxr a.

<sup>4</sup> Yar Faxrlar ddei zaxlddaexrddu marcae nei meixr mel leil neixvi gga piar ji gger a;  
Faxrlar tiur teixl lei meixr vaervaerpor mel lei neixvi nilni gga ddei ji dae a.

<sup>5</sup> Darneixlneixlmo ajjix mel yaa leil mil hex gger a;  
yaa legelbbe sael a darneixlneixl ggie ddei ji dae a.

<sup>6</sup> Yihexrhuaxr, ni leixrhher yo bbor ddoddomo bei a, ni leil middux lol;

Yihexrhuaxr, ni ddei leixrhher yo bbor ni leil vuxryixr su ca mel leil zax me gger.

<sup>7</sup> Ni sexrsexrmo ddoddomo bei a,  
ni leil dir su ca mel leil bei leixl gger;  
ni adoxl sael a larhorhormo seifu faex a,  
yaa leil bexlze mel sael a cu pixl gger.

<sup>8</sup> Ni noxlbbexsu gga seixl ddux lei a,  
ajjix mel dder hher pex du lei a;  
neixvi agala gga ajjix pe dae mel gextaextaexmo lu sael a loxr a.

<sup>9</sup> Ngua leil vuxryixr su ca mel bbeix:

‘Ngo ggaxrmae ssi a,  
ggaxrmae wo nia;  
ngo su si lei ca mel nei zzaegu mel bbe a,  
yaa ddei maelmaerjjia su jjia si lei nia.  
Ngo altor baex die teixl lei a,  
yaa leil seixl zil gger nia,’

bbaexl eine bbeix.

<sup>10</sup> Nael ni mersi jia lol a,  
neixvi ddei dder yaa leil mil hex gger;  
yaa he sael a  
ajjix vaervaer gga ddei ji dae a.

<sup>11</sup> Yihexrhuaxr, ca mel zi dae mel gga arseir ni sael a nga bbeixleir?

Arseir ni sael a seirceix-seirmaer bbobbolbbo zza,  
bbeixzae gger mibbe, gexr mibbe,  
murgurgurmo bei dae bbeixleir?

<sup>12</sup> Ni leixrhher yo bbor cei teixl lei a,  
middur ddei dder yaa leil ixl ji a.

<sup>13</sup> Ni ca mel leil perniar a seirseir meixl gger a,  
ni vae xixl lei ca mel leil hier dae;  
ni ddoddomo bei a,  
yaa leil ni hher ggie seirceix-seirmaer halmaex hier ci a.

<sup>14</sup> Yirsaexllixl su nr nga ca mel bbejjiur a dder lixlix-laexlaex mo go dae a;

Feilixlsixl su ca mel gexr zzae gexr zoxr zzae zoxrzixr.

<sup>15</sup> Yirido mermi vaervaerpor mel gexr zil du a;

Moxrya mermi vaervaerpor mel ceirceir-laexlaex go dae a;

Jianaxr mermi goxr dae ca maelmaerjjia nixmox taex lei gexr bbeir a.

<sup>16</sup> Yaa gexr milsi a.

Yihexrhuaxr, ni leixrhher ddei yarzi ddo/ser a,

yaa legelbbe sael a ha lei nr ha hher dae a,

ni ddei cassor-worssor mel ssi gel jjia zzezze ci,

ni vae xixl lei cassor-worssor mel ssi gel jjia zzezze ci.

<sup>17</sup> Seirpor Yihexrhuaxr, ni yaa leil hier dil a,

ni ddei worga ga leil hher dae lol nia,

hherdder ni armael leil hher ggie bei gger dae maex gga nga a;

ni leixrhher gga zi teixl lei seirceix-seirmaer xie zzir nga a.

<sup>18</sup> Yihexrhuaxr ardolcar ci a lei zzirmar bei nia.”

### Mirlixl'axl Ddei Caxlgo

<sup>19</sup> Faxrlar ddei mur, zaxlddaexrddu marcae nei mur zzaer su meixr mel neixvi gga ssi zeir ci a,

Yihexrhuaxr neixvi gga ajjix mel doxdoxsi pe xixl lei lol a, yaa leil mil hex lol;

Yirsaexllixl su ca mel nael neixvi gga hieltebbor ssi dae.

<sup>20</sup> Yalluixr yardaxl xiezi Mirlixl'axl leixrhher gga surgu vei dae, ssormaer maelmaerjjia lei yar dax cirter a ddux a surgu vei dae a huade tiuxl. <sup>21</sup> Mirlixl'axl caxl dae a bbeix:

“Yihexrhuaxr mel mu zzir ggie hher dae ddei nga a;

yar mur nei mur zzaer su ca mel leil neixvi gga piar ji gger a; yel nia yar leil caxl zae gger nia.”

## Ajjix Kar Mel Civilvil Loxr

<sup>22</sup> Moxrxi Yirsaexllixl su ca mel leil hier dae a neixvi nilni bbe dax cirdae a xilmeir ssi a, Su'aer hierbolpae gga ssi ci a. Yaa hierbolpae gga so ni ssi a lei, ajjix zo wo nr xie. <sup>23</sup> Marla mermi ssi ci a, halmaex ddei ajjix mel dda nr cexr. Ajjix mel kar a, middei hal ddei leil dder "Marla" ae. <sup>24</sup> Cassor-worssor mel dder Moxrxi leil boxyox a bbeix: "Ngua azo dda bbeixleir?" <sup>25</sup> Moxrxi Yihexrhuaxr leil qiuxr a, Yihexrhuaxr yar leil sixzzei ar zzei i lol a. Yar sixzzei zzei ajjix gga piar ji gger a, ajjix ddei dder civilvil loxr a.<sup>t</sup>

Yihexrhuaxr halmaex gga yaa leil lixfaxr nei miardal dae ddei dixl gger, halmaex gga yaa leil sixr i. <sup>26</sup> Yihexrhuaxr yoxl bbeix: "Ni, ni ddei Arbosobo Yihexrhuaxr ddei ddar seirseir a noni, yoxl ngo meixddur gga i dae a seirseir mel bei, ngo miardal dae mel seirseir a noni, ngo ddei lixfaxr maelmaerjjia dax bei mae dae arddeirnga a, ngo dder Aezixr su ca mel leil no lol dae no ha zza lei ni ggecir leil nr ddeix lol. Ngo mel ni leil no i kor gger su Yihexrhuaxr ddei nga a."

<sup>27</sup> Giedae yaa Yirlixr mermi ssi ci a. Halmaex gga lur ceinir gur ddux dae, mixlzar zzei sircei zzei ner dae. Yaa dder halmaex gga ajjix qir leil hher dae a.

## Marnaxr Nei Jiux

**16** <sup>1</sup> Yirsaexllixl su ca maelmaerjjia Yirlixr mermi cirdae ssi a, Aezixr goxrjia ddux lei ho nr xiubbo ddei gga ceingor cir ni, Yirlixr mermi nei Xinaer mermi agala gga Xuxl ae hierbolpae gga ssi ci a. <sup>2</sup> Yirsaexllixl su ca maelmaerjjia hierbolpae gga Moxrxi nei Yalluixr leil boxyox a <sup>3</sup> bbeix: "Ngua arddolcirsil dder Aezixr goxrjia gga Yihexrhuaxr leixrga gga si bbaexl seir a! Halcar ngua hor allur dax cux dae a, zzo zzor a zzor bbox ddo. Nia zzael ngua leil hier teixl lei a, hierbolpae eilmaex gga hier ci a, ngua maelmaerjjia leil meixr zil lol niazzir dae a ngo!"

<sup>t</sup>15:25 civilvil loxr a Yilsi ddei mel dder nr kar a, dda cexr a.

<sup>4</sup> Yihexrhuaxr Moxrxi leil bbeix: “I ddo a! Ngo nia leil merlabbor zzorddu lei ze gger lei du a. Cassor-worssor mel ddux a, cir ni zzor meirne mel cir ni ggux a, ngo dder yaa ngo ddei lixfaxr nonini bbe sixr i cexr. <sup>5</sup> Qiuxl ni cir ni ci a, yaa ggux si lei mel bei har zaxr dae nia, bir bbe cir ni leil cir peix ggux wo miur leixl nia.” <sup>6</sup> Giedae Moxrxi nei Yalluixr Yirsaexllixl su ca maelmaerjjia leil bbeix: “Mercixl a, nia, nia leil Aezixr goxrjia gga hier teixl lei su ddei mel Yihexrhuaxr a saexl nia. <sup>7</sup> Yihexrhuaxr nia yar dax boxyox dae mel leil bbejjiur a, eilneixrnehe ci a, nia Yihexrhuaxr ddei bbobbolbbo mel leil mia nia. Ngua azo suax bbeixleir, nia halae ngua leil boxyox leir?” <sup>8</sup> Moxrxi yoxl bbeix: “Nia Yihexrhuaxr dax boxyox dae mel, yar bbejjiur a. Yel Yihexrhuaxr mercixl a nia leil hor zol nia, eilneixrnehe nia leil zzorddu zzor bbox lol nia. Ngua azo suax bbeixleir? Nia mel ngua leil boxyox nr nga a nei, Arbosobo leil boxyox arddeir a.”

<sup>9</sup> Moxrxi Yalluixr leil bbeix: “Ni Yirsaexllixl su ca maelmaerjjia leil bbeix: ‘Yihexrhuaxr nia boxyox dae mel leil bbejjiur ho a. Yel nia yar meixsaer qir leil ssi naer ssi,’ ” eine bbeix nia. <sup>10</sup> Yalluixr Yirsaexllixl su ca maelmaerjjia leil bbeix gger dae car, yaa hierbolpae gga i mal a, xiar lei xiar nr ci, Yihexrhuaxr ddei bbobbolbbo mel zico mel gga mia ddo. <sup>11</sup> Yihexrhuaxr Moxrxi leil bbeix gger a bbeix: <sup>12</sup> “Ngo Yirsaexllixl su ca mel boxyox dae mel leil bbejjiur a. Ni yaa leil bbeix gger a bbeix: “\*\*Mercixl a nia hor zzor nia, eilneixrnehe zzorddu zzor bbox ddu zza nia. Eine nga a, nia dder ngo mel nia ddei Arbosobo Yihexrhuaxr a saexl a.’ ”

<sup>13</sup> Mercixl a, jiux bbiu mal lei a, yaa hher ggie bbiu mix jjia a; eilneixrnehe, yaa hher ggie zzazza-lili middur mel leil zil ddar deix dae. <sup>14</sup> Zil mel zzi ho a, xiar lei xiar nr ci, hierbolpae gga middur leil nixpiu sael a yelye arla bbolbbormo ar mel zza dae. <sup>15</sup> Yirsaexllixl su ca mel mia a, azo a nr saexl a dder zzicarzzi leil biex a bbeix: “Eimel arddolyox a leir?” Moxrxi yaa leil bbeix: “Eimel hherdder Yihexrhuaxr nia leil zzorddu gger dae mel nga a. <sup>16</sup> Yihexrhuaxr miardal dae ddar mel dder eine a: ca cirddei-hanga armael zzor dil ddo mel dax zox dae a, sur bei teixl lei xigex gga hher dae ca

mel leil ggux gger si lei; cir ddei nr goji.<sup>u</sup>” <sup>17</sup> Yirsaexllixl su ca mel dder eilmel sael a bei a; ggux miur su lei zza, ggux nganiul su lei zza. <sup>18</sup> Yaa sede ddei sser a hormo zza bbe i car, ggux wo miur su mel lei nir-nr-zzei, ggux wo nganiul su mel lei zzor loxr ddo. Ca arddol ddei lei armael zzor meirne dax zox dae a ggux. <sup>19</sup> Moxrxi yaa leil bbeix: “Ggux wo mel, arseir lei eilneixrnehe dol ci nr ddo.” <sup>20</sup> Nael cirmelmel a Moxrxi ddei ddar no-nr-ni, eilneixrnehe dol ci a dder bberzzi ddux lei a bbeirne a; Moxrxi dder yaa leil seifu faex a. <sup>21</sup> Yaa bbecir-nehe, armael zzor meirne mel dax zox dae a ggux, merni lexl du lei a zzorddu mel dder mier a.

<sup>22</sup> Qiuxl ni cir ni ci a, yaa zzorddu nr peix meirne ggux a; ca cir ddei li goji. Cassor-worssor ddei vaervaerpor mel lei a Moxrxi leil bbeix gger lei. <sup>23</sup> Moxrxi yaa leil bbeix: “Yihexrhuaxr bbeix: ‘Arggeni mel wornol nixixl a; kebal nixixl dax bbe teixl lei a, Yihexrhuaxr ddei loxr lol a. Nia kal labox mel nael kal nia, zeixl labox mel nael zeixl nia, nirzzei dae maelmaerjgia lei arggenehe dol ci,’ ” eine bbeix a. <sup>24</sup> Yaa dder Moxrxi miardal dae mel dax zox dae a eilneixrnehe dol ci a; bbeir lei bbeir-nr-ne, bberzzi lei nr zza. <sup>25</sup> Moxrxi bbeix: “Nia eilni eilmel zzor ddo a. Eilni mel Yihexrhuaxr ddei wornol nixixl a, yel nia mi gga zo wo nr ddo a. <sup>26</sup> Nia qiuxl ni ggux cexr; sir ni cir ni nael wornol nixixl a, hal cir ni nr zza a.” <sup>27</sup> Sir ni cir ni, cassor-worssor mel gga ca ar mel a ddux a ggux ssi, nael azo lei zo nr wo. <sup>28</sup> Yihexrhuaxr Moxrxi leil bbeix: “Nia ngo miardal dae mel dax nei lixfaxr mel dax bei mae nr yuex a arddolcar ci niazzir dae neil? <sup>29</sup> I ddo a! Ngo wornol nixixl cir ni nia leil gger a; yel qiuxl ni cir ni ngo nia leil nr ni ddei zzorddu gger a. Sir ni cir ni armael ddei hher ggie hher dae nia, ca cir ddei lei ddux nr ddo,” eine bbeix a. <sup>30</sup> Yel cassor-worssor mel sir ni cir ni wornol a.

<sup>31</sup> Zzorddu eilmel Yirsaexllixl su ca mel ‘marnaxr’ ae. I dae a yexrsuixl sil lesel, yixrsaexr ddei nael piulpiu; zzor car nael bbiurvi ji dae aba bborvivi mel sael a nga. <sup>32</sup> Moxrxi bbeix: “Yihexrhuaxr miardal dae ddar mel eine a: Marnaxr nr goji vei du dae a, ca cirzeix-hanga

<sup>u</sup>16:16 nr goji Nr goji ddei mel ddorbax gga gulubbebbe nr ddorbax sael zza.



dax dol ci a, yaa leil ngo halleix nia leil Aezixr goxrjia gga hier teixl lei a, hierbolpae gga nia leil zzor lol zzorddu mel leil mia lol cexr.”<sup>33</sup> Moxrxi mel Yalluixr leil bbeix: “Ode ar taex vei si la a, marnaxr nr goji ji a, Yihexrhuaxr meixsaer qir leil dol dae a, ca cirzeix-hanga dax dol ci nia.”<sup>34</sup> Yihexrhuaxr Moxrxi leil arsae miardal, Yalluixr dder arsae bei a, marnaxr mel \*\*yueguixl xilmeir dol dae a.<sup>35</sup> Yirsaexllixl su ca mel marnaxr licei koxl zzor a, yaa Jianaxr mermi yarqir leil ssi ci hane zzezze zzor ci a.<sup>36</sup> Nr goji ddei mel dder halleix zzaegu liaxr dae exrmeixraer ddei cei fel gga ar fel miu zza.

### Moxrxi Legelbbe Taex Leil Deil A Ajjix Ddux Lei

**17**<sup>1</sup> Yirsaexllixl su ca maelmaerjia lei Yihexrhuaxr miardal dae mel dax zoxr dae a, Xuxl ae hierbolpae gga cirdae a cirmaex-cirmaex ssi gel a, xilmeirbbaer ssi mal. Yaa Lixlfeidixl mermi ssi ci a, halmaex hher dae. Nael, cassor-worssor mel ajjix ddaddu nr zza.<sup>2</sup> Yel Moxrxi dax zex a bbeix: “Ngua leil ajjix dda lol ddo a!” Moxrxi yaa leil bbeix: “Nia arsaenga a ngo dax zex? Arsaenga a Yihexrhuaxr leil sixr i neil?”<sup>3</sup> Nael cassor-worssor mel halmaex gga ajjix sixl a, ajjix dda niazzir a dder Moxrxi leil boxyox a bbeix: “Ni arsaenga a ngua leil Aezixr goxrjia hier teixl lei a, ngua nei ngua ddei ssormine, halae zzeir mel leil lei sixl zil lol leir?”<sup>4</sup> Moxrxi dder Yihexrhuaxr leil ae dae a qiuxr a bbeix: “Ngo cassor-worssor eil-mel dax arsae bei nia neil? Yaa legelbbe vei a ngo leil zax zil gger nrsulsul.”<sup>5</sup> Yihexrhuaxr Moxrxi leil bbeix: “Ni leixrhher gga halleix Nixrloxr lazzarmo leil deil goxr zzargger caex vei dae a, Yirsaexllixl su ddei ca leil guaxr su camar nrnelsael hier dae a, cassor-worssor mel meixsaer qir leil ssi gel nia.<sup>6</sup> I ddo a! Ngo Hexrlixl worga halmaex legelbbe taex dax ni xilmeir ngier dae. Ni legelbbe taex leil deil a, legelbbe taex gga ajjix pe teixl lei a, cassor-worssor mel leil dda lol cexr.” Moxrxi dder Yirsaexllixl su ca mel ddei ca leil guaxr su camar mel meixsaer qir leil eine bei a.<sup>7</sup> Yirsaexllixl su ca mel Moxrxi dax zex, yoxl Yihexrhuaxr leil sixr i a bbeix: “Yihexrhuaxr

niul dax hher daxdax dae leir?” eine bbeix. Yel yar middei hal ddei leil Marsar<sup>v</sup> mi gger, yoxl Mirlixlba<sup>w</sup> ae.

### Yaxlmarlixl Su Ca Mel Dax Zaxlddaexr

<sup>8</sup> Halcar, Yalmarlixl su ca mel Lixlfeidixl mermi lei a, Yirsaexllixl su ca mel dax zaxlddaexr. <sup>9</sup> Moxrxi Yuesuyal leil bbeix: “Ni niul leil capor ar ke tiur teixl gger lei a, ddux a Yalmarlixl su ca mel dax zaxlddaexr ssi nia. Arggeni ngo Arbosobo ddei zzargger caex vei dae a, worga oldde leil ngier dae nia.” <sup>10</sup> Yel Yuesuyal dder Moxrxi yar leil bbeix dae mel sael a bei a, Yalmarlixl su ca mel dax zaxlddaexr. Moxrxi, Yalluixr nei Hul'aer lei worga oldde leil ddeix a. <sup>11</sup> Moxrxi arddolcar leixrhher zze bil du lei, Yirsaexllixl su ca mel dder ddaexr leixl; arddolcar leixrhher zze piur zei xixl, Yalmarlixl su ca mel dder ddaexr leixl. <sup>12</sup> Nael Moxrxi leixrhher zze bil sixl a, yaa dder legelbbe bbax si lei a, yar woxrke dol gger a, yar dder cux deix dae a. Yalluixr nei Hul'aer nael yar leixrhher leil zar gex dae, cir ddei a nael eilpiar a gga hher dae, cir ddei a nael halpiar a gga hher dae; yar ddei leixrhher zze dder vever a merni lal zzezze bil ci a. <sup>13</sup> Yuesuyal altor sser a, Yalmarlixl su ddei zzirmar ddei leil nei yar ddei cassor-worssor mel leil deil leixl gger a.

<sup>14</sup> Yihexrhuaxr Moxrxi leil bbeix: “Ngo Yalmarlixl su ca mel leil mer woxrke mier gaxzi lol nia. Yel ni eil ddei vaexr deix a holcir dae nia, yoxl Yuesuyal leil zza gger nia.” <sup>15</sup> Moxrxi Arbosobo leil ziggie ar ddei bei a. Ziggie ddei leil “Yihexrhuaxr Nixrxi”<sup>x</sup> eine mi gger. <sup>16</sup> Moxrxi yoxl bbeix: “Yalmarlixl su ca mel Yihexrhuaxr leil dir a, yel yar yaa cirzeix-hanga dax zaxlddaexr.”

### Yeltexlloxr Moxrxi Leil I Lei

**18** <sup>1</sup> Moxrxi ddei yoxrpor Mirdixl su Arbosobo leil zi su Yeltexlloxr mel, Arbosobo Moxrxi nei yar ddei cassor-worssor Yir-

<sup>v</sup>17:7 Marsar Marsar ddei yilsi mel dder sixr i.

<sup>w</sup>17:7 Mirlixlba Mirlixlba ddei yilsi mel dder zex.

<sup>x</sup>17:15 Nixrxi “Nixrxi” ddei yilsi mel dder “jixr”. “Jixr” ddei yilsi nael, “zaxlddaexr leixl a bil dae mae co.”

saexllixl su ca mel leil weix a bei dae hazza leil bbejjiur, hherdder Yihexrhuaxr Yirsaexllixl su ca mel leil Aezixr goxrjia hier teixl lei mel leil bbejjiur a.

<sup>2-3</sup> Halleix Moxrxi yar maerssor Xipola nei yar ssor nnel leil yar yoxrpor dax jjixr lol a, yel yar yaa leil guaxr dae a. Halleix Moxrxi bbeix: “Ngo kebal mermi ngol hher dae,” eine bbeix a, yel ssor cir ddei leil a nael, Gexrsuixl mi. <sup>4</sup> Yar yoxl bbeix: “Ngabor ddei Arbosobo ngo leil beijjiu a, ngo leil Faxrlar ddei altor dax jiuxl teixl lei,” eine bbeix a, yel ssor cir ddei leil a nael, Yirlixlyirxixl mi.

<sup>5</sup> Moxrxi yoxrpor Moxrxi ddei maerssor nei ssor nnel leil hier dae a, Arbosobo ddei worga leil lei a, Moxrxi hher ggie hierbolpae ssi ci a. <sup>6</sup> Yeltexlloxr ca leil miardal a Moxrxi leil bbeix gger lol a bbeix: “Ni yoxrpor Yeltexlloxr ni leil i lei a; ni ddei maerssor nei anix nnel lei cirgo a lei a.” <sup>7</sup> Yel Moxrxi ddux lei a yar yoxrpor leil zi lei, yar leil cizixl gger a, yar leil jiuxl. Yaa zzicarzzi leil seirseir dae biex ho a, cirgo a sur bei teixl lei xigex gga ddir a. <sup>8</sup> Moxrxi Yihexrhuaxr Yirsaexllixl su ca mel leil weix a, Faxrlar nei Aezixr su ca mel leil bei dae hazza, nei jjiumo car gga cirza-hanga goxrsol-goxrnar pex dae mel, halae Yihexrhuaxr yaa leil arsae jiuxl maelmaerjgia lei yar yoxrpor leil biar gger a. <sup>9</sup> Yeltexlloxr mel Yihexrhuaxr Yirsaexllixl su ca mel leil seirseir bei gger a, yaa leil Aezixr su ca mel leixrga gga jiuxl teixl lei a bbejjiur a dder yarzi ggese.

<sup>10</sup> Yeltexlloxr bbeix: “Yihexrhuaxr leil bbeixzae gger mibbe. Yar nia leil Aezixr su ca mel dax nei Faxrlar leixrga gga jiuxl teixl lei. Yar mel cassor-worssor eilmel leil Aezixr su ca mel leixrga gga jiuxl teixl lei su ddei nga a. <sup>11</sup> Ngo eilcar Aezixr su ca mel Yirsaexllixl su ca mel dax colcolmo bei dae hal mel leil mia a, ngo dder Yihexrhuaxr mel bir ca mel zi dae maelmaerjgia leil lei vaer leixl saexl a,” eine bbeix a. <sup>12</sup> Yel Moxrxi yoxrpor Yeltexlloxr dder adoxl gga cu a ziddu nei kebal ziddu mel Arbosobo leil zi. Yalluixr nei Yirsaexllixl su ca mel leil guaxr su camar mel lei lei a, Moxrxi yoxrpor dax cirgo a Arbosobo meixsaer qir leil aba zzor.

## Vaervaerpor Tiur

<sup>13</sup> Giedae cir ni, Moxrxi cux dae a cassor-worssor mel leil ser. Cassor-worssor mel eilneixrnehe cirdae a, mercixl zzeze ci a lei, Moxrxi dax ngier dae. <sup>14</sup> Moxrxi yoxrpor yar cassor-worssor mel dax eine bei ggie mia a dder bbeix: “Ni cassor-worssor mel dax azo bei suax leir? Ni arsaenga a cirmuzil cux dae leir? Cassor-worssor mel zzael eilneixrnehe cirdae a mercixl zzeze ci a lei, ni dax ngier doxr dae.” <sup>15</sup> Moxrxi yar yoxrpor leil bbeix: “Cassor-worssor mel ngo dax lei a, Arbosobo leil biex lei a nga arddeir a. <sup>16</sup> Yaa azo ler pex dae car dder ngo dax eilmaex lei, ngo dder yaa nr piar jjia leil ser; ngo yoxl yaa leil Arbosobo ddei lixfaxr mel nei yar mul gger dae mel saexl lol.” <sup>17</sup> Moxrxi yoxrpor bbeix: “Ni eine bei a nr seir. <sup>18</sup> Ni nei cassor-worssor eilmel arsaebeilei bei le var. Miar eil ddei yarzi lir, yel ni cirmuzil a nga a bei zei lei nr ddo. <sup>19</sup> Eilcar, ni ngo ddei ddar noni dae nia. Ngo ni leil zuxryix ar ddei ddux gger. Arbosobo ni dax hher dax dae lol nia. Ni cassor-worssor mel ddei dirtu bei a Arbosobo meixsaer qir leil lei a, ser labox mel Arbosobo leil bbeix gger. <sup>20</sup> Yoxl Arbosobo ddei lixfaxr mel neil miardal dae mel yaa leil bbeix gger, yaa leil yaa jjiumo ssi labox zex nei miar bei labox mel mul gger. <sup>21</sup> Halae cassor-worssor mel gga bbesur zza-zza mo ca ar mel leil tiur nia, hherdder Arbosobo leil gexr, ddarjia nr te, nrbba-nrbba bei a li wo zzirbae mel leil vuxryixr su ca hal mel nga a. Yaa leil miardal a ca cirdumo guaxr su, cirxiuler guaxr su, ngorceimo guaxr su, ceimo guaxr su bei a cassor-worssor leil guaxr lol. <sup>22</sup> Yaa leil arddolcar lei cassor-worssor mel leil ser lol. Ser labox vaervaer maelmaerjjia ni dax vei mal lei nia. Ser labox yelye mel nael, yaa armael ser cexr. Eine nga a, yaa ni dax cirgo a miar eil ddei bei a, ni dder ardoxr sokor a. <sup>23</sup> Ni eine bei, Arbosobo lei ni leil eine miardal arddeirnga a, ni dder bei ssi xie a; halae cassor-worssor eilmel lei zzazza-soso a, yaa hher ggie jjixr.

<sup>24</sup> Yel Moxrxi dder yar yoxrpor ddei ddar mel noni a, yar bbeix dae mel sael a bei a. <sup>25</sup> Moxrxi Yirsaexllixl su ca mel gga bbesur zza su ca mel leil tiur teixl lei a, yaa leil cassor-worssor mel ddei vaervaer-

por bei lol, cirdumo guaxr su, cirxiuler guaxr su, ngorceimo guaxr su, ceimo guaxr su bei lol. <sup>26</sup> Yaa arddolcar lei cassor-worssor mel leil ser. Ser sol hal mel nael, Moxrxi dax vei mal; ser labox yelye mel nael, yaa armael ser.

<sup>27</sup> Giedae Moxrxi yar yoxrpor leil ssi lol a, yar dder yar mermi jjixr a. Reread

### Yirsaexllixl Su Ca Mel Xinaer Worga Leil Hher Dae

**19** <sup>1</sup> Yirsaexllixl su ca mel Aezixr goxrjia ddux lei ho a, so xiubbo gga ddir hal cir ni malmal dder Xinaer hierbolpae gga ssi ci a. <sup>2</sup> Yaa Lixlfeidixl mermi dax ddux lei a, Xinaer hierbolpae gga ssi ci a dder halmaex gga worjibbei ddei leil hher dae a. <sup>3</sup> Moxrxi Arbosobo dax halmaex ddeix ci a. Yihexrhuaxr worga ga leil yar leil ae a bbeix: “Ni Yargel hhexr leil hherdder Yirsaexllixl su ca mel leil bbeix gger a bbeix: <sup>4</sup> ‘Ngo Aezixr su ca mel leil bei dae hazza, nia lei mia a; halae ngo zzemar sael a nia leil ddoleixr ddei leil bber deix dae a, nia leil ngo dax eilmaex hier xixl lei mia a. <sup>5</sup> Eilboxl, nia yarzi ngo ddei ddar noni, ngo bbeixharzaxr dae mel dax bei mae arddeirnga a dder middurbbor circuxr-hanga gga ngo ddei cassor-worssor bei nia. Middurbbor maelmaerjjia lei ngo ddei a. <sup>6</sup> Nia mel ngo leil zi su bei nia, kebal ca dax bbe teixl lei a, ngo ddei cassor-worssor bei nia.’ Ddar eilmel ni Yirsaexllixl su ca mel leil bbeix gger nia,” eine bbeix a.

<sup>7</sup> Yel Moxrxi ssi a cassor-worssor mel ddei ca leil guaxr su camar mel leil ae si lei a, yaa meixsaer qir leil Yihexrhuaxr yar leil miardal dae ddar hazza yaa leil bbeix gger a. <sup>8</sup> Cassor-worssor mel maelmaerjjia cirter a ddarkoxl a bbeix: “Ha Yihexrhuaxr bbeix dae mel, ngua maelmaerjjia lei noni nia.” Moxrxi dder cassor-worssor mel ddei ddar mel Yihexrhuaxr leil bbeix gger a. <sup>9</sup> Yihexrhuaxr Moxrxi leil bbeix: “I ddo a! Ngo zico tultu mel gga ni dax halmaex zei lei a, cassor-worssor mel leil ngo ni dax ddar biar dae car bbejjiur lol a, yaa lei cirse-cirsil ni leil ddarzzi var.” Yel Moxrxi cassor-worssor mel ddei ddar mel Yihexrhuaxr leil bbeix gger a.

<sup>10</sup> Yihexrhuaxr yoxl Moxrxi leil bbeix: “Ni cassor-worssor mel dax ssi, yaa leil eilni nei arggeni [\*\*\*ngo ddei lixfaxr dax zox dae a, armael ddei armael seibeixbeix a bei zaxr dae lol], yoxl yaa leil pia cir lol. <sup>11</sup> So ni cir ni, Yihexrhuaxr cassor-worssor mel meixsaer qir leil Xinaer worga ga leil zeil lei nia, yel so ni cir ni ci a bei har zaxr jjia nia. <sup>12</sup> Ni cassor-worssor mel leil worga zaza-lili arddolmaex zzeze lar ssi ci ddo dixl gger nia. Yoxl yaa leil bbeix: ‘Nia fadae nia, worga leil ddeix nr ddo, worga ddei zaza-lili leil lei ta nr ddo. Ha worga eil ga leil ta su mel, yar leil arsebeilei bei zil gger nia. <sup>13</sup> Leixr-hher ddei yar leil ta nr ddo, legelbbe sser a zax zil gger bbeixsael jir sser a ddaexr zil gger nia. Ca bbeixsael zzeir nga zzorbbeixlei, maelmaerjjia lei gol nr cexr. Cuxgexdaex mex a seirseil arcixl mex car saelnei yaa worjibbei dax lei ddo,’ ” eine bbeix a. <sup>14</sup> Moxrxi worga leil zeil a cassor-worssor mel dax halmaex ssi a, yaa leil \*\*[lixfaxr dax zox dae a, armael ddei armael seibeixbeix a bei zaxr dae lol]; halae yaa lei pia cir. <sup>15</sup> Yar cassor-worssor mel leil bbeix: “So ni cir ni ci a, bei har zaxr nia; ssormaer dax naer nr ddo,” eine bbeix a.

<sup>16</sup> So ni cir ni eilneixrnehe ci a, worga leil almer er dae, almer bbiexr dae nei zico gel mix dae, halae cuxgexdaex ddei vaervaermo me dae; yel yaa hher ggie hher dae cassor-worssor mel maelmaerjjia lixlix-laexlaex go dae a. <sup>17</sup> Giedae Moxrxi cassor-worssor mel leil yaa hher ggie hier teixl leil a, Arbosobo leil i ssi; maelmaerjjia lei worjibbei leil ngier dae. <sup>18</sup> Yihexrhuaxr adoxl gga Xinaer worga ga leil zeil lei a, worga cirga-lorbba alker sil dae a. Alker eilmel ngier cu ggie kersil-kerbbax sil teixl lei dae alker mel sael a nga; worga cirga-lorbba lelelle le du lei a. <sup>19</sup> Cuxgexdaex ddei ho me ho me vaer du lei a, Moxrxi dder ddar biar, Arbosobo [almer er] qiurte ddei yar leil ddarkoxl. <sup>20</sup> Yihexrhuaxr zeil lei a, Xinaer worga ollele leil hher dae. Yar Moxrxi leil ae a worga ollele leil ddeix lol a, Moxrxi dder ddeix a. <sup>21</sup> Yar Moxrxi leil bbeix: “Ni zeil a cassor-worssor mel leil bbeix gger ssi, ngo meixsaer qir leil gger lei a i lei nr ddo. Nr nga a, yaa ca cirke si var. <sup>22</sup> Yoxl ngo dax naer su ngo leil zi su mel leil [lixfaxr dax zox dae a, armael ddei armael leil seibeixbeix a bei

lol nia]. Nr nga a, ngo ddux lei a yaa leil seixl zil gger leilei,” eine bbeix a. <sup>23</sup> Moxrxi Yihexrhuaxr leil bbeix: “Ni ngua leil bbeix gger a bbeix: ‘Worga zaza-lili arddolmaex zzezze a ssi ci ddo dixl har a, worga eil ga leil kebal worga mel dax bbe teixl lei a, ni ddei loxr lol,’ eine bbeix goxr a. Yel cassor-worssor mel Xinaer worga leil ddeix nr cexr,” eine bbeix a. <sup>24</sup> Yihexrhuaxr yar leil bbeix: “Ni zei jjixr a, Yalluixr dax cirgo a ddeix lei. Ngo leil zi su mel nei cassor-worssor mel nael dixl har dae ggie gger lei a, ngo meixsaer qir leil ddeix lei nr ddo. Nr nga a, ngo ddux lei a yaa leil seixl zil gger leilei,” eine bbeix a. <sup>25</sup> Yel Moxrxi cassor-worssor mel dax zei jjixr a, yaa leil bbeix gger a.

### Arbosobo Miardal Dae Cei Tiuxr

**20** <sup>1</sup> Arbosobo jiasibbor ddar eilmel miardal a bbeix: <sup>2</sup> “Ngo mel ni ddei Arbosobo Yihexrhuaxr a. Ngo mel ni leil ni zebol mu ggie Aezixr goxrjia gga hier teixl lei su ddei nga a.

<sup>3</sup> Ngo leil nr nga a mel, ni ca mel zi dae mel leil li nr ddo.

<sup>4</sup> Armael leil merlabbor middurbbor nei middur zzar ajjix gga cirza-hanga ddei yoxryaxl mel sael a, ziddu bbex bei gger nr ddo. <sup>5</sup> Ngo mel ni ddei Arbosobo Yihexrhuaxr a. Ngo mel ca mel zi dae mel leil nixnox Arbosobo a. Yel ni bbex mel leil olddetexl nr ddo, visser nr ddo. Ngo leil vuxryixr su mel leil mel, arbbor zuixl bei a, arbbor leil cirdae faxr a ssor mel leil so li zeix zzezze faxr ci nia. <sup>6</sup> Nael ngo leil perniar su, ngo miardal dae mel dax bei mae su mel, ngo yaa leil perniar a seirseir meixl gger a cirdu zeix zzezze ci nia.

<sup>7</sup> Ha ngo ddei mi ddei leil nrbbba-nrbbba sser su ca ddei, ngo yar leil zuixl nr zza i mal gger nr var. Yel ni ddei Arbosobo Yihexrhuaxr ddei mi ddei leil nrbbba-nrbbba sser nr ddo.

<sup>8</sup> Wornol nixixl cir ni leil holcir dae nia. Hal cir ni kebal hal qiuxl ni dax bbe teixl lei nia. <sup>9-11</sup> Yihexrhuaxr qiuxl ni ddei gga merlo-milo neixvi nei hazza-hamaer mel coxl a. Sir ni cir ni nael wornol a. Yel yar wornol nixixl cir ni leil seir lol a, kebal qiuxl [ni dax ciryoxr nr nga lol, yar ddei loxr lol]. Yel qiuxl

ni jjia lei, ni beilabox miar maelmaerjjia bei nia. Sir ni cir ni nael, ni ni ddei Arbosobo Yihexrhuaxr dax wornol nixixl cir ni a. Hal cir ni gga ni nei ni ddei ssormine, zebol, zzeir, halae ni ddei zzi gga ngol hher dae ca mel, azo miar lei bei nr ddo.

<sup>12</sup> Arbbor ama leil i du nia, perniar nia. Eine nga a, ni dder Arbosobo Yihexrhuaxr ni leil gger dae middei ddei gga olga si cexr.

<sup>13</sup> Ca seixl nr ddo.

<sup>14</sup> Kerjiar nr ddo.

<sup>15</sup> Ker nr ddo.

<sup>16</sup> Nga-nr-zi mel bbeix a si leil ke ssi nr ddo.

<sup>17</sup> Ca mel ddei xi leil tuxr nr ddo; ca ddei maerssor, zebol, niur, tarlodaex, halae yar hazza leil lei tuxr nr ddo,”  
eil mel maelmaerjjia lei Arbosobo miardal a.

### Cassor-worssor Mel Gexr

<sup>18</sup> Cassor-worssor maelmaerjjia almer er dae nei cuxgexdaex mex dae bbejjiur, almer bbiexr nei wordabbor alker sil teixl lei mel leil mia a dder gexr a lixlix-laexlaex mo vimirmir ngier dae a, <sup>19</sup> Moxr-xi leil bbeix: “Ni leil qiuxr, ngua dax ddar biar la, ngua arsaebeilei noni. Arbosobo leil ngua dax ddar tor nr biar lol; nr nga a, ngua si leilei.” <sup>20</sup> Moxrxi cassor-worssor mel leil bbeix: “Gexr nr ssa. Arbosobo zei lei a, nia leil sixr i lei a, nia leil yar leil gexr lol i du lol a mel, nia leil zuixl nr bei lol arddeir a.” <sup>21</sup> Moxrxi Arbosobo hher ggie zico tultu mel dax ssi naer ci car a, cassor-worssor mel vimirmir ngier dae.

### Arbosobo Leil Ziggie

<sup>22</sup> Yihexrhuaxr Moxrxi leil bbeix: “Ni Yirsaexllixl su ca mel dax eiane bbeix nia: ‘Nia ngo merlabbor gga nia dax ddar biar ggie mia a.

<sup>23</sup> Ngo leil nr nga a mel, kebal leil zi nr ddo; piu bbeixsael sae sser a, armael leil bbex bei gger nr ddo.’

<sup>24</sup> Ni nilhar sser a ngo leil ziggie ar ddei bei gger nia. Halmaex gga niur nei acixl ya sser a adoxl gga cu a ngo leil zi nei zzaso lol qiuxr a



ngo leil zi. Ngo, ngo ni leil ngo leil zi lol ggie cirmaex-hanga gga lei a, ni leil seir lol nia. <sup>25</sup> Ni legelbbe sser a ngo leil ziggie ar ddei bei gger arddeirnga a, ddaexr goxr legelbbe mel sser nr ddo. Ni legelbbe ddaexrlabox sser a mel, ngo leil zi ggie [bei nr cexr a/ddei leil bei naex gger a]. <sup>26</sup> Ni ngo leil zi ggie ddei teixrzi zza bei nr ddo. Nr nga a ni teixrzi leil ddeix car, ggecir jiasibbor zeixl yox teixl leilei.”

**21** <sup>1</sup> “Ni Yirsaexllixl su ca mel leil jiasibbor miardal dae eimel bbeix gger nia:

### Zebol Leil Arsae Nga Nia Miardal

<sup>2</sup> Ni Xiboxrlaexr su ca<sup>y</sup> ar ddei leil vae si lei a, ni ddei zebol bei lol arddeirnga a, yar ni leil miar qiuxl koxl mu gger nia, sir koxl hal cir koxl nael armael lo zza a; azo per lei nr gger dder ssi cexr a. <sup>3</sup> Yar cirmuzil a lei arddeirnga a, yar dder cirmuzil a ssi cexr. Yar lei car, maerssor zza arddeirnga a nael, yar maerssor dder yar dax cirgo a ssi cexr. <sup>4</sup> Yar lei ho a, yar seirpor yar leil maerssor gger a, yar maerssor yar leil ssormine hier gger wo arddeirnga a, yar maerssor nei ssormine mel yar seirpor ddei a. Yar cirmuzil a ssi nia. <sup>5</sup> Zebol ddei zzalzzar a bbeix: ‘Ngo, ngo ddei seirpor, ngo ddei maerssor nei ngo ddei ssormine mel leil perniar, ngo armael lo zza nia nr zzir, ssi nia-nr-zzir.’ Eine bbeix arddeirnga a, <sup>6</sup> seirpor ddei dder yar leil ca leil ser su ddei dax hier mal nia, yar leil alddur peixl leil bbeixsael alddur kuakua ddei leil koxl dae a ngier dae lol nia. Yar seirpor ddei he teixvilvil mo ar baex sser a, yar nolba ddei leil ar su tu gger a, yar dder cirse-cirsil lei yar seirpor ddei leil visser nia.

<sup>7</sup> Ca mel armael ddei ssormaer leil vur a zebol bei ssi lol arddeirnga a, ssormaer zebol mel mel capor zebol mel sael a hane ddux nr cexr. <sup>8</sup> Seirpor ddei yar leil tiur a armael ddei ca loxr lol, giedae yoxl yar leil li-nr-zoxr arddeirnga a, yarbbor leil yar leil vae xixl si lol nia. Seirpor ddei yar dax bbeix goxr mel sael a nr bei a, yel dder yar leil kebal mermi su ca mel leil vur gger quexrlixl nr zza. <sup>9</sup> Seirpor ddei yar leil tiur teixl lei a, yar ssor leil gger arddeirnga a, yar leil

<sup>y</sup>21:2 Xiboxrlaexr su ca Xiboxrlaexr su ca mel hherdder Yirsaexllixl su ca nga a.

dder armael ssormaer sael a nga nia. <sup>10</sup> Nael kebal maerssor bbeix box arddeirnga a, yar maerssor xilmeir hal ddei leil halleix sael a zzorddu veixrddu gger nia, halae yar dax xixl jjixr nia, cirdoxr lei nganiul lol nr ddo. <sup>11</sup> Yar capor ddei eil so yoxr nr bei arddeirnga a mel, yar dder vae xixl lei per gger nr ssa, ssi cexr.”

### Ca Leil Bei No Gger Su Leil Arsae Bei Nia

<sup>12</sup> “Ca leil deil a deil zil gger su ddei leil arsaebeilei yar leil bei zil gger nia. <sup>13</sup> Nael yar ca hal ddei leil dexryixl seixl nr nga, fa nr saexl a seixl zil gger lalnga arddeirnga a, yar dder ngo middei tiur dol dae halmaex gga pa mal cexr. <sup>14</sup> Nael arseir seirseir a xiar har ho a, si leil dexryixl seixl zil gger arddeirnga a, yar ngo leil ziggie halmaex pa mal ci zzorbbeixlei, yar leil gga teixl si a, bei zil gger nia.

<sup>15</sup> Arbbor ama leil deil su mel leil arsaebeilei bei zil gger nia.

<sup>16</sup> Ca leil ssu si a, ca hal ddei leil vur pixl gger bbeixsael yar dax hher dae zzorbbeixlei, arsaebeilei yar leil bei zil gger nia.

<sup>17</sup> Arbbor ama leil hie no su mel leil arsaebeilei bei zil gger nia.

<sup>18</sup> Ca mel zzicarzzi dax zex a, eil ddei leixrhher bbeixsael legelbbe sser a hal ddei leil deil a si nael nr si, nael yixrgguci ddei leil yixr dae a; <sup>19</sup> giedae yar zzargger dox dae a zalbbaer ddux a ssi dae var arddeirnga a, yar leil deil no gger su ddei leil dder nr faxr. Nael ca hal ddei mel yar miar bei nr var a dawo pixl dae worper mel yar leil peixr nia, halae yar leil i kor gaxzi gger nia.

<sup>20</sup> Arseir zzargger sser a, yar ddei zebol capor bbeixsael ssormaer mel leil deil a, deil zil gger arddeirnga a, arsaebeilei yar leil faxr nia.

<sup>21</sup> Cir nr ni goxr ho a lei gol dae seir arddeirnga a nael, yar leil dder faxr nr ssa a. Zebol eil ddei mel yar zzirbae sser a vae arddeir a.

<sup>22</sup> Ca mel zzicarzzi dax zex a, aniux niar su ssormaer ddei leil bei dae a, aniux ddei lei pixl a. Nael yar leil nael bei no nr gger arddeirnga a, yar leil bei no gger su ddei arsaebeilei ca leil ser su vaervaerpor mel duaxl gger dae ddei dax zox dae a yar capor li dae zzirbae mel gger nia. <sup>23</sup> Kebal bei no gger arddeirnga a, olga pixl a nael dder olga sser a dir nia. <sup>24</sup> Meixddur bei no gger a nael dder meixddur bei no xixl gger nia. Ser bei no gger a nael dder ser bei

no xixl gger nia. Leixrhher bei no gger a nael dder leixrhher bei no xixl gger nia. Qihher bei no gger a nael dder qihher bei no xixl gger nia, <sup>25</sup> Taxl no gger a nael dder taxl no xixl gger nia. Bei no gger a nael dder bei no xixl gger nia. Deil neix gger a nael dder deil neix xixl gger nia.

<sup>26</sup> Ca mel yar ddei zebol capor bbeixsael ssormaer leil meixddur ar bbor deil meixdae gger arddeirnga a, yar leil ssi lol nia. Yar leil ssi lol a mel, yar ddei meixddur bbor deil meixdae gger a nga arddeir a. <sup>27</sup> Yar ddei zebol capor bbeixsael ssormaer leil ser ar ci deil teixl gger arddeirnga a, yar leil ssi lol nia. Yar leil ssi lol a mel, yar ddei ser ar ci deil teixl gger a nga arddeir a.”

### Zzeir Mel Ca Leil Bei No Gger A, Arsae Peixr Nia

<sup>28</sup> “Niur ar ddei a capor bbeixsael ssormaer leil du zil gger arddeirnga a, niur hal ddei leil arsaebeilei legelbbe sser a zax zil gger nia, halae yar ddei hor mel zzor nr ddo. Niur seirpor ddei leil nael, nr faxr. <sup>29</sup> Niur hal ddei mel halleix tortor dder ca du lei, ca mel niur seirpor ddei leil zabbar-seilseir a neixl gex dae nia bbeix gger goxr a; nael yar niur ddei leil neixl nr gex dae a, niur ddei capor bbeixsael ssormaer leil du zil gger a mel dder legelbbe sser a niur ddei leil zax zil gger nia. Seirpor ddei leil lei bei zil gger nia. <sup>30</sup> Yar leil olga vae xixl lei per zzirbae faxr arddeirnga a, yar, yar leil faxr dae ddei dax zox dae a, yar olga ddei leil vae xixl lei nia. <sup>31</sup> Niur ddei ca mel ddei ssor bbeixsael ssormaer mel leil du zil gger zzorbbeixlei, miardal dae eil ddei dax zox dae a bei nia. <sup>32</sup> Niur ddei capor zebol bbeixsael ssormaer zebol leil du zil gger arddeirnga a, yaa seirpor ddei leil piu socei taex gger nia, halae legelbbe sser a niur ddei leil zax zil gger nia.

<sup>33</sup> Arseir lurddur ddei leil bbe gex dae ddei vei kae gger bbeixsael lurddur giexl a gga-nr-bil dae a, niur bbeixsael tarlodaex mel leil halmaex de ze i si arddeirnga a, <sup>34</sup> yar dder zzirbae sser a, zzeir ddei seirpor ddei leil peixr nia. Zzeir sima ddei nael, yar ddei nga a.

<sup>35</sup> Arseir ddei niur si ddei niur leil du zil gger arddeirnga a, niur gol dae ddei vur pixl a, zzirbae ddei cir hhexr ar peix li nia, niur sima ddei lei cir hhexr ar peix li nia. <sup>36</sup> Ca mel niur hal ddei halleix tortor dder si leil du leilei saexl, niur seirpor ddei zzael niur ddei leil neixl nr gex dae arddeirnga a, yar dder si leil niur peixr nia, niur sima ddei nael, yar li wo ddo.

### Arsae Peixr Nia Miardal Dae Mel

**22** <sup>1</sup> “Arseir niur bbeixsael acixl ya ker arddeirnga a, yar seixl zil gger bbeixsael vur pixl gger zzorbbeixlei, yar dder niur cir ddei ker a nael, ngorler peixr nia; acixl ya cir ddei ker a nael, liller peixr nia. <sup>2</sup> Arseir zzaexpor mel ake ddir a zzaegu ker ssi ggie mia a, zzaexpor ddei leil deil a, deil zil gger zzorbbeixlei, yar leil sirnilni ddux zuixl zza suax nr ddo. <sup>3</sup> Nael, merni taex ddux lei ho arddeirnga a, yar leil sirnilni ddux zuixl zza suax nia. Zzaexpor ddei leil ssu gex dae arddeirnga a nael, arsaebeilei peixr nia. Yar azo lei nr zza arddeirnga a mel dder yar leil vur pixl a yar ker si mel peixr nia. <sup>4</sup> Yar ker si lei mel, niur bbeixsael tarlodaex, bbeixsael acixl ya nga zzorbbeixlei, halae yar leixrga gga gol dae seir ggie mia arddeirnga a, yar dder nr peix meirne peixr nia.

<sup>5</sup> Arseir mi gga bbeixsael puxrto dae ggie zzeir loxl a, zzeir mel si ddei mi gga zzor ssi a lei nr guaxr arddeirnga a, yar dder arsaebeilei armael ddei mi gga loxlmoxr naxrcixl zzir mel nei puxrto naxrcixl zzir mel si leil peixr nia.

<sup>6</sup> Arseir alcur cu pixl car, adoxl ddei si ddei loxlmoxr caer ze i ho a cir kuir cir kuir ngier pex dae me leil, bbeixsael ner dae seir loxlmoxr mel leil, bbeixsael mi cirbbae-lorbba leil cu pixl gger arddeirnga a, adoxl no su ddei dder arsaebeilei si leil peixr nia.

<sup>7</sup> Arseir yar dax goxr naer dae ca ddei leil piu bbeixsael zzaegu dol bo dae a, eilmel ca hal hhexr ake gga ker si a, zzaexpor ddei leil ssu wo arddeirnga a, zzaexpor ddei dder nr peix peixr nia. <sup>8</sup> Zzaexpor ddei leil ssu nr wo arddeirnga a, ca hal hhexr ddei seirpor ddei dder \*\*ca leil ser su vaervaerpor ddei dax ssi a, yar yar dax goxr naer dae ca ddei dol bo dae hal mel ker ker a bbe i lol nia.

<sup>9</sup> Ca nnel a niur, tarlodaex, acixl ya, pia, bbeixsael azo zzaegu bei pixl mel leil weix a zzi dax zex a, cir ddei a bbeix: “Eil ddei mel ngo ddei a,” eine bbeix arddeirnga a, yaa nnel dder zzi dax zex dae mel casersu vaervaerpor ddei leil bbeix gger nia. Casersu vaervaerpor ddei arseir leil zuixl zza dixl gger a mel, arseir dder nr peix peixr nia.

<sup>10</sup> Arseir tarlodaex, niur, acixl ya bbeixsael kebal zzeir mel yar dax goxr naer dae ca mel leil i bo dae a, zzeir mel si bbeixsael bei no bbeixsael si ker ggaxr si a, ca mia su nr zza arddeirnga a mel, <sup>11</sup> i bo su ca hal ddei zzeir seirpor ddei leil “Yihexrhuaxr ngo leil i dae, ni ddei zzeir mel ngo ker nr goxr,” eine bbeix a, zzeir seirpor ddei dder yar leil ddarzzi nia, yar dder peixr nr ssa a. <sup>12</sup> Nael zzeir mel leil i bo su ca hal ddei leixrga gga ker si arddeirnga a, yar dder zzeir seirpor ddei leil peixr nia. <sup>13</sup> Cinil si lel si arddeirnga a, i bo su ddei dder si lel nirzwei dae mel vei xixl lei a, zzeir seirpor ddei leil i lol a, yar dder peixr nr ssa a.

<sup>14</sup> Arseir yar dax goxr naer dae ca mel dax azo ngol a, ngol si lei mel bei no bbeixsael si car, ngol gger su seirpor ddei cirgo a hher nr dax dae arddeirnga a, ngol su ddei dder arsaebeilei peixr nia. <sup>15</sup> Ngol gger su seirpor ddei cirgo a hher dax dae arddeirnga a, yar dder peixr nr ssa. Zu si lei arddeirnga a lei, yar \*\* zu per ddux goxr ho a peixr nr ssa.”

### Zzi Ca Zzi Leil Arsaе Nga Nia Miardal Dae Mel

<sup>16</sup> “Arseir capor dax naer nr goxr nei meixl nr goxr seir ssormaer-leixlssor mel leil fur a, yar dax naer lol arddeirnga a, yar dder arsaebeilei lilyixrqixr gger a ssormaer ddei leil bbeix a, yar maerssor bei lol nia. <sup>17</sup> Ssormaer yarbbor ddei ssormaer ddei leil yar leil fu gger nr yuex arddeirnga a, yar dder capor dax naer nr goxr ssormaer mel leil lilyixrqixr gger dae ddei dax zox dae a, zzirbae gger nia.

<sup>18</sup> Neir bei su ssormaer mel leil gol dae lol nr ddo.

<sup>19</sup> Ha zzeir dax \*\* [nrbbba-nrbbba bei/buxlguaxr-laxlsixr bei] su mel leil dder arsaebeilei bei zil gger nia.

<sup>20</sup> Yihexrhuaxr leil lar zzeir seixl zi nr nga a nei, [<sup>\*\*</sup>neir/??] leil lei zzeir seixl zi su ca hal ddei leil bei zil gger nia.

<sup>21</sup> Halleix nia lei Aezixr goxrjia gga ngol hher goxr a. Yel nia, nia dax ngol hher dae kebal mermi su ca mel leil bixr nr ddo, ci nr ddo.

<sup>22</sup> Maermocir nei aniuxcir leil ci nr ddo. <sup>23</sup> Nia yaa leil ar doxr ci ar-ddeirnga a, yaa ngo leil qiuxr a, ngo arsaebeilei yaa qiuxr dae mel leil noni nia, <sup>24</sup> halae larhorhormo seifu faex a, altor sser a nia leil seixl zil gger. Nia maerssor mel leil maermocir loxr lol nia, nia aniuX mel leil aniuxcir loxr lol nia.

<sup>25</sup> Ni ngo ddei cassor-worssor mel gga nia dax cirgo a hher dae casolssor mel leil zzirbae cir gger a mel, ni yaa leil lixlsixr li su ca hal mel sael a bei nr ddo, yaa dax lixlsixr li nr ddo. <sup>26</sup> Ni, si ddei pia xiux vei si lei a, yaxrji dae lol arddeirnga a mel, merni lal xilmeir leil yar leil koxl gger nia. <sup>27</sup> Yar mel pia eil xiux lar jiuddu zza. Pia eil xiux mel yar ggecir leil jiu dae pia xiux nga a. Pia eil xiux nr zza arddeirnga a, yar azo sser a yixr bbeixleir? Ngo mel ca leil yarzisael zoxlnixr, yel yar ngo leil qiuxr a, ngo dder noni.

<sup>28</sup> Arbosobo leil nrbba-nrbba bbeix nr ddo, ni ddei cassor-worssor ddei vaervaerpor mel leil lei hie no nr ddo.

<sup>29</sup> Ni loxlmoxr se wo beil mel nei puxrto zzibbaer nixl teixl leil beil mel ngo leil zi nia, dawo nr ddo.

Ni ssor hier beil ddei ngo leil gger nia.<sup>z</sup> <sup>30</sup> Niur nei acixl ya cer beil mel lei eilmel sael a nga nia. Yarma dax sir ni hher lol, heixl ni cir ni ngo leil gger nia.<sup>a</sup>

<sup>31</sup> Nia kebal ca dax bbe teixl lei a, ngo ddei cassor-worssor bei nia. Yel nia cinil mel si me gger zzeir mel ddei hor zzor nr ddo, anol mel leil piar zol lalddo.”

### Bbaehhexhex Mo Bei Nia

**23**<sup>1</sup> “Ni ca mel dax cirgo a nga-nr-zi ddar hal mel zzarvul-zzarmae biar ssi nr ddo; yarzi gexrddo bei su ca mel dax cirgo

<sup>z</sup>22:29 Ni ssor hier beil ddei ngo leil gger nia. Yilsi mel dder Arbosobo ddei miar bei lol.

<sup>a</sup>22:30 heixl ni cir ni ngo leil gger nia Yilsi mel dder Arbosobo leil seixl zi nia.

a ca goxl ggie ddar jiar te nr ddo. <sup>2</sup> Ca mel dax cirgo a nr seir mel bei ssi nr ddo; ca leil goxl car, yaa dax cirgo a hoxrhoxr mel nga-nr-zi bbeix mal gger nr ddo. <sup>3</sup> Ca leil goxl car lei, casolssor leil weix a ddar jiar te nr ddo, bbaehhexhhexmo bei nia.

<sup>4</sup> Ni, ni leil dir su mel ddei niur bbeixsael tarlodaex mel jjiimo ssi pixl ggie mia a mel, yar leil gga xixl gger nia. <sup>5</sup> Ni, ni leil vuxryixr su mel ddei tarlodaex ddei jix lir a, jix guirle ggie mia arddeirnga a, yar leil beijiu nia, ssi du si nr ddo.

<sup>6</sup> Casolssor mel leil goxl car, bbaehhexhhex mel dax bei nr mae bei nr ddo. <sup>7</sup> Ngo mel gexrddoddo mo bei su ca mel leil zuixl nr zza i mal gger nr var. Yel nia ca mel [leil nrbbba-nrbbba goxl nr ddo/dax ddar jiar te nr ddo]. Nia ca seir nei botaddu nr zza ca mel leil seixl nr ddo.

<sup>8</sup> Ca leil zzirbae ho a mel meixddur mia xie su mel leil mia nr xie loxr lol var. Yoxl nixmox seir su ca mel ddei ddar mel leil nr hoxrhoxr lol var, yel ni zzirbae ho dae mel li nr ddo.

<sup>9</sup> Ni, ni dax ngol hher dae ca mel leil ci nr ddo. Nia Aezixr goxrjia gga ngol hher goxr a, ngol hher a nixmox zzar arsaesael nga mel nia saexl.”

### Wornol Nixixl

<sup>10</sup> “Qiuxl koxl jjia lei ni mi paxr a, loxlmoxr se du lei nia. <sup>11</sup> Sir koxl hal cir koxl nael, mi mel leil xia dae lol nia, mor lei nr mor, dae lei nr dae. Ni ddei ca mel gga casolssor mel leil zzorddu zza lol. Yaa zzor nirzzei mel, zzeir nei yirvu-nilhax mel zzor cexr. Ni puxrto dae ggie nei saercor dae ggie lei eilmel sael a bei nia.

<sup>12</sup> Miar qiuxl ni bei nia. Sir ni cir ni nael, wornol nia. Niur nei tarlodaex mel leil wornol cexr lol, halae ni ddei zebol nei ngol hher dae ca mel leil lei wornol cexr lol.

<sup>13</sup> Ngo nia leil ddar bbeix gger dae hazza, nia zabbar-seilseir a noni nia. Neir mel ddei mi ti nr ddo, ca mel leil lei nia meir gga bbeix teixl lei ggie bbejjiur lol nr ddo.”

## Jiax Vaervaer Soler

<sup>14</sup> “Cir koxl so boxl ngo dax jiax goxr lei nia.<sup>b</sup>

<sup>15</sup> Ni miljiazi ji nr goxr aba zzor jiax goxr nia.<sup>c</sup> Ngo ni leil miardal dae mel dax zox dae a, Yalbir ae hal xiubbo gga dixl har dae nixixl mel gga miljiazi ji nr goxr aba sir ni zzor nia. Ni mel eil xiubbo gga Aezixr goxrjia gga ddux lei a.

Arseir lei leixrku-leixrler ngo dax lei nr ddo.

<sup>16</sup> Ni so se beil car, so mel ngo leil zi a, so se jiax goxr nia.<sup>d</sup>

Halae cir koxl goxr jjia niazzir dae car, saer se a, saer se du lei jiax goxr nia.<sup>e</sup>

<sup>17</sup> Capor cirke-lorbba cir koxl so boxl Seirpor Yihexrhuaxr meix-saerqir leil hher dae a jiax eil mel goxr nia.

<sup>18</sup> Ngo leil seixl zi dae zzeir mel ddei sirnilni nei miljiazi ji goxr aba mel cirter a zi nr ddo. Halae ngo leil jiax goxr gger a ngo leil seixl zi dae zzeir mel ddei cae mel giedae cirnehe dol ci nr ddo. <sup>19</sup> Mi gga loxlmoxr nei saer se wo beil naxrcixl zzir mel vei dae a, ni ddei Arbosobo Yihexrhuaxr ddei xi gga vei mal nia.

Acixlmodo ddei baxr mel sser a, acixlssor zeixl nr ddo.”

## Arsae Bei Nia Bbeixharzaxr

<sup>20</sup> “I ddo a! Ngo mel tisir leil miardal a ni xilmeirbbaer jjiumo gga ni leil guaxr dae lol a, ni leil ngo ni leil bei har zaxr gger dae middei hal ddei gga hier mal lol. <sup>21</sup> Ngo ddei mi yar dax hher ji dae. Yel nia yar meixsaer qir leil zabbar-seilseir a fadae nia, yar ddar noni nia,

---

<sup>b</sup>23:14 Yirsaexllixl su capor mel cir koxl Yiluxlsaler zzi gga so boxl ssi a Arbosobo dax jiax goxr.

<sup>c</sup>23:15 Ni miljiazi ji nr goxr aba zzor jiax goxr nia. Yirsaexllixl su ca mel ddei nixixl mel dax zox dae a, cirkoxl gga goxr beil hal xiubbo gga jiax eil ddei goxr a, sir ni goxr. Yaa ddei goxr beil hal xiubbo mel 3 yuexr feil gga.

<sup>d</sup>23:16 so se jiax goxr nia. Ssu se ho ngorcei ni goxr a, so se a so se jiax goxr.

<sup>e</sup>23:16 saer se du lei jiax goxr nia. Yirsaexllixl su ca mel ddei nixixl mel dax zox dae a, 7 yuexr feil gga 15 hal saer se jiax goxr.



yar leil dir nr ddo. Nr nga a, yar dder nia yar leil dir dae zuixl mel leil ssoxrsuxl nr var.

<sup>22</sup> Ni yarzi yar bbeix dae ddar mel noni, ngo ni leil bbeix gger dae hazza dax bei mae dae arddeirnga a mel, ngo dder ni leil vuxryixr su ca mel ddei vuxryixr su bei, ni leil dir su ca mel ddei dir su bei.

<sup>23</sup> Ngo ddei tisir ddei ni xilmeir ssi dae a, ni leil Yalmoxrlixl su ca, Hexl su ca, Birlixlsir su ca, Jianaxr su ca, Xiweixl su ca, Yibulsi su ca ddei mermi hier mal nia, ngo yaa leil bei zil gger a mier lol nia.

<sup>24</sup> Ni yaa zi dae bbex mel leil olddetexl nr ddo, visser nr ddo, halae yaa bei dae mel sael a bei nr ddo, doxgoxleixr yaa zi dae bbex mel leil caexr pixl jjia gger nia; yaa ddei sseigu bbex mel leil deil me gger nia. <sup>25</sup> Nia, nia ddei Arbosobo Yihexrhuaxr leil visser nia, yar dder ni ddei loxlmoxr nei ajjix leil seir lol nia, halae nia ddei noco mel bei pixl gger nia. <sup>26</sup> Ni hher ggie aniuxniar dae hal mel lei niar pixl nr var, aniux hier nr var su ssormaer lei zza nr var, ngo ni leil olga si lol nia.

<sup>27</sup> Ha ni ssi ci middei mel gga, ngo dder halmaex gga ca mel leil ni leil gexr lol nia, zzurdu-zzursi nga lol nia, yoxl ha ni leil vuxryixr su mel leil dder doxdoxsi beix du si lol nia. <sup>28</sup> Ngo bbiurdu mel leil miardal a ni xilmeir bbiu dae lol a, Xiweixl su ca, Jianaxr su ca, Hexl su ca mel leil ni meixsaer qir leil ggaxr teixl gger nia. <sup>29</sup> Nael ngo cir koxl gga dder yaa leil ni meixsaerqir leil ggax teixl jjia nr gger. Nr nga a, middei halmaex ca hher su nr zza a, yirvu-nilhax mel miur du lei a, ni leil ke leilei. <sup>30</sup> Ngo zzizzi a yaa leil ni meixsaerqir leil ggaxr teixl gger nia, ni ddei ca mel miur du dax lei a, middei hal ddei leil li wo zzeze ci. <sup>31</sup> Ngo ni leil arddolmaex cirdae a arddolmaex hher ci dixl gger nia, ni mel Neixvi Nilni bbe dax cirdae a Feilixlsixl Neixvi bbe dax hher ci, yoxl mipaerbae dax cirdae a lazzarmo vaervaer hal zex dax hher ci. Ngo halmaex gga hher dae ca mel leil ni leixrga gga jia ji gger nia, ni yaa leil ni meixsaerqir leil ggaxr teixl gger nia.

<sup>32</sup> Yaa dax nei yaa ddei neir mel dax azo lerler bbeixharzaxr nr ddo.

<sup>33</sup> Yaa ni ddei mermi gga goxr nr ddo, nr nga a yaa ni leil ngo leil de dae lol leilei. Ni yaa ddei neir mel leil visser arddeirnga a, eil ddei dder ni leil xiagl dae ddei loxr a.”

## Yihexrhuaxr Yirsaexllixl Su Ca Dax Bbeixharzaxr

**24**<sup>1</sup> Yihexrhuaxr Moxrxi leil bbeix: “Ni nei Yalluixr, Naxrdaxr, Yalbirful, halae Yirsaexllixl su ca leil guaxr su camar mel gga sirceimo lei ngo dax eilmaex ddeix lei nia. Nia vimirmir ggie hher dae a oldde textl nia.<sup>2</sup> Ni larnei ngo dax naelnaer a lei ddo, kebal ca mel nael ngo dax naelnaer a lei nr ddo. Cassor-worssor mel lei ni dax cirter a ddeix lei nr ddo,” eine bbeix.

<sup>3</sup> Moxrxi Yihexrhuaxr ddei ddar mel nei miardal dae mel cassor-worssor mel leil bbeix gger lei a. Cassor-worssor maelmaerjgia cir-yoxr a ddarkoxl a bbeix: “Yihexrhuaxr bbeix dae ddar hazza lei ngua bei mae dae nia.”<sup>4</sup> Moxrxi Yihexrhuaxr miardal dae ddar maelmaerjgia vaexr zeil lei a. Giedae cirnehe neixrneixr-sisi ha du lei a, worjibbei leil ziggie ar ddei bei a; halae Yirsaexllixl su ca ceinir cuxr dax zox dae a, legelbbe sseigu ceinir taex dae a.<sup>5</sup> Yoxl Yirsaexllixl su ca mel gga caleixlssor mel leil miardal a, adoxl gga cu a zilabox mel zi lol, yoxl zzaso lol qiuxr a loxrbbexssor seixl a Yihexrhuaxr leil zi.<sup>6</sup> Moxrxi sirnilni mel cir peix a nael larggu gga ji dae, cir peix a nael ziggie ddei leil beil deix gger.<sup>7</sup> Yoxl Arbosobo bbeixharzaxr dae hal juer cassor-worssor leil zza gger. Yaa bbeix: “Yihexrhuaxr miardal dae hazza lei ngua bei mae nia, noni nia.”<sup>8</sup> Moxrxi dder sirnilni mel cassor-worssor mel ddei ggecir leil beil deix gger a bbeix: “I ddo a! Eil ddei mel nia dax bbeixharzaxr a sser dae sirnilni ddei nga a. Yihexrhuaxr ddar eil mel dax zox dae a nia dax bbeixharzaxr dae ddei nga a,” eine bbeix a.

<sup>9</sup> Giedae Moxrxi, Yalluixr, Naxrdaxr, Yalbirful nei Yirsaexllixl su ca leil guaxr su camar mel gga sirceimo dder worga leil ddeix a.<sup>10</sup> Yaa Yirsaexllixl su ca mel ddei Arbosobo leil mia a. Arbosobo qi-hher woxrke balsixr laxllaxr bei teixl lei jjiumo ar zex zza hherdder merlabbor zico lei nr zza hal mel sael a nga.<sup>11</sup> Yirsaexllixl su ca ddei vaervaerpor mel Arbosobo leil mia a lei, Arbosobo yaa leil bei no nr gger, yaa zzorzzor-ddadda bei dae.

## Moxrxi Xinaer Worga Leil Hher Dae

<sup>12</sup> Yihexrhuaxr Moxrxi leil bbeix: “Ni worga ga leil ddeix lei a, ngo dax eilmaex lei a, eilmaex gga hher dae nia. Ngo lixfaxr nei miardal dae hal mel vaexr deix dae legelbbe nr pir ni leil gger nia, yel ni leil ca mel leil mul gger cexr lol.” <sup>13</sup> Moxrxi nei yar leil beijjiu su Yuesuyal dder ha du lei a. Moxrxi dder Arbosobo ddei worga ga leil ddeix du a. <sup>14</sup> Moxrxi Yirsaexllixl su ca mel leil guaxr su camar mel leil bbeix: “Nia eilmaex hher dae a, ngua leil xia dae, ngua jjixr lei zzeze xia ci nia. I ddo a! Yalluixr nei Ful'aer yaa nia dax cirgo a hher dae, nia zzi leil azo lerler goxl a mel, yaa leil zo ssi ddo,” eine bbeix a.

<sup>15</sup> Moxrxi worga leil ddeix ci a, zico mel worga gga leil jiul gex dae a. <sup>16</sup> Yihexrhuaxr ddei bbobbolbbo mel Xinaer worga ga leil bbo doxr dae a. Zico mel worga ga leil qiuxl ni jiul gex doxr a; sir ni cir ni, Yihexrhuaxr zico ddei gga Moxrxi leil ae. <sup>17</sup> Yirsaexllixl su ca mel Yihexrhuaxr ddei bbobbolbbo mel leil i dae a mel dder worga oldde leil adoxl herhelher bbiu dae mel sael a nga. <sup>18</sup> Moxrxi mel zico co gga ddir a, worga ga leil ddeix a, licei xixl licei ni hher a.

## Seirceix-seirmaer Sexlmuxl Zi A, Sserzoxr Mel Gger

**25** <sup>1</sup> Yihexrhuaxr Moxrxi leil bbeix gger a bbeix: <sup>2</sup> “Ni Yirsaexllixl su ca mel leil ngo leil zzaegu ho nia bbeix gger nia. Nixmox zzar ggegge-sese zzaegu gger su ca mel dax nia vei dae a ngo leil gger ddo. <sup>3</sup> Ni lilabox zzaegu mel hherdder: piu, sae, zzir, <sup>4</sup> mae-bbiur laxllaxr, jjiussi yixrsaexr nei nineix, zzir mesixlsixl, acixl me, <sup>5</sup> nilni ssar dae yabol zzi, yarzi naxrcixl zzi,<sup>f</sup> zaxljiaxr muxl, <sup>6</sup> de doxllabox saercor ssuvi, halae ca leil doxl deix gger labox saercor ssuvi nei hexzzi beilabox nerxiuxiu mel, <sup>7</sup> halae yirfuxrdaexr xiux<sup>9</sup> leil hha gex dae bbox dae yol neixlneix mel nei nixmoxzo bar leil

<sup>f</sup>25:5 yarzi naxrcixl zzi Ca cirmelmel zzirdae a zzi eil yoxr mel dder neixvi gga hher dae hal mel ddei zzi.

<sup>9</sup>25:7 yirfuxrdaexr xiux Yirfuxrdaexr xiux mel guaxlguaxl sael a ar xiux a. Arbosobo leil zi su vaerzzirpor ddei lar yirfuxrdaexr xiux veixr ddo.

bbegexddu hal co leil hha gex dae naxrcixlcixl mo legelbbe mel nga a. <sup>8</sup>Cassor-worssor mel yoxl ngo leil Arbosobo hher ggie<sup>h</sup> zi gger nia, ngo dder yaa dax hher dax dae cexr. <sup>9</sup>Sexlmuxl<sup>i</sup> ddei nei halmaex gga sser dae cirza-hanga bei a mel, ngo ni leil mia lol mel dax zox dae a bei nia.”

### Yueguixl<sup>j</sup>

<sup>10</sup> “Zaxljiaxr muxl sser a bbezzir ar kae bei. Siggiebbaer nael, cirxiu cei (110) gofei; kuaxggiebbaer nei muggiebbaer nael, qiuxlceiqiuxl (66) gofei, eine bei. <sup>11</sup>Lavulzzar nei lamaebbaer lei sae lillil a sser a ba gex du lei nia, ggaxrsibbor nael, zaza-lili lei sae sser yarqir bei gex. <sup>12</sup>Yoxl sae mel sser a nolvar liller ddaexr, yel bbezzir qihher li bbor leil hha gex: eilpiar a nnel, halpiar a nnel. <sup>13</sup>Zaxljiaxr muxl mel sser a daxrzzo nr ba bei, daxrzzo nr ba leil sae sser a ba gex du lei. <sup>14</sup>Daxrzzo nr ba bbezzir nr piar leil nolvar mel gga cua ji. Eine nga a bbezzir ddei leil bil cexr. <sup>15</sup>Daxrzzo eil nr ba mel nolvar ddei gga cua ji doxr dae nia, die teixl lei nr ddo. <sup>16</sup>Ngo ni leil gger dixl har dae Lixlfaxr mel vaexr deix dae legelbbe nr pir bbezzir gga dol ji.

<sup>17</sup>Ni sae lillil a sser a, bbezzir ddei leil ggabilddu arddei bei. Siggiebbaer nael, cirxiu cei (110) gofei; kuaxggiebbaer nael, qiuxlceiqiuxl (66) gofei. <sup>18</sup>Yoxl sae lillil a sser a, jiluxlboxr nnel ddaexr a, ggabilddu ddei leil cir piar a arddei hher dae lol. <sup>19</sup>Jiluxlboxr eil nnel mel ggabilddu ddei dax cirgo a ddaexr gex dae nia, cir piar a gga arddei ddaexr gex. <sup>20</sup>Jiluxlboxr eil nnel leil qiaxrmeix ddei zzicarzzi dax mal dae lol a, ggabilddu ddei leil i dae lol. Ddoleixr

<sup>h</sup>25:8 Arbosobo hher ggie Arbosobo hher ggie mel seirceix-seirmaer a.

<sup>i</sup>25:9 Sexlmuxl Arbosobo Yirsaexllixl su ca mel leil yar hher ggie bei gger lol. Xielmeir bei hal ddei nael zaxlpoxr, giedae zi hal ddei nael xi. Zaxlpoxr halddei leil “Sexlmux” bbeixsael “Yoharggie Zaxlpoxr” lei bbeix.

<sup>j</sup>25:10 Yueguixl Yueguixl ddei mel bbezzir arddei a. Yueguixl gga Arbosobo miardal dae hal cei tiuxr vaexr deix dae legelbbe nr co ji dae. Miardal dae eil mel Arbosobo halleix Yirsaexllixl su ca mel dax bbeixharzaxr dae mel nga a, yel bbezzir eil ddei leil "bbeixharzaxr bbezzir" hherdder "yueguixl" eine bbeix.

ddei nael darmumu ddaexr kae a, ggabilddu ddei leil bbe gex dae lol. <sup>21</sup> Yoxl ngo ni leil gger dixl har dae Lixlfaxr mel vaexr deix dae legelbbe nr pir bbezzir gga dol ji a, ggabilddu ddei bbezzir ggaxrne hha deix. <sup>22</sup> Ngo yueguixl ggabilddu ddei leil jiluxlboxr nrnel agala gga halmaex ni dax zzi a, Yirsaexllixl su ca mel leil miardal dae mel ni leil bbeix gger.”

### Aba Dol Ggie Zaezir

<sup>23</sup> “Ni zaxljiaxr muxl sser a zaezir ar zoxr bei. Siggiebbaer nael, heixlceiheixl (88) gofei; kuaxggiebbaer nael, liceili (44) gofei; muggiebbaer nael, qiuxkceiqiuxl (66) gofei. <sup>24</sup> Sae lillil a sser a ba gex du lei. Ggaxrsibbor nael, zaza-lili lei sae sser a yarqir bei gex. <sup>25</sup> Zaezir zoxr zaza-lili leirtaka ddei kuax kuax, bei kuax dax. Kuax teixl lei eil ddei zaza-lili ggarsibbor nael sae sser a yarqir bei gex. <sup>26</sup> Halae sae sser a nolvar liller bei a, zaezir li giexrluxl ddei qihher li bbor leil hha gex. <sup>27</sup> Sae nolvar mel nael, bei kuax teixl lei ddei dax naer dae ggie hha. Eine nga a, daxrzzo ddei cua gel a zaezir bil cexr. <sup>28</sup> Zaxljiaxr muxl sser a daxrzzo nr ba bei, sae sser a ba gex du lei, yel zaezir bil cexr. <sup>29</sup> Ni halae sae lillil a sser a, zaezir zoxr leil deix dae paxrzi, ddorbax, halae bbie nei baxlaxr bei. <sup>30</sup> Yoxl zaezir ddei leil ngo meixsaer qir leil arddolcar lei ngo leil ziddu aba dol.”

### De Jiaxl

<sup>31</sup> “Ni yoxl sae lillil a sser a de ar jiaxl bei. De jiaxl yarzibbor ddei, agala gga yarhher caex, veixzox, vixlux, veixnix mel lei cir pir leil a ddaexr teixl lei. <sup>32</sup> De jiaxl nr piar a gga yarbaxlleixr qiuxl baxlleixr ggax teixl lei; eilpiar a gga so baxlleixr, halpiar a gga so baxlleixr. <sup>33</sup> Eilpiar a gga yarbaxlleixr arddol baxlleixr leil lei vixlux so pex zza. Vixlux eil so pex mel saerpaer vixlux lesel, veixzox zza, vixlux zza. Halpiar a gga yarbaxlleixr arddol baxlleixr leil lei vixlux so pex zza. Vixlux eil so pex mel saerpaer vixlux lesel, veixzox zza, vixlux zza. De jiaxl leil ggax teixl lei qiuxl baxlleixr jiaxl lei eine a. <sup>34</sup> De jiaxl agala gga hal caex leil mel vixlux li pex zza, vixlux eil li pex lei saerpaer vixlux lesel, veixzox zza, vixlux zza. <sup>35</sup> Yarbaxlleixr cir

zze woxrke veixzox ar ddei zza, so zze jjia lei eine a. <sup>36</sup> De jiaxl leil veixzox yarbaxlleixr eilmel maelmaerjjia lei sae lillil a ar co sser a ddaexr teixl lei. <sup>37</sup> De jiaxl leil nael, de sir zar bei. De mel nael, xil-meirbbaer piar a gga bbele teixl lei lol. <sup>38</sup> Sae lillil a sser a de xi ddei leil ddaexlabox zzirda nei de xi ddaexjiddu paxrzi bei. <sup>39</sup> Sae lillil a soceingor (35) zi sser a, de jiaxl nei cirza-hanga sserlabox eilmel bei. <sup>40</sup> Ni fadae nia. Eilmel maelmaerjjia lei ngo worga leil hher dae a ni leil mia lol mel sael a bei nia.”

## Sexlmuxl

### Sexlmuxl Zi A Sser Dae Zzir Mesixlxixl Co

**26** <sup>1</sup> “Ni mae cei co sser a Sexlmuxl bei. Mae eilmel mel, zzir mesixlsixl hal mel halae maebbiur laxllaxr, jjiussi yixrsaexr, nei nineix mel sser a ddaexr, halae hhexr naexr vul mel leil jiluxl-boxr naexr deix lol. <sup>2</sup> Mae eilmel circo-hanga lei zzi dax leilei a nga: siggiebbaer nael, ceinir (12) gocixr; kuaxggiebbbaer nael, nr (2) gocixr. <sup>3</sup> Eil ngor co cirgo a naexr gex du lei a, vaervaer ar co loxr lol; kebal hal ngor co lei cirgo a naexr gex du lei a, vaervaer ar co loxr lol. <sup>4</sup> Mae vaervaer nr co jjia ddei maelele piar a gga, mae laxllaxr sser a, nolvar naexr dexl. <sup>5</sup> Mae eil nr co leil, cir co leil nolvar ngorcei mo naexr dexl, maelmaerjjia lei nnel nnel zzi dax mal. <sup>6</sup> Yoxl sae sser a algerle ngorcei mo bei, mae vaervaer eil nr co leil cirgo a gaxl gex du lei. Eine nga a saelnei Sexlmuxl beilabox co loxr.

### Sexlmuxl Leil Wol Gex Dae Acixl Me Co

<sup>7</sup> Ni acixl me sser a Sexlmuxl ddei leil ggaxrsibbor wolgexlabox ceidil co bei. <sup>8</sup> Circo-hanga lei zzi dax leilei a nga: siggiebbaer nael, ceiso (13) gocixr; kuaxggiebbbaer nael, nr (2) gocixr. <sup>9</sup> Ngor co a cirgo a naexr gex du lei a, vaervaer ar co loxr lol; kebal hal qiuxl co lei cirgo a naexr gex du lei a, vaervaer ar co loxr lol. Yel qiuxl co naexr du lei co leil nael, zaxlpoxr eil ddei xilmeir piar a gga ardoxr zaexr xixl lei. <sup>10</sup> Naexr gex du lei vaervaer nr co jjia ddei yarqierbbaer hal co leil nolvar ngorcei mo naexr dexl. <sup>11</sup> Yoxl zzir sser a algerle

ngorcei mo bei a, nolvar mel leil gaxl gex du lei a, wolgexlabox cir co a loxr lol. <sup>12</sup> Wolgexlabox co nirzzei dae mel nael, Sexlmuxl ddei giedae piar a gga ddar ze i dae lol. <sup>13</sup> Wolgexlabox co nr piar a gga nirzzei dae ngorcei (50) gofei ddei nael, Sexlmuxl ddei nr piar a gga ddar ze i dae lol, yel Sexlmuxl ddei leil bbe gex dae lol.

### Wolgexlabox Co Gaxrne Hal Nr Co

<sup>14</sup> Ni yoxl zeixleixr zaxlpoxr ddei leil wolgexlabox co gaxrne nr co bei nia. Cir co a nael, ssar ni dae yabol zzi mel sser a bei. Cir co a nael, kebal zzi<sup>k</sup> hal mel sser a bei.

### Sexmuxl Ddei Jiaxjiax Nei Lagexddu Mel

<sup>15</sup> Ni zaxljiaxr muxl sser a, Sexlmuxl ddei leil ngier dae lol jiaxjiax mel bei. <sup>16</sup> Jiaxjiax cirddei-hanga lei muggiebbær nael, li (4) gocixr; kuaxggiebbær nael, qiuxlceiqiuxl (66) gofei. <sup>17</sup> Jiaxjiax cirddei-hanga leil lei suir rnel zza. Jiaxjiax maelmaerjia leil eilmel sael bei. <sup>18</sup> Sexlmuxl ddei naxrfa piar a gga nael, jiaxjiax nrzeimo bei. <sup>19</sup> Jiaxjiax ddei yarzibbor nael, piu sser a suir hha ji ddu licei taex bei; jiaxjiax cir ddei piu sser a bei teixl lei suir hha ji ddu nr taex gga hha ji. <sup>20</sup> Sexlmuxl ddei baexrfa piar a gga lei jiaxjiax nrzeimo <sup>21</sup> nei piu sser a suir hha ji ddu licei taex bei. Jiaxjiax cirddei-hanga lei piu sser a bei teixl lei suir hha ji ddu rnel zza. <sup>22</sup> Sexlmuxl ddei giedae piar a gga hherdder xifa piar a gga mel, jiaxjiax qiuxller bei. <sup>23</sup> Sexlmuxl giedae piar a gga giexrluxl cirddei leil jiaxjiax rnel bei, yel giedae piar a gga mel jiaxjiax heixller zza. <sup>24</sup> Jiaxjiax rnel jiasibbor zzi leil gga gex dae a, ggaxrsibbor nolvar dax ddeix ci. Giexrluxl rnel jia lei ciryoxr a bei. <sup>25</sup> Maelmaer a mel jiaxjiax heixller nei piu sser a bei teixl lei suir hha ji ddu ceiqiuxlmo zza; jiaxjiax cirddei-hanga ddei jiasibbor piu sser a bei teixl lei suir hha ji ddu rnel zza.

---

<sup>k</sup>26:14 kebal zzi Ca cirmemel zzirdae a zzi eil mel hherdder neixvi gga hher dae hal mel ddei zzi. Ca cirmemel zzirdae a zzi eil mel hherdder yarzi naxrcixl acixl zzi.

<sup>26</sup> Ni zaxljiaxr muxl sser a jiaxjiax ddei leil lagexddu bei. Sexlmuxl naxrfa piar a gga jiaxjiax mel leil lagexddu ngor caex bei gger, <sup>27</sup> Sexlmuxl baexrfa piar a gga jiaxjiax mel leil lagexddu ngor caex bei gger, yoxl Sexlmuxl ddei giedae piar a gga hherdder xifa piar a gga jiaxjiax mel leil lagexddu ngor caex bei gger. <sup>28</sup> Jiaxjiax ddei zzoxrbbeix do leil lagexddu caex eilpiar gga cirdae a halpiar gga la gex ci. <sup>29</sup> Jiaxjiax ddei leil sae sser a ba gex du lei, yoxl sae sser a jiaxjiax ddei leil lagexddu caex lagex ggie nolvar bei, lagexddu caex lei sae sser a ba gex du lei. <sup>30</sup> Ni wordabbor hher dae a ngo ni leil mia lol mel sael a, Sexlmuxl ddei zi du lei.

Seirceix-seirmaer Gaxzi Giex Nei Seirceix-seirmaer  
Giex Agala Gga Gaxl Gex Dae Hal Co

<sup>31</sup> Ni maebbiur laxllaxr, jjiussi yixrsaexr, nineix nei zzir mesixlsixl hal mel sser a, Sexlmuxl gga giex gex dae mae co ddaexr. Hhexr naexr vul mel leil mae co leil jiluxlboxr naexr deix lol. <sup>32</sup> Mae co nael zaxljiaxr muxl sseigu leil sae bei teixl lei algerle mel leil gaxl gex. Sseigu li taex nael piu sser a bei teixl lei suir hha ji ddu li taex gga hha ji. <sup>33</sup> Mae eil co algerle mel leil gga gex dae a, seirceix-seirmaer gaxzi giex nei seirceix-seirmaer giex leil bbe kae gger. Yueguixl ddei nael mae eil co lavulbbaer dol dae. <sup>34</sup> Yoxl ggabilddu ddei seirceix-seirmaer gaxzi giex gga yueguixl ddei leil hha deix dae. <sup>35</sup> Zaezir zoxr nael, mae eil co lamaebbaer seirceix-seirmaer giex gga, Sexlmuxl ddei baexrfa piar a gga dol dae. De jiaxl nael, Sexlmuxl ddei naxrfa piar a gga dol dae. Yaa zzicarzzi leil mal dae.

Sexlmuxl Gga Ddir Ggie Gaxl Gex Dae Hal Co

<sup>36</sup> Ni maebbiur laxllaxr, jjiussi yixrsaexr, nineix nei zzir mesixlsixl hal mel sser a, vixlux naexr mel sael a zaxlpoxr gga ddir ggie gaxl gex dae mae co naexr. <sup>37</sup> Mae eil co nael sseigu ngor taex leil sae bei teixl lei algerle mel leil gaxl gex. Sae ba gex dae zaxljiaxr muxl sseigu ngor taex nael, zzir bei teixl lei suir hha ji ddu ngor taex gga hha ji.”



## Arbosobo Leil Zzeir Seixlziggie

**27**<sup>1</sup> “Ni zaxljiaxr muxl sser a, ngo leil zzeir seixlziggie bei. Ziggie eil ddei mel sixlfa ar ddei a. Siggiebbaer nei kuaxggiebbaer nael 2.2 gocixr, muggiebbaer nael 1.3 gocixr. <sup>2</sup> Ni ziggie ddei giexrluxl li piar a leil giexrluxl baexlaex li baex bei gex, eil ddei dax cirgo a niar dae lol a, zzir sser a ba gex du lei. <sup>3</sup> Ni zzir sser a, kurlu ji lar, calcal, ddorbax, hor cagexddu nei saernir huaxjiddu bei. <sup>4</sup> Ni yoxl zzir sser a, ziggie ddei leil luxrtiuxr lesel<sup>l</sup> ar paxr bei. Luxrtiuxr paxr giexrluxl liller leil nael, zzir nolvar liller bei gex. <sup>5</sup> Luxrtiuxr paxr nael, ziggie ddei leil yarqierbbaer li piar a gga hha gex a, agala gga giex gex ggie halmaex zzezze ddeix ci lol. <sup>6</sup> Yoxl zaxljiaxr muxl sser a, ziggie ddei leil billabox daxrzzo bei, halae zzir sser a ba gex du lei. <sup>7</sup> Billabox daxrzzo mel nr piar a gga nolvar mel gga cua ji dae. Eine nga a mel, ziggie hal ddei leil bil cexr. <sup>8</sup> Ni barpir sser a, ziggie ddei bei. Eil ddei agala zzar mel kol dae. Ni wordabbor hher dae a, ngo ni leil mia lol mel dax zox dae a bei.”

## Sexlmuxl Ddei Zaza-lili

<sup>9</sup> “Ni Sexlmuxl ddei zzaexggu bei. Zzaexggu ddei naxrfa piar a gga qiuxgex labox zzir mesixlsixl ddaexr teixl lei co, siggiebbaer mel liceili (44) gocixr zza. <sup>10</sup> Eil co qiuxdeix labox sseigu nrzei taex zza. Zzir sser a bei teixl lei suir hha ji ddu nrzei taex zza. Piu bei teixl lei algerle mel nei [<sup>\*\*</sup>huixrdaxldaxl/yarsael] mel lei sseigu leil hha gex dae. <sup>11</sup> Baexrfa piar a gga qiuxgex labox mae co lei liceili (44) gocixr zza. Eil co qiuxdeix labox sseigu lei nrzei taex zza. Zzir sser a bei teixl lei suir hha ji ddu nrzei taex zza. Piu bei teixl lei algerle mel nei [huixrdaxldaxl] mel lei sseigu leil hha gex dae. <sup>12</sup> Zzaexggu ddei xifa piar a gga qiuxgex labox mae hal co nael, nrzeinr (22) gocixr zza. Eil co qiuxdeix labox sseigu cei taex zza, suir hha ji ddu lei cei taex zza. <sup>13</sup> Zzaexggu ddei dofa piar a gga hherdder mer-ni ddux lei ggie piar a gga kuaxggiebbaer nael nrzeinr (22) gocixr

<sup>l</sup>27:4 luxrtiuxr lesel Yirsaexllixl su ca mel saernir nei six mel luxrtiuxr woxrke zi, hor mel nael luxrtiuxr ggaxrne deix.

zza. <sup>14</sup> Gielmi alddur ddei eilpiar a gga qiuxgex labox co nael 6.6 gocixr zza. Eil co qiuxdeix labox sseigu so taex zza, suir hha ji ddu so taex zza. <sup>15</sup> Gielmi alddur ddei halpiar a gga qiuxgex labox co lei 6.6 gocixr zza. Eil co qiuxdeix labox sseigu so taex zza, suir hha ji ddu so taex zza. <sup>16</sup> Zzaexggu ddei gielmi alddur leil gaxl gex ddu mae ar co bei, ge (9) gocixr zza. Mae eil co mel, zzir mesixlsixl hal mel halae maebbiur laxllaxr, jjiussi yixrsaexr, nei nineix mel sser a vixlux naexr mel sael a naexr. Sseigu li taex zza, suir hha ji ddu li taex zza. <sup>17</sup> Zzaexggu zaza-lili sseigu hazza lei, piu sser a bei teixl lei [huixrdaxldaxl] mel zzi leil gga gex dae; sseigu mel leil piu sser a bei teixl lei algerle hha gex dae; halae zzir sser a bei teixl lei suir hha ji ddu mel zza. <sup>18</sup> Zzaexggu ddei siggiebbaer nael, liceili (44) gocixr; kuaxggiebbaer nael, nrzeinr (22) gocixr; muggiebbaer nael, 2.2 gocixr. Zzaexggu leil qiux gex dae co mel, zzir mesixlsixl sser a ddaexr teixl lei, suir hha ji ddu mel nael zzir sser a bei teixl lei. <sup>19</sup> Sexlmuxl gga sser dae zzaegu hazza lei zzir sser a bei teixl lei: Sexlmuxl ddei giexrngexl hazza nei zzaexggu zaza-lili giexrngexl hazza lei zzir sser a bei teixl lei.”

### De Doxl

<sup>20</sup> “Ni Yirsaexllixl su ca mel leil nixl teixl lei saercor ssuvi naxrcixl zzir mel ni leil gger lol, yel dedoxlddu bei a, de ddei leil bbo doxr dae lol. <sup>21</sup> Yalluixr nei yar giedae ca mel Yoharggie Zaxlpoxr gga de eil jiaxl leil Yihexrhuaxr meixsaer qir leil mercixl cirdae a eil-neixrnehe lei bbo dae lol. De eil jiaxl mel yueguixl dax giex gex dae mae hal co lamaebbaer dol dae. Eil ddei mel, Yirsaexllixl su ca mel cirzeix-hanga lei bei zeisi nia lixfaxr ddei nga a.”

### Arbosobo Leil Zi Su Vaer Zzir Ddei Veixrlabox Pia

**28** <sup>1</sup> “Ni Yirsaexllixl su ca mel gga niago Yalluixr nei yar ddei ssor Naxrdaxr, Yalbirful, Yirlixlyalsar nei Yirtamar leil ngo leil zi su bei lol a, ni dax lei naer lei lol nia. <sup>2</sup> Ni niago Yalluixr lei ngo leil zi a veixrddu pia naexr gger a, yar leil middux lol, yar leil igax zae lol. <sup>3</sup> Ni, ngo halleix yaa \*\*leil olnoyddu lol a, hhexr naexr

vul mel leil miardal a, Yalluixr leil pia naexr gger lol. Eine bei a mel yar leil kebal ca mel dax bbe teixl lei a, ngo leil zi su bei lol. <sup>4</sup>Ni yaa leil miardal a, Yalluixr nei yar ddei ssor mel leil nixmoxzo bar leil bbegexddu co, yirfuxrdaexr xiux, pia laxllaxr darsisi xiux, zzir mesixlsixl darsisi xiux, oltex nei maelsael eilmel naexr gger lol. Yel Yalluixr nei yar ddei ssor mel leil ngo leil zi a veixrddu pia veixr dae a, ngo leil zi su bei lol. <sup>5</sup>Hhexr naexr vul mel sae bei teixl lei maebbiur, halae maebbiur laxllaxr, jjiussi yixrsaexr nei nineix, halae yoxl zzir mesixlsixl hal mel sser a naexr.”

### Yirfuxrdaexr Xiux

<sup>6</sup>“Yarzi bei sexr ca eil mel, sae bei teixl lei maebbiur nei maebbiur laxllaxr, jjiussi yixrsaexr, nineix, halae zzir mesixlsixl hal mel sser a, yirfuxrdaexr xiux bei. <sup>7</sup>Yirfuxrdaexr xiux mel pæzixlleixr leil gaxl gex ddu nr zex zza. Xilmeirbbaer piar nei giedaebbaer piar naexr gex du lei a, pia xiux leil zzi dax gga gex dae lol. <sup>8</sup>Yirfuxrdaexr xiux ddei maelsael zex mel yirfuxrdaexr xiux sael a naexr. Sae bei teixl lei maebbiur nei maebbiur laxllaxr, jjiussi yixrsaexr, nineix halae zzir mesixlsixl hal mel sser a naexr. Maelsael zex yirfuxrdaexr xiux leil neixl gex dae. <sup>9</sup>Halae bbox dae yol neixlneix nr pir vei a, Yirsaexllixl<sup>m</sup> ddei ssor ceinirmo ddei mi mel halmaex kiexl deix. <sup>10</sup>Yaa xiu beil ddei cirdae a, xiu maele ddei zzezze eilmel dax zox dae a, legelbbe cir pir leil yaa ddei mi qiuxl ler kiexl deix. <sup>11</sup>Bbox dae yol neixlneix eilmel leil kiexl a, yarzi kiexl var ca hal mel Yirsaexllixl ddei ssor ddei mi mel kiexl. Legelbbe eil nr pir mel sae bei teixl lei kur dae mel gga hha ji. <sup>12</sup>Bbox dae yol neixlneix eil nr pir yirfuxrdaexr xiux ddei pæzixlleixr leil gaxlgexddu nr zex leil hha gex, Yirsaexllixl su ca mel leil holcirlabox legelbbe bei. Yalluixr yaa ddei mi mel pæzixlleixr ddei leil ddexr dae a, Yihexrhuaxr dder Yirsaexllixl su ca mel leil holcir dae var. <sup>13</sup>Sae sser a kur dae nnel bei, <sup>14</sup>yoxl sae lillil a sser a yarsael nr zex bei. Yarsael eil nr zex

<sup>m</sup>28:9 Yirsaexllixl Yirsaexllixl mel dder Yargel nga a. Yar ssor ceinirmo zza. Yaa leil Liurbil, Simixl, Lixweixl, Yoxrdaxl, Jiadaexr, Yalsaexl, Daxl, Naxrfuxrtalil, Yirsarjia, Xibulluixr, Yuesaexl nei Bixlyarmir eine mi.

mel baezo vaexr teixl lei mel sael a nga, sae bei teixl lei kur dae nrrnel leil dexl gex.”

### Nixmoxzo Leil Bbe Gex Labox Co

<sup>15</sup> “Ni yarzi bei sexr ca hal mel leil Arbosobo ser niazzir dae mel leil suaxlabox nixmoxzo bar leil bbegexddu ar co bei lol. Yirfuxrdaexr bei mel sael a bei a, sae bei teixl lei maebbiur nei maebbiur laxllaxr, jjiussi yixrsaexr, nineix, halae zzir mesixlsixl hal mel sser a bei. <sup>16</sup> Nixmoxzo ddei leil bbegexddu eil co mel sixlfa ar co bei a, nr zaexr zaexr xixl lei. Siggiebbaer nei kuaxggiebbaer nael, nrzeinr (22) gofei zza. <sup>17</sup> Eil co leil balsixr li lul hha gex: xilmeir lul nael, sseirsseilsseir bbo var balsixr nilni, yol saelsae, bbo var yol nibaexbaex; <sup>18</sup> nr lul ddei nael, balsixr alggorpae, sseirsseilsseir bbo var balsixr laxllaxr, sseirsseilsseir bbo var balsixr nibaexbaex; <sup>19</sup> so lul ddei nael, balsixr nilni, bbox dae yol piulpiu nei sseirsseilsseir bbo var jjiussi yixrsaexr balsixr; <sup>20</sup> li lul ddei nael, i bei ddo balsixr nixbaexbaex, bbox dae yol neixlneix, yol nilni. Eilmel maelmaerjgia lei sae bei teixl lei kur dae mel gga hha ji. <sup>21</sup> Eil ceinir taex leil mel cir taex leil Yirsaexllixl ddei ssor ddei mi ar ddei kiexl deix, yaa hherdder Yirsaexllixl su ca ceinir cuxr nga a.

<sup>22</sup> Nixmoxzo bar leil bbegexddu co leil sae lillil a sser a, baezo vaexr sael a yarsael vaexr gger. <sup>23</sup> Sae nolvar nrrnel bei a, nixmoxzo bar leil bbegexddu co ddei ggaxrsibbor giexrluxl nr piar a leil dexl ngexl. <sup>24</sup> Sae sser a vaexr teixl lei yarsael hal nr zex, nixmoxzo bar leil bbegexddu co ddei ggaxrsibbor giexrluxl nr piar ddei nolvar nrrnel gga sae ji. <sup>25</sup> Yarsael kebal [oldde] hal nr piar a kur dae nrrnel gga dexl gex gger a, yirfuxrdaexr xiux ddei xilmeir piar a gga paezixlleixr leil gaxl gex dae yarsael mel leil hha gex. <sup>26</sup> Sae sser a nolvar nrrnel bei a, nixmoxzo bar leil bbegexddu co ddei jjiasibbor giexrluxl nr piar leil dexl ngexl, hherdder yirfuxrdaexr xiux dax naer dae lavulzzar yarqir leil nga a. <sup>27</sup> Yoxl sae nolvar nrrnel bei a, yirfuxrdaexr xiux xilmeir piar a gga, paezixleixr leil yarsael zeix jiasibbor do gga maelsael dax naer ggie hha gex, hherdder naexrizixlggie dax naer dae maelsael zex ggaxrne halmaex nga a. <sup>28</sup> Halae

yixrsaexr laxllaxr yarsael ar zex sser a, nixmoxzo bar leil bbegexddu co ddei nolvar ddei nei yirfuxrdaexr xiux ddei nolvar ddei leil zzi dax neixl gex du lei, yel nixmoxzo leil bbegexddu co maelsael zex dax naelnaer a hher dae lol, eine nga a jjiar nr var.

<sup>29</sup> Yalluixr Seirceix-seirmaer giex gga ddir car, Yirsaexllixl su ca ceinir cuxr ddei mi kiexl deix dae nixmoxzo bar leil bbegexddu co ddexr dae. Eine nga a mel, Yihexrhuaxr dder Yirsaexllixl su ca mel leil holcir doxr dae var. <sup>30</sup> Yoxl “Wulixr” nei “Turmixr” eil nr yoxr nixmoxzo bar leil bbegexddu co gga ji dae a, Yalluixr ngo dax lei car, ddexr dae cexr lol. Eine nga a mel, yar Yihexrhuaxr meixsaer qir leil hher dae car dder, nixmoxzo leil ddexr doxr dae a. Yar dder ngo Yirsaexllixl su ca mel leil arsae miardal dae saexl var.”

### Yirfuxrdaexr Woxrke Veixr Dae Pia Darsisi Mel

<sup>31</sup> “Ni yixrsaexr laxllaxr lillil a sser a yirfuxrdaexr woxrke veixr dae pia darsisi xiux bei. <sup>32</sup> Eil xiux ggaxrsibbor agala gga mel lei-gguqir beilabox ar ddei dol dae. Leigguqir yarqir ddei leil mel arleixr ler gger nia, yel nr xiaxr lol. <sup>33</sup> Yirfuxrdaexr woxrke veixr dae pia darsisi xiux yarzibbor zaza-lili mel maebbiur laxllaxr, jjiussi yixrsaexr, nineix mel sser a, sulmiuxrsaer bei gex. Yarzibbor zaza-lili sulmiuxrsaer mel gga mel sae bei teixl lei huaellael giex gex dae. <sup>34</sup> Yirfuxrdaexr woxrke veixr dae pia darsisi xiux yarzibbor zaza-lili mel sae bei teixl lei huaellael ar taex, sulmiuxrsaer ar taex, sae bei teixl lei huaellael ar taex, sulmiuxrsaer ar taex diux deix. <sup>35</sup> Yalluixr Arbosobo leil zi car, yirfuxrdaexr woxrke veixr dae pia darsisi eil xiux veixr. Yar seirceix-seirmaer giex gga Yihexrhuaxr meixsaer qir leil ddir nei ddux lei car, eil xiux leil me teixl lei dae qiurte mel leil bbejjiur a, yar leil nr si lol.

<sup>36</sup> Ni sae lillil a sser a, paexrzi ar pir bei. Hal pir leil mel ‘Bbe teixl lei a Yihexrhuaxr ddei bei,’ eine kiexl deix dae. <sup>37</sup> Yarsael laxllaxr ar zex sser a, paexrzi pir oltex zex ddei xilmeirbbaer piar a gga neixl gex gger. <sup>38</sup> Yalluixr paexrzi eil pir ngexrgazo ddei leil ddexr dae a mel, Yirsaexllixl su ca mel ho dae zzaegu mel gga Yihexrhuaxr leil weix a bbe teixl lei seirceix-seirmaer zzaegu gger hal car, yaa ddei

zuixl mel yar oldde ddei leil ddeix a. Yalluixr paexrzi eil pir ngexr-gazo ddei leil ddexr doxr dae a mel, Yihexrhuaxr Yirsaexllixl su ca mel leil nixloxdda.

<sup>39</sup> Zzir mesixlsixl hal mel sser a, lavulzzar veixrlabox pia darsisi xiux ddaexr, halae zzir mesixlsixl hal mel sser a, oltex zex bei. Yoxl vixlux naexr mel sael a, maelsael naexr.

<sup>40</sup> Yoxl Yalluixr ddei ssor mel leil lavulzzar veixrlabox pia darsisi xiux, maelsael zex nei oltex zex bei gger a, yaa leil middux lol halae yaa veixr dae a igax zae lol. <sup>41</sup> Ni pia eilmel niago Yalluixr nei yar ddei ssor mel leil veixr dae lol, yoxl yaa leil saercor ssuvi dox deix gger, yaa leil dixr har dae leiddur mel bei lol. Yaa leil ngo leil weix a bbe teixl lei a, ngo leil zi su bei lol. <sup>42</sup> Yoxl zzir mesixlsixl hal mel sser a, yaa leil luldaddur bei gger a, jiasibbor zeixl leil bbe gex dae lol. Luldaddur xiux mel zzoxxbbeix dax cirdae a pirzei zzezze ci. <sup>43</sup> Yalluixr nei yar ddei ssor mel Yoharggie Zaxlpoxr gga ddir bbeixsael ngo leil ziggie dax ssi naer a, seirceix-seirmaer giex gga ngo leil zi car, luldaddur xiux veixr dae. Nr nga a, zuixl zza a si var. Eil ddei mel Yalluixr nei yar giedae ca mel cirse-cirsil lei bei nia lixfaxr ddei nga a.”

### Arsae Bei A Sael Arbosobo Leil Zi Su Bei Cexr

**29** <sup>1</sup> “Ni ngo leil weix a Yalluixr nei yar ddei ssor mel leil bbe teixl lei a, ngo leil zi su bei lol a mel, eine bei nia: loxxbbexssor ar-ddei nei no-nr-ddexr dae yabol nnel gga si lei, <sup>2</sup> halae miljiazi ji nr goxr aba, saerco ssuvi ggiex dax dae miljiazi ji nr goxr aba nei saerco ssuvi mei deix dae miljiazi ji nr goxr aba bbolbbor mel vei si lei. Eilmel maelmaerjia lei some naxrcixl zzir mel sser a bei. <sup>3</sup> Aba eilmel beller gga ji, beller taex jiujiu vei si lei, yoxl loxxbbexssor ddei leil nei yabol nnel leil gga si lei. <sup>4</sup> Ni Yalluixr nei yar ddei ssor mel leil Yoharggie Zaxlpoxr ggucirmi hier mal lei a, ajjix sser a yaa leil ggecir cir lol. <sup>5</sup> Lavulzzar veixr ji dae zzir mesixlsixl darsisi xiux, yirfuxrdaexr xiux woxrke pia laxllaxr darsisi xiux nei yirfuxrdaexr xiux Yalluixr leil veixr gex gger. Nixmoxzo bar leil bbegexddu co yar leil ddexr gex gger, halae yirfuxrdaexr xiu leil maelsael zex Yalluixr

leil neixl gex gger. <sup>6</sup> Oltex zex yar oldde leil neixl gex gger a, Arbosobo leil weix a bbe teixl lei oldde ddexrlabox ddei oltex zex xilmeir piar a gga neixl gex gger. <sup>7</sup> Saercor ssuvi vei si la a, yar oldde ddei leil dox deix gger a, yar leil ngo leil zi su bei lol. <sup>8</sup> Yar ddei ssor mel leil hier si lei a, yaa leil zzir mesixlsixl darsisi xiux veixr gex gger. <sup>9</sup> Yalluixr nei yar ddei ssor mel leil maelsael neixl gex gger, oltex neixl gger. Ni dixr har dae leiddur eil mel bei a Yalluixr nei yar ddei ssor mel leil ngo leil visser lol. Yaa dder arddolcar ci a lei zza dae lixfaxr ddei dax zox dae a, ngo leil zi su bei cexr.

<sup>10</sup> Ni loxrbbexssor ddei leil Yoharggie Zaxlpoxr xilmeir leil gga mal lei a, Yalluixr nei yar ddei ssor mel leixrhher zze loxrbbexssor oldde ddei leil ta gex dae. <sup>11</sup> Ni, Yihexrhuaxr meixsaer qir leil Yoharggie Zaxlpoxr ggucirmi loxrbbex ddei leil seixl. <sup>12</sup> Sirnilni ar mel vei a leixrni ddei sser a, sirnilni mel ngo leil zzeir seixlziggie ddei giexrluxl baexlaex li baex leil mei gex gger. Nirzwei dae sirnilni mel, hal taex qihher leil dox deix gger. <sup>13</sup> Yoxl xilbe zzar hher ji dae mel leil bbe gex dae cae halmel, seir naxrcixl zzir hal do, halae yazi nr taex nei yazi mel leil niar dae cae mel, maelmaerjia lei zzeir seixlziggie ddei leil cu. <sup>14</sup> Nael loxrbbexssor ddei hor, zzi, nei sir mel nia hher ggie maelleil cu pixl. Niur eil ddei mel dder zuixl ssoxrsuxl lol a zi dae ddei nga a.

<sup>15</sup> Ni yabol ar ddei gga si lei a, Yalluixr nei yar ddei ssor mel leixrhher zze yabol eil ddei oldde taex leil ta gex dae. <sup>16</sup> Yel yabol eil ddei leil seixl zil gger a, sirnilni mel zzeir seixlziggie ddei leil zazalili beil deix gger. <sup>17</sup> Ni yabol eil ddei leil circo-circo ddaex mal gger, vuxil nei qihher mel seibeixbeix a cir a, oldde taex leil nei circo-circo hoxr mel leil dol deix gger. <sup>18</sup> Yabol cirddei-lorbba zzeir seixlziggie ddei leil cu. Eil ddei mel dder adoxl gga cu a, Yihexrhuaxr leil ggese lol a xiuzixzixmo zi dae ddei nga a.

<sup>19</sup> Ni kebal yabol ar ddei gga si lei a, Yalluixr nei yar ddei ssor mel leixrhher zze yabol eil ddei oldde taex leil ta gex dae. <sup>20</sup> Yel yabol eil ddei leil seixl a, sirnilni ardoxr vei a, Yalluixr nei yar ddei ssor mel ddei nolba yobbor ddei nolzox leil mei gex gger. Yoxl yaa ddei leixrhher yobbor ddei leixrnimo ci leil nei qihher yobbor ddei cini-

mo ci leil mei gex gger. Halae sirnilni mel zzeir seixlziggie ddei leil zaza-lili beil deix gger. <sup>21</sup> Ni meilabox saercor ssuvi ardoxr nei zzeir seixlziggie ddei leil sirnilni ardoxr vei a, Yalluixr nei yar pia xiux leil halae yar ddei ssor mel leil nei yaa ddei pia mel leil beil deix gger. Eine nga a mel yaa nei yaa ddei pia mel dder ngo leil weix a bbe teixl lei a.

<sup>22</sup> Yabol eil ddei mel yaa leil ngo leil zi su bei beil lol a zilabox yabol ddei nga a. Yel ni yabol eil ddei ggecir leil cae mel nei maeldae, halae xilbezzar hher ji dae mel leil bbe gex dae cae hal mel, seir naxrcixl zzir hal do, yazi nr taex nei yazi mel leil niar dae cae mel, halae pirzei yo bbor caer zei lei. <sup>23</sup> Ni yoxl Yihexrhuaxr meixsaer qir leil dol dae miljiazi ji nr goxr aba mel ji dae beller taex gga aba ar pir, ssuvi mei deix dae aba ar pir, aba bbolbbor ar pir vei teixl lei. <sup>24</sup> Eilmel maelmaerjjia Yalluixr nei yar ddei ssor leixrhher mel gga dol ji gger a go a zilabox bei a, Yihexrhuaxr meixsaer qir leil go. <sup>25</sup> Ni yoxl yaa leixrhher gga vei dae mel vei gel lei a, Yihexrhuaxr meixsaer qir leil zzeir seixlziggie ddei leil adoxl cu a zilabox mel leil cu deix gger. Eil ddei mel dder adoxl gga cu a, ngo leil ggese lol a xiuzixzixmo zi dae ddei nga a.

<sup>26</sup> Ni Yalluixr leil ngo leil zi su bei beil lol a, ngo leil gger dae yabol ddei nixmoxzo ddei vei a, go a zilabox bei a ngo meixsaer qir leil go. Eil ddei dder ni li wo ddo a. <sup>27</sup> Ni Yalluixr leil nei yar ssor mel leil ngo leil zi su bei beil lol a, yabol hal ddei ddei go a zilabox nixmoxzo nei bil du lei a zilabox pirzei halmel ngo leil weix a bbe teixl lei a. Hor eil mel mel Yalluixr nei yar ddei ssor mel ddei a.<sup>n</sup> <sup>28</sup> Eil mel mel Yirsaexllixl su ca mel zzasoso qiuxr a zi dae mel gga bil du lei a, Yihexrhuaxr leil zilabox mel nga a. Eil mel mel Yalluixr nei yar giedae ca mel Yirsaexllixl su ca mel dax arddolcar ci a lei li wo mibbe lixfaxr ddei nga a.

<sup>29</sup> Yalluixr si ho a, yar Yihexrhuaxr leil zi a veixr dae pia tox yar giedae ca mel leil gger. Yaa leil ssuvi dox deix gger a, dixr har dae leiddur mel bei a, ngo leil zi su bei beil lol a veixr. <sup>30</sup> Yar ddei giedae

---

<sup>n</sup>29:27 Hor eil mel mel Yalluixr nei yar ddei ssor mel ddei a. Yaa zzor cexr.



ca mel gga yar ddei dirtu bei a, ngo leil zi su bei su ddei<sup>o</sup> Yoharggie Zaxlpoxr gga ddir a, seirceix-seirmaer giex gga ngo leil visser car, ngo leil zi a veixrlabox pia tox sir ni veixr.

<sup>31</sup> Ni Yalluixr nei yar ddei ssor mel leil ngo leil zi su bei beil lol a sser dae yabol hor mel ngo leil weix a bbe teixl ggie halmaex gga zeixl. <sup>32</sup> Yalluixr nei yar ddei ssor mel Yoharggie Zaxlpoxr ggucirmi yabol eil ddei ddei hor mel nei beller taex gga ddei aba mel zzor.

<sup>33</sup> Zzorladox eil mel yaa ddei zuixl mel leil bbe gex dae a mel, ngo leil weix a yaa leil bbe teix lei a, ngo leil zi su bei cexr. Zzorddu eilmel mel ngo leil weix a bbe teixl lei a, yel kebal su ca mel zzor nr ddo. <sup>34</sup> Eilneixrnehe ci a lei (yabol eil ddei ddei) hor nei aba mel zzor nr jjia arddeirnga a dder adoxl cu pixl gger. Zzorddu eil mel ngo leil weix a bbe teixl lei a. Yel zzor nr ddo.

<sup>35</sup> Ni, ngo ni leil miardal dae hazza dax zox dae a, Yalluixr nei yar ddei ssor mel leil [ngo leil zi su bei beil lol a, yaa leil dixr har dae leiddur mel bei lol a], sir ni goxr. <sup>36</sup> Bbecir-bbeni lei zuixl ssoxrsuxl lol a zi dae loxrbbex arddei zi a, yaa ddei zuixl mel leil bbe gex dae lol, halae zzeir seixlziggie ddei leil [seibeix] lol. Halae saercor ssuvi sser a, zzeir seixlziggie ddei leil mei a, ngo leil weix a bbe teixl lei.

<sup>37</sup> Ni eine sir ni bei doxr a, zzeir seixlziggie ddei ngo leil weix a bbe teixl lei a. Eine nga a zzeir seixlziggie ddei yarzi seirceix-seirmaer loxr a. Ha hal ddei leil ta dae mel dder ngo leil weix a bbe teixl lei a.”

### Bbecir-bbeni Arbosobo Leil Zilabox Mel

<sup>38</sup> “Ni bbecir-bbeni zzeir seixlziggie ddei leil cir koxl loxr yassor nnel zi a, yilzi a zi zeisi. <sup>39</sup> Eilneixrnehe arddei zi; mercixl a arddei zi. <sup>40</sup> Eilneixrnehe yassor hal ddei zi car, some mesixlsixl ar zi nei saercor ssuvi ar se cirgo a ggiex xiux a; yoxl puxrto zzubbaer ar zi sser a zziseixl bei. <sup>41</sup> Mercixl a kebal yassor hal ddei zi a lei, eilneixrnehe sael a some mesixlsixl nei puxrto zzubbaer zi mel sael a zi. Ni xiuzixzix arla eilmel adoxl gga cu a, Yihexrhuaxr leil zi a, Yihexr-

<sup>o</sup>29:30 Yar ddei giedae ca mel gga yar ddei dirtu bei a, ngo leil zi su bei su ddei Ca eil ddei mel dder Arbosobo leil zi su vaerzzir ddei nga a.

huaxr leil ggese lol a. <sup>42</sup> Eil ddei mel nia cirzeix-hanga Yihexrhuaxr meixsaer qir leil, Yoharggie Zaxlpoxr ggucirmi, yilzi a adoxl gga cu a zi dae ddei bei. Ngo halmaex gga nia dax yo har dae a, nia dax ddar biar. <sup>43</sup> Ngo halmaex gga Yirsaexllixl su ca mel dax yo har a yaa leil mia. Ngo ddei bbobbolbbo mel Yoharggie Zaxlpoxr giex leil zo gex dae a, Zaxlpoxr giex dder ngo leil zi ggie (seirceix-seirmaer xi giex) loxr a. <sup>44</sup> Ngo Yoharggie Zaxlpoxr ddei leil nei zzeir seixl-ziggie ddei leil bbe teixl lei a ngo ddei bei. Halae Yalluixr nei yar ddei ssor mel leil ngo leil weix a bbe teixl lei a, ngo leil zi su bei lol. <sup>45</sup> Ngo Yirsaexllixl su ca mel dax hher dax dae a, yaa ddei Arboso-bo bei. <sup>46</sup> Yaa ngo mel Yihexrhuaxr yaa ddei Arbosobo a saexl. Ngo yaa dax hher dax niazzir a, yaa leil Aezixr goxrjia gga hier teixl lei su ddei a saexl. Ngo mel Yihexrhuaxr yaa ddei Arbosobo a.”

### Nerxiuxiu Hexzzi Doxl Deix Ddu

**30** <sup>1</sup> Ni zaxljiaxr muxl sser a, [nerxiuxiu hexzzi] doxl deix ddu ar taex bei. <sup>2</sup> Eil taex mel sixlfa ar taex. Siggiebbaer nei kuax-ggiebbaer nael liceingor (45) gofei; muggiebbaer nael gecei (90) gofei. Eil taex ddei giexrluxl baexlaex li baex jjia lei eil taex leil niar gex dae lol. <sup>3</sup> Yoxl sae lillil a sser a, eil taex leil zaza-lili nei giexrluxl baexlaex li baex leil ba gex du lei. Yoxl sae sser a, eil taex ddei agala gga zaza-lili yarqir ar lel bei gex. <sup>4</sup> Eil taex leil billabox sae nolvar cir piar a gga ar ddei bei a, yarqir woxrke hha gex. Eine nga a mel, eil taex leil billabox daxrzzo nr caex dder sae dil cexr a. <sup>5</sup> Zaxljiaxr muxl sser a daxrzzo bei, sae sser a ba gex du lei. <sup>6</sup> Nerxiuxiu hexzzi doxl deix ddu taex yueguixl ddei xilmeir mae giex gex dae co mael leil dol a, yueguixl leil ggabilddu ddei dax mal dae lol, hher-dder ngo ni dax yo har zaxr a, ni leil mia nia halmaex gga nga a. <sup>7</sup> Yalluixr bbecir-bbene de mel leil geso car, nerxiuxiu bei teixl lei hexzzi mel hexzzi doxl deix ddu taex leil doxl. <sup>8</sup> Mercixl a de doxl car, yar Yihexrhuaxr meixsaer qir leil hexzzi eilmel doxl a, cirzeix-hanga a bbecir-bbeni doxllabox hexzzi mel bei. <sup>9</sup> Nerxiuxiu hexzzi doxl deix ddu eil taex leil kebal hexzzi mel doxl nr ddo, adoxl gga cu a zi dae mel, loxlmoxr zi dae mel, halae puxrto zzubbaer, ssuvi, nei

sirnildi zi nr ddo. <sup>10</sup> Nael Yalluixr zuixl ssoxrsuxl lol a zi dae zzeir mel ddei sirnildi sser a, nerxiuxiu hexzzi doxl deix ddu taex ddei baexlaexlaex li baex leil mei a, cir koxl ar boxl seibeix lol. Cirzeix-hanga bbecir-bbekoxl lei eine bei. Nerxiuxiu hexzzi doxl deix ddu eil taex Yihexrhuaxr leil weix a, yarzi seirceix-seirmaer loxr a.

### Sexlmuxl Leil Sserlabox Zzirbae Gger

<sup>11</sup> Yihexrhuaxr Moxrxi leil bbeix gger a bbeix: <sup>12</sup> “Ni Yirsaexllixl su ca mel leil hhe car, hormo sael zza bbe suax, yaa cirddei-hanga lei armael ddei olga ddei leil weix a, olga vae per ddei Yihexrhuaxr leil gger. Nr nga a, hhe car, cassor-worssor mel goxrsol-goxrnar pexr dae var. <sup>13</sup> Ha mi zix deix dae ca mel dder Sexlmuxl gga bbeix dae per ddei dax zox dae a, Yihexrhvar leil piu ar doxr gger. <sup>14</sup> Ha hhe wo ca mel, nrzei koxl leil ddeix halmel, per eil ddei Yihexrhuaxr leil ho. <sup>15</sup> Olga [vae xixl lei] per eil ddei Yihexrhuaxr leil gger a mel, be bbeixsael sol eine nr bbe. Be su mel lei gger miur nr ddo, sol su mel lei gger nganiul nr ddo. <sup>16</sup> Ni Yirsaexllixl su ca mel dax piu eilmel se si lei a mel, Yoharggie Zaxlpoxr ddei sserlabox bei. Piu eil mel mel yaa [olga vae xixl lei] per gger a Yihexrhvar leil yaa leil holcir dae lol.”

### Zzir Larggu

<sup>17</sup> Yihexrhuaxr Moxrxi leil bbeix gger a bbeix: <sup>18</sup> “Ni zzir sser a cirlabox larggu nei larggu dol deix labox ar ddei bei. Larggu ddei Yoharggie Zaxlpoxr nei zzeir seixlziggie agala gga dol, larggu ddei gga ajjix ji. <sup>19</sup> Yalluixr nei yar ddei ssor mel larggu eil ddei gga ajji mel sser a qihher leixrhher cir. <sup>20</sup> Yaa Yoharggie Zaxlpoxr gga ddir a Yihexrhuaxr leil visser a bbeixsael zzeir seixlziggie ddei dax lei naer a ziddu mel adoxl gga cu a Yihexrhuaxr leil zi car, ajjix eilmel sser a cir, nr nga a si var. <sup>21</sup> Yaa qihher leixrhher cir a dder si nr var. Eil ddei mel Yalluixr nei yar giedae ca cirzeix-hanga cirse-cirsil bei mae dae nia lixfar ddei bei.”

## Sexlmuxl Gga Sserlabox Saercor Ssuvi

<sup>22</sup> Yihexrhuaxr Moxrxi leil bbeix gger a bbeix: <sup>23</sup> “Ni nerxiuxiu naxrcixl zzir hherdder zzeix teixl lei moxlyoxl qiuxl zi, nerxiuxiu ssexlguixl so zi, nerxiuxiu capu so zi, <sup>24</sup> guixlpixr qiuxl zi vei si lei nia. Eilmel mel maelmaerjjia lei Seirceix-seirmaer Giex gga bbeix dae leiddur mel dax zox dae a, halmel miumiu nga nia. Yoxl saercor ssuvi li zi vei dax nia. <sup>25</sup> Ni eilmel sser a, nerxiuxiu bei su mel sael bei a, ngo leil weix a bbe teixl lei a meilabox ssuvi bei mal gger. <sup>26</sup> Yel meilabox ssuvi eilmel sser a, Yoharggie Zaxlpoxr ddei leil nei yueguixl ddei leil, <sup>27</sup> zaezir nei zaezir ddei leil sser dae hazza leil, de doxl deix ddu nei de doxl deix ddu ddei leil sser dae hazza leil, nerxiuxiu hexzzi doxl deix ddu taex leil, <sup>28</sup> adoxl gga cu a zzeir seixl-ziggie nei seixlziggie ddei leil sser dae hazza leil, cirlabox larggu nei larggu dol deix labox eilmel maelmaerjjia leil mei deix. <sup>29</sup> Eilmel ngo leil weix a bbe teix lei a, yarzi seirceix-seirmaer loxr lol. Ha eilmel leil ta dae mel lei ngo leil weix a, bbe teixl leil a. <sup>30</sup> Yalluixr nei yar ddei ssor mel leil ssuvi dox deix gger a, ngo leil weix a bbe teixl lei a, ngo leil zi su bei cexr. <sup>31</sup> Ni Yirsaexllixl su ca mel leil bbeix gger a bbeix: ‘Nia cirzeix-hanga ngo leil zi car, ngo leil weix a bbe teixl lei a dox deix labox ssuvi eilmel sser. <sup>32</sup> Eilmel mel kebal ca mel leil dox deix gger nr ddo, halae eilmel sael a bei a, eilmel lesel ar mel bei nr ddo. Ssuvi eilmel mel ngo leil weix a bbe teixl lei a, yel nia lei ngo ddei nga a i mal gger. <sup>33</sup> Ssuvi eilmel lesel bei su ca zza bbeixsael arseir ngo leil zi su nr nga ca mel leil dox deix gger arddeirnga a, ca eil ddei leil dder ngo ddei ca mel dax \*\* [cirgo a nr hher lol/ggaxr teixl gger], eine bbeix gger nia.”

## Nerxiuxiu Hexzzi

<sup>34</sup> Yihexrhuaxr yoxl Moxrxi leil bbeix: “Ni naxrtafuxr, sixirlixl, xirlixl-birnaxr nei rurxia lillil nerxiuxiu eil mel ciryoxr-hanga lei zzi dax miumiu a vei si lei nia. <sup>35</sup> Ni eilmel sser a, nerxiuxiu hexzzi bei su mel sael a ggiex a, cor ji dax a, ngo leil weix a bbe teixl lei a [bota ddu nr zza] nerxiuxiu hexzzi bei mal nia. <sup>36</sup> Ni hexzzi eilmel ardoxr

vei a melme a deil mal a, Yoharggie Zaxlpoxr gga yueguixl xilmeir leil dol dae. Ngo halmaex gga ni dax yo har a, ni leil mia nia. Nia nerxiuxiu hexzzi eilmel leil yarzi seirceix-seirmaer i mal gger. <sup>37</sup> Nia nerxiuxiu hexzzi eilmel sael a bei a, armael leil hexzzi bei gger nr ddo. Nerxiuxiu hexzzi eilmel leil Yihexrhuaxr leil weix a bbe teixl lei a i mal gger. <sup>38</sup> Ha nerxiuxiu hexzzi eilmel sael a bei a ner ar-ddeirnga a, ca eil ddei leil dder ngo ddei ca mel dax [ggaxr teixl gger/cirgo a nr hher lol].”

### Sexlmuxl Bei Gger Su Ca

**31** <sup>1</sup> Yihexrhuaxr Moxrxi leil bbeix gger a bbeix: <sup>2</sup> “I ddo a! Ngo Yoxrdaxl ddei cuxr gga Hul'aer ddei lilbol, Wulixl ddei ssor, Birsarlxl leil tiur har ho a. <sup>3</sup> Ngo lei ngo ddei Xiu ddei yar dax bbil-bbi hher ji dae lol ho a; yel yar leil olnolddu lol, jilixr lol, azo lei saexl lol, cirza-hanga leixrhher miar bei bbesur zza lol, <sup>4</sup> cirza-hanga ar-sae bei nia xiar teixl lei xie lol a, piu, sae nei zzir sser a, azo zzaegu lei ddaexr var lol, <sup>5</sup> yoxl balsixr kiexl var lol hha gex var lol, six mel leil lei kiexl var lol, azo lerler leixrhher miar hazzi zae bei var lol. <sup>6</sup> Ngo yoxl Daxl ddei cuxr gga Yalxisarmor ddei ssor Yalhexrlixlyalboxr leil miardal a, Birsarlxl leil beijjiu lol. Ngo halae kebal azo bei a lei yarzi bei seir yarzi bei naxrcixl ca hal mel leil olnolddu lol a, yel yaa leil ngo miardal dae hazza bei var lol: <sup>7</sup> hherdder Yoharggie Zaxlpoxr, yueguixl, yueguixl ddei leil ggabilddu, Yoharggie Zaxlpoxr gga sser dae hazza, <sup>8</sup> zaezir nei zaezir ddei leil sser dae hazza, sae lillil a bei teixl lei de doxl deix ddu nei de doxl deix ddu ddei leil sser dae hazza, nerxiuxiu hexzzi doxl deix ddu taex <sup>9</sup> adoxl gga cu a zzeir seixlziggie taex nei halmaex sser dae hazza, halae cirlabox larggu nei larggu dol deix ddu ddei, <sup>10</sup> yarzi naexr naxrcixl naexr teixl lei pia mel, ngo leil zi su Yalluixr nei yar ddei ssor mel \* [ngo leil zi] a veixr ddu pia mel, <sup>11</sup> halae mei labox saercor ssuvi nei Seirceix-seirmaer Giex gga sser labox nerxiuxiu hexzzi eilmel nga a. Eilmel maelmaerjjia lei yaa ngo yaa leil miardal dae mel dax zox dae a bei.”

## Wornol Nixixl Cir Ni

<sup>12</sup> Yihexrhuaxr yoxl Moxrxi leil bbeix gger a bbeix: <sup>13</sup> “Ni Yirsaexl-lixl su ca mel leil miardal a bbeix: ‘Nia arsaebeilei ngo ddei wornol nixixl cir ni goxr nia. Eil ddei mel ngo nia cirzeix-hanga dax bbeix-harzaxr a hoxltexr bei dae ddei nga a. Ngo eine bei a mel nia leil ngo mel Yihexrhuaxr, ngo nia leil seirceix-seirmaer lol saexl lol. <sup>14</sup> Yel nia wornol nixixl cir ni goxr nia. Eil ni mel kebal nixixl dax bbe teixl lei cir ni nga a. Ha arseir eil ni [bulguaxr-laxlsixr bei/nrbba nrbba bei] a mel, bei zil gger nia. Ha arseir eil ni gga miar bei a mel, ngo ddei ca mel dax nr hher lol. <sup>15</sup> Miar qiuxl ni bei, nael sir ni cir ni mel kebal nixixl dax bbe teixl lei a wornol nixixl a. Hal cir ni mel Yihexrhuaxr ddei nixixl a. Ha arseir wornol nixixl cir ni miar bei a mel, bei zil gger nia. <sup>16</sup> Yirsaexllixl su ca mel cirzeix-hanga wornol nixixl goxr nia. Eil ddei arddolcar ci a lei ngo nia dax bbeixharzaxr dae ddei bei. <sup>17</sup> Eil ddei mel ngo nei Yirsaexllixl su ca mel arddolcar ci a lei hoxltexr ddei nga a. Yihexrhuaxr [mel] qiuxl ni ddei gga mercoxl-micoxl, nael sir ni cir ni miar nr bei wornol a.”

<sup>18</sup> Yihexrhuaxr Xinaer worga ga leil Moxrxi dax ddar bbeix jjia a dder, dixl har dae lixfaxr mel vaexr deix dae legelbbe nr pir yar leil gger a; hherdder Arbosobo leixrni sser a vaexr legelbbe nr pir nga a.

Cassor-worssor Mel Sae Sser A Bei  
Teixl Lei Niurssor Bbex Ddei Leil Zi

**32** <sup>1</sup> Yirsaexllixl su ca mel Moxrxi hormo nixixl nga a lei worga leil zei nr jjixr lei mia a dder Yalluixr dax lei a bbeix: “Ngua, ngua leil Aezixr goxrjia gga hier teixl lei su Moxrxi ddei azo lerler pex dae a nr saexl, yel ni ngua leil xilmeirbbaer jjiimo hier su bbex bei gger nia!” <sup>2</sup> Yalluixr yaa leil bbeix: “Nia, nia maerssor nei aniux mel ddei nolba leil sae nolzzu mel lixr teixl la a, ngo leil vei mal gger la,” eine bbeix a. <sup>3</sup> Cassor-worssor mel dder yaa nolba leil sae nolzzu mel lixr teixl lei a, Yalluixr leil vei mal gger lei a. <sup>4</sup> Yalluixr yaa leixrga gga vei gel lei a, kiexl labox zzaegu mel sser a kiexl a,

niurssor bbex ar ddei bei teixl lei a. Yaa dder bbeix: “Yirsaexllixl, eil ddei mel dder ni leil Aezixr goxrjia gga hier teixl lei su bbex mel nga a.”<sup>5</sup> Yel Yalluixr dder niurssor bbex ddei xilmeir zzeir seixlzi-ggie ar ddei bei, halae ca mel leil bbeix gger a bbeix: “Arggeni mel Yihexrhuaxr ddei jiax goxr,” eine bbeix a.<sup>6</sup> Giedae cir nehe, cassor-worssor mel lei a adoxl gga cu a ziddu zzeir nei zzaso lol qiuxr a ziddu zzeir mel zi. Yaa dder cux dae a zzae zzorzzor-ddadda, ha du lei a zzae nrbba-nrbba gaxggor.

<sup>7</sup> Yihexrhuaxr Moxrxi leil bbeix: “Ni nialnga worga leil zei jjixr nia! Ni Aezixr goxrjia gga hier teixl lei cassor-worssor mel \*\*zuixl bei a, ngo dax bei nr mae a.”<sup>8</sup> Yaa mel eine cirleixr dder ngo yaa leil miardal a ssi lol jjiumo zex leil nr ssi a. Yaa armael leil niurssor bbex ar ddei bei gger a, hal ddei leil cizixl gger a zi a bbeix: ‘Yirsaexllixl, eil ddei mel dder ni leil Aezixr goxrjia gga hier teixl lei su bbex mel nga a,’ ” eine bbeix.

<sup>9</sup> Yihexrhuaxr Moxrxi leil bbeix: “Ngo i dae a, cassor-worssor eilmel mel nixmox yarzi gex noni dil nr ddo cassor-worssor ar mel a.”<sup>10</sup> Eilcar, ni ngo leil tor bbiur nr gex dae, ngo yaa leil seifu daxlgaxl faex a, yaa leil bei zil jjia gger a, ni giedae ca mel leil goxrjia vaervaer ar ddei loxr lol nia.”

<sup>11</sup> Nael Moxrxi dder Yihexrhuaxr yar ddei Arbosobo leil zabbar-seilseir a qiuxr a bbeix: “Yihexrhuaxr, ni arsaenga a ni ddei cassor-worssor mel dax seifu daxlgaxl faex leir? Cassor-worssor eilmel mel ni yarzi ddo yarzi worni leixrhher bbor sser a Aezixr goxrjia gga hier teixl lei mel nga a.”<sup>12</sup> Arsaenga a Aezixr su ca mel leil ‘Yar yaa leil hier teixl a mel, \*\*yaa leil faxr a, yaa leil worga leil seixl zil gger a, yaa leil middur ddei leil mier lol niazzir a nga arddeir a,’ eine bbeix lol leir? Ngo ni leil qiuxr, ni nixmox taex za xixl lei a seifu tor nr faex, ni xiar dae mel gierbox a, ni ddei cassor-worssor mel leil tor nr faxr.”<sup>13</sup> Ni leil qiuxr, ni, ni leil miar bei gger su Yalboxrlahar, Yirsar, nei Yirsaexllixl leil holcir dae. Ni halleix armael leil dor dae a yaa dax bbeixharzaxr a bbeix: ‘Ngo nia giedae ca mel leil merlabbor gie mel sael a miur lol nia. Halae ngo nia dax nia leil gger nia bbeixharzaxr dae middei mel nia giedae ca mel leil gger nia. Yaa

cirse-cirsil middei eilmel li wor nia,' eine bbeix goxr a." <sup>14</sup> Yel Yi-hexrhuaxr yar xiar dae mel gierbox a, yar ddei cassor-worssor mel leil \*\*faxr nia bbeix dae mel nr faxr a.

### Moxrxi Seifu Faex A, Legelbbe Nr Pir Zax Xiaxr Gger

<sup>15</sup> Moxrxi za xixl lei a worga leil ze jjiur a. Leixrhher gga dixl har dae lixfaxr mel vaexr deix dae legelbbe hal nr pir vei dae. Eil nr pir mel nr piar jjia lei sul vaexr deix dae. <sup>16</sup> Legelbbe eil nr pir mel Arbosobo armael bei a; sul mel mel Arbosobo vaexr a; Arbosobo legelbbe mel leil kiexl deix a.

<sup>17</sup> Yuesuyal cassor-worssor mel ae ggie bbejjiur a qie dder Moxrxi dax bbeix: "Ca mel hherggie zaxlddaexr dae qiurbbi me dae!"

<sup>18</sup> Moxrxi bbeix: "Eilmel mel ca mel zaxlddaexr leixl ddei qiurbbi nr nga; ca mel zaxlddaexr wor nr xie ddei qiurbbi lei nr nga; ngo bbejjiur wo mel mel ca mel caxlgo caxl dae qiurbbi a." <sup>19</sup> Moxrxi ca mel hherggie ssi naer ci a dder niurssor bbex ddei leil mia, yoxl ca mel huade tiuxl ggie mia a dder seifu daxlgaxl faex a, legelbbe nr pir worjibbei dax piar dol gger a, zax me gger a. <sup>20</sup> Yoxl yaa bei teixl lei niurssor bbex ddei adoxl gga cu a, melme bei mal gger a, ajjix teixl leil xiu deix gger a, Yirsaexllixl su ca mel leil ddoddo-nrddo dda lol.

<sup>21</sup> Moxrxi Yalluixr leil bbeix: "Cassor-worssor eilmel ni leil azo bei a leir? Ni yaa leil einezeixl larhor zuixl bei lol!" <sup>22</sup> Yalluixr bbeix: "Ngo ddei seirpor, seifu tor nr faex. Cassor-worssor eilmel zuixl bei meixr mel ni saexl. <sup>23</sup> Yaa ngo leil bbeix: 'Nguua, nguua leil Aezixr goxrjia gga hier teixl lei su Moxrxi ddei azo lerler pex dae a nr saexl, yel ni nguua leil xilmeirbbaer jjiumo hier su bbex bei gger nia!' eine bbeix. <sup>24</sup> Yel ngo yaa leil bbeix: 'Ha sae bei teixl lei ddexrlabox zza su mel lixr ze lei ddo' bbeix a, yaa dder ngo leil gger a. Ngo sae ddexrlabox mel adoxl gga piar ji gger a, niurssor bbex eil ddei dder ddux lei a!" eine bbeix a.

<sup>25</sup> Moxrxi i dae a Yalluixr ca mel leil guaxr ze nr xie a, yel yaa [yarzzir-yarleixr bei/arsae bei niazzir arsae bei/vurleixl-vuzir bei] a, yaa leil dir su ca mel ddei vaessi ddu loxr a. <sup>26</sup> Yel yar dder ca



mel hherggie gielmi ggucirmi ngier dae a bbeix: “Ha Yihexrhuaxr dax bei mae su ca mel ngo dax eilmaex lei!” bbeix a, Lixlweixl ddei giedae ca hazza dder yar dax hher pex lei a. <sup>27</sup> Yar yaa leil bbeix: “Yihexrhuaxr Yirsaexllixl ddei Arbosobo bbeix: ‘Nia cirddei-hanga altor baex zzoxrbbeix dax ddexr dae a, ca hherggie gielmi eil peixl dax cirdae a hal peixl dax ssi jiax a, cirddei-hanga yar ddei arzzi-nimar nei gaxggor-carbeix halae goxr naer dae ca mel leil seixl nia,’ ” eine bbeix a. <sup>28</sup> Lixlweixl ddei giedae ca mel Moxrxi ddei ddar mel dax zox dae a bei a. Hal cir ni cassor-worssor mel gga seixl zil gger ca mel mel sodu sael zza. <sup>29</sup> Moxrxi bbeix: “Eilni nia nia ddei ssor nei arzzi-nimar mel leil dir a, nia Yihexrhuaxr leil weixl a bbe teixl lei a, yar leil visser su bei cexr. Yel Yihexrhuaxr nia leil seir lol.”

<sup>30</sup> Giedae cir ni ci a, Moxrxi cassor-worssor mel leil bbeix: “Nia yarzisael larhor zuixl bei a. Eilcar ngo zeixleixr Yihexrhuaxr dax halmaex ddeix a, nia leil yar dax qiuxr gger ssi a, nrbba yar nia ddei zuixl mel leil ssoxrsuxl var piar,” eine bbeix a. <sup>31</sup> Moxrxi Yihexrhuaxr dax halmaex jjixr ci a bbeix: “Ael a aer! Cassor-worssor eilmel yarzisael larhor zuixl bei a, armael leil sae bbex ar ddei bei gger a. <sup>32</sup> Yel ni leil qiuxr, eilcar ni yaa ddei zuixl mel leil ssoxrsuxl la. Nr nga nael, ni ni ddei sul ber<sup>p</sup> leil ngo ddei mi ddei bei pixl gger ssi.” <sup>33</sup> Yihexrhuaxr Moxrxi leil bbeix: “Arseir ngo leil de dae a mel, ngo dder ngo ddei sul ber leil arseir ddei mi ddei bei pixl gger. <sup>34</sup> Eilcar ni ssi ddo a. Cassor-worssor mel leil ngo ni leil bbeix gger dae middei ddei gga hier mal nia. Ngo ddei tisir ddei ni xilmeirbbaer jjiumo hier dae nia. Nael ngo faxr nixixl ddei ci a, ngo arsaebeilei yaa ddei zuixl mel leil faxr nia,” eine bbeix a.

<sup>35</sup> Yihexrhuaxr cassor-worssor mel leil seixl a mel, yaa Yalluixr dax cirgo a niurssor bbex bei a nga arddeir a.

Yihexrhuaxr Yirsaexllixl Su Ca Mel Leil Miardal A Ssi Lol

**33** <sup>1</sup> Yihexrhuaxr Moxrxi leil bbeix: “Ngo halleix Yalboxrlahar, Yirsar nei Yargel dax bbeix har zaxr a bbeix: ‘Jianaxr mermi

<sup>p</sup>32:32 ni ddei sul ber Sul eil ber mel Arbosobo ddei cassor-worssor mel ddei mi vaexr deix dae hal ber nga a.

ddei ni giedae ca mel leil gger nia' eine bbeix goxr a. Eilcar ni nei ni Aezixr goxrjia gga hier teixl lei cassor-worssor mel, eilmaex cirdae a middei hal ddei gga ddeix nia. <sup>2</sup> Ngo tisir ddei leil zi a ni xilmeir ssi lol nia. Ngo Jianaxr su ca, Yalmoxrlixl su ca, Hexl su ca, Birlixlxir su ca, Xiweixl su ca nei Yibulsi su ca mel leil ggaxr teixl gger a, <sup>3</sup> ni leil baxr nei bbiurvi bbe ggie middei halmaex gga hier dil nia. Nael nia mel nixmox gex noni dil nr ddo cassor-worssor ar mel a. Argaxl jjiumo car gga, ngo nia leil bei zil jjia gger leilei, yel ngo nia dax cirter a nr ddeix," eine bbeix a.

<sup>4</sup> Cassor-worssor mel ddar nr seir eilmel noni ho a dder cix a, ggecir leil ddexr labox zaelzae mel ddexr su ca nr zza a. <sup>5</sup> Yihexrhuaxr Moxrxi leil bbeix: "Ni Yirsaexllixl su ca mel leil bbeix gger a bbeix: 'Nia mel nixmox gex noni dil nr ddo cassor-worssor ar mel a. Ngo nia dax cirgo a ssi arddeirnga a, cirleixr a nga seir dder nia leil bei zil jjia gger leilei. Eilcar, nia ggecir leil ddexr dae zaelzae mel lixr teixl lei a, ngo dder nia leil arsae bei nia saexl a,' eine bbeix nia."

<sup>6</sup> Yel Yirsaexllixl su ca mel Hexrlixl worga dax ddux lei ho a dder ggecir leil ddexr dae zaelzae mel lixr teixl jjia a.

### Yoharggie Zaxlpoxr

<sup>7</sup> Moxrxi zoxlzoxl a zaxlpoxr ddei yaa hherggie maelleil daxr, yaa hherggie dax giex vimir. Yar zaxlpoxr eil ddei leil Yoharggie Zaxlpoxr bbeix. Ha Yihexrhuaxr leil qiuxr a yar leil biex su mel dder ddux a, yaa hherggie maelleil Yoharggie Zaxlpoxr dax halmaex ssi. <sup>8</sup> Moxrxi yaa hherggie ddux a Yoharggie Zaxlpoxr dax ssi car, cassor-worssor mel dder ha du lei a, yaa armael ddei zaxlpoxr ddei alddur ggucirmi ngier dae a, Moxrxi leil i dae a, yar Yoharggie Zaxlpoxr gga ddir ho zzeze ci. <sup>9</sup> Moxrxi zaxlpoxr gga ddir car, sseigu lesel zico mel dder zei lei a, zaxlpoxr alddur ggucirmi nor dae a. Yel Yihexrhuaxr dder Moxrxi dax ddar biar. <sup>10</sup> Cassor-worssor mel sseigu lesel zico mel zaxlpoxr alddur ggucirmi nor dae ggie mia a dder ngier du lei a, yaa armael ddei zaxlpoxr alddur ggucirmi Arbosobo leil cizixl gger. <sup>11</sup> Yihexrhuaxr Moxrxi dax qiaxrmeix ddei zzi leil mal dae a ddar biar a mel, ca mel yaa gaxggor-carbeix dax

ddar biar mel sael a nga. Giedae Moxrxi yaa hherggie jjixr a. Nael yar leil beijjiu su caleixlssor, Nexl ddei ssor, Yuesuyal zaxlpoxr gga nr ddux.

### Moxrxi Yihexrhuaxr Ddei Bbobolbbo Mel Leil Mia

<sup>12</sup> Moxrxi Yihexrhuaxr leil bbeix: “Ni ngo leil miardal a bbeix: “Cassor-worssor eilmel leil hier deix lei,” eine bbeix goxr a. Nael ni arseir leil miardal a, ngo dax cirgo a ssi lol zzael ngo leil nr saexl lol. Ni ‘Ngo ni ddei mi ddei leil zox dae a ni leil saexl, ngo lei ni leil seirseir meixl gger,’ eine lar bbeix goxr. <sup>13</sup> Yel, ni ngo leil seirseir meixl gger arddeirnga a, ni leil qiuxr, ni xiar dae mel ngo leil bbeix gger a, ngo leil ni leil saexl lol a, yilzi a ngo leil seirseir meixl gger. Ni leil qiuxr, ni lei ca eil mel ni ddei cassor-worssor a holcir dae la.” <sup>14</sup> Yihexrhuaxr bbeix: “Ngo ni dax cirgo a ssi a, ni leil wornol lol.”<sup>q</sup> <sup>15</sup> Moxrxi bbeix: “Ni ngo dax cirgo a nr ssi arddeirnga a, ngua leil eilmaex gga tor hier deix nr si. <sup>16</sup> Ca mel ni bei dae arddol jji lei, ni, ngo nei ni ddei cassor-worssor mel leil seirseir meixl gger saexl bbeixleir? Holbbaexl ni ngua dax cirgo a ssi a, ngo nei ni ddei cassor-worssor mel leil middurbbor ca mel dax le-nr-sel lol nr nga a ngo?”

<sup>17</sup> Yihexrhuaxr Moxrxi leil bbeix: “Ngo ni leil seirseir meixl gger, halae ngo ni ddei mi ddei leil zox dae a ni leil saexl, yel ni ngo dax qiuxr dae eil ddei lei ngo bei nia.” <sup>18</sup> Yel Moxrxi bbeix: “Ni leil qiuxr, ngo leil ni ddei bbobolbbo mel leil mia lol la.” <sup>19</sup> Yihexrhuaxr ddar-koxl a bbeix: “Ngo, ngo ddei seirseir mel ni meixsaer qir leil gger lol, halae ngo ddei mi ddei mel Yihexrhuaxr bbeix. Ngo arseir leil seirseir meixl gger niazzir a mel dder arseir leil seirseir meixl gger, ngo arseir leil zoxlnixr niazzir a mel dder arseir leil zoxlnixr.” <sup>20</sup> Yoxl bbeix: “Ca mel ngo ddei qiaxrmeix ddei leil mia a mel gol nr var a. Yel ni ngo ddei qiaxrmeix ddei leil mia nr cexr. <sup>21</sup> Nael ni ngo dax eilmaex gga legelbbe eil taex leil ngier dae ddo. <sup>22</sup> Ngo ddei bbobolbbo mel halmaex bbo gel car, ngo ni leil legelbbe taex bbeixr

<sup>q</sup>33:14 ni leil wornol lol Yilsi mel dder nixmox zzar zoxr-nr-zixr, zzazza-soso a nga.

zil dae ddei gga pahher dae lol a, ngo ddei leixrhher bbor ni leil jiul gex dae a, ngo halmaex gger ho zzeze ci. <sup>23</sup> Giedae, ngo, ngo ddei leixrhher bbor cei xixl lei a, ni dder ngo ddei nelgger leil mia ddo, ngo qiaxrmeix ddei leil nael, mia nr ddo.”

### Lixlfaer Vaer Deix Labox Legelbbe Ddaer Box

**34** <sup>1</sup> Yihexrhuaxr Moxrxi leil bbeix: “Ni ni xilmeir zax me gger legelbbe hal nr pir lesel nr pir ddaer teixl lei nia. Ngo ni zax xiaxr gger hal nr pir leil vaer deix dae ddar mel eil nr pir leil vaer deix nia. <sup>2</sup> Eilneixr-nehe xilmeir leil ni bei har zaxr nia. Eilneixr-nehe ci a, Xinaer worga ga leil ddeix a, worga oldde leil ngo meixsaer qir leil ngier dae nia. <sup>3</sup> Arseir lei ni dax cirgo a ddeix nr ddo, worga cirga-lorbba leil lei ca hher dae nr ddo, acixl ya nei niur mel lei worjibbei dax silbbar zzor dae nr ddo.” <sup>4</sup> Yel Moxrxi dder xilmeir hal nr pir lesel legelbbe nr pir ddaer teixl lei a. Yihexrhuaxr yar leil miardal dae mel dax zox dae a, yar neixrneixr-sisi ha du lei a, leixrhher gga legelbbe nr pir vei dae a, Xinaer worga ga leil ddeix a. <sup>5</sup> Yihexrhuaxr dder zico gga zei lei a Moxrxi dax halmaex ngier dae a, yar Moxrxi dax yar ddei mi ddei “Yihexrhuaxr” a eine bbeix. <sup>6</sup> Yel Yihexrhuaxr Moxrxi meixsaer qir leil gger a bbeix:

“Ngo mel Yihexrhuaxr a; Yihexrhuaxr a.

Ngo mel ca leil zoxlnixr,

ca leil cirza-hanga seirseir meixl gger su Arbosobo ddei nga a.

Ngo seifu faex nr so,

ca leil yarzisael perniar nei yarzi ddarzziddo.

<sup>7</sup> Hormo du hormo meir ca mel leil yarzisael perniar.

yaa ddei zuixl neixlneixl mel leil,

yaa ngo leil dir dae zuixl mel leil nei

yaa zuixl bei dae mel leil ssoxrsuxl.

huixr-nr-soxr su ddei zuixl mel bei pixr nr gger.

Yar ddei zuixl mel leil faxr a,

arbbor dax cirdae a ssor nei lilbol so li zeix zzeze goxr sol.”

<sup>8</sup> Moxrxi dder nialngasael middur ddei leil puxr gex dae a <sup>9</sup> bbeix: “Seirpor, ni ngo leil seirseir meixl gger arddeirnga a, ni leil qiuxr, ni ngua dax cirgo a ssi. Cassor-worssor eilmel mel ni ddei ddar noni dil nr ddo, yoxl ni leil qiuxr, ngua ddei zuixl neixlneixl hal mel nei kebal zuixl mel leil ssoxrsuxl la, ngua leil ni ddei cassor-worssor bei lol la.”

### Arbosobo Ca Mel Dax Bbeixharzaxr Box

<sup>10</sup> Yihexrhuaxr bbeix: “Ngo bbeixharzaxr. Yirsaexlxl su ca maelmaerjgia meixsaer qir leil murgurgurmo ddoddomo bei nia. Eilmel mel middurbbor circuxr-hanga ca mel zeixleixr lei mia nr seix. Ni zaza-lili goxr dae ca mel lei Yihexrhuaxr [nia leil weix a] gexrddoddomo bei dae eilmel leil mia nia.

<sup>11</sup> “Ngo eilni ni leil miardal dae mel ni noni nia. I dae ddo a. Ngo ni meixsaer qir leil Yalmoxrlxl su ca, Jianaxr su ca, Hexl su ca, Birlxlxlir su ca, Xiweixl su ca, Yibulsi su ca mel leil ggax pixl gger. <sup>12</sup> Ni fadae nia, ni ssi ggie middei gga goxr dae ca mel dax bbeixharzaxr nr ddo. Nr nga a, eil ddei dder ni leil xiaxl dae ddei loxr var. <sup>13</sup> Doxgoxleixr, ni yaa ddei neirziggie mel bei xiaxr gger nia, yaa ddei sseigu bbex mel deil xiaxr gger nia, yaa ddei Yaxlsaexlla six bbex te taexl zeil lei nia. <sup>14</sup> Yihexrhuaxr mel, ca mel zi dae mel leil nixnox Arbosobo ddei nga a. Ngo leil mel ca mel zi dae mel leil nixnox su mi, yel nia kebal azo neir leil lei zi nr ddo. <sup>15</sup> Halmaex gga goxr dae ca mel dax bbeixharzaxr nr ddo. Nr nga a, yaa, yaa ddei neir mel leil zi car, ni leil qie si a, ni leil yaa ddei neir mel leil zi dae mel fur zol leilei. <sup>16</sup> Yoxl ni ddei ssor mel nrbbba yaa ddei ssormaer mel leil bbeix a, yaa dax bei mae a ngo leil lar li nr nga a nei, kebal neir mel leil zi ssi leilei.

<sup>17</sup> “Armael leil bbex ddaexr gger nr ddo.

<sup>18</sup> “Ni Yalbir ae hal xiubbo gga Aezixr goxrjia gga ddux lei, yel ni miljiazi ji nr goxr aba zzor jiax goxr nia. Ngo ni leil miardal dae mel dax zox dae a, Yalbir ae hal xiubbo gga dixl har dae nixixl ddei gga miljiazi ji nr goxr aba sir ni zzor nia. <sup>19</sup> Ha ssor xiu beil ddei mel dder ngo ddei a. Zzeir cer beil yربول hazza, niur bbeixsael acixl

ya nga zzorbbeixlei ngo ddei a. <sup>20</sup> Tarlodaex cer beil mel leil mel yassor sser a, bo xixl lei nia. Bo nr xixl lei arddeirnga a dder yar leibbei ddei deil te gger nia. Ha ssor hier beil mel leil dder bo xixl lei nia. Arseir lei leixrku-leixrler ngo leil zi lei nr ddo.

<sup>21</sup> “Ni miar qiuxl ni bei nia, sir ni cir ni nael wornol nia, loxlmoxr dae zi bbeixsaer se zi nga zzorbbeixlei wornol nia.

<sup>22</sup> Ni jiajia mi beil so hal mel se car mel, loxlmoxr se du lei jiax goxr nia, yoxl cir koxl goxr jjia niazzir dae car mel, saer se a, saer se du lei jiax goxr nia

<sup>23</sup> Nia capor maelmaerjjia cir koxl so boxl Seirpor Yihexrhuaxr dax ssi a, Yirsaexllixl su ddei Arbosobo leil zi ssi nia. <sup>24</sup> Ngo ni meixsaer qir leil kebal cuxr leil ggaxr pixl gger nia. Ni ddei middei ddei kuax dax lol nia. Ni cir koxl so boxl ni ddei Arbosobo Yihexrhuaxr leil zi ssi car, ni ddei middei mel leil li su ca nr zza.

<sup>25</sup> “Ni ngo leil zi dae zzeir mel ddei sirnilni mel miljiazi ji goxr aba mel dax cirgo a zi nr ddo. Yuelyuel jiax goxr a zi dae mel lei giedae cir nehe dol ci nr ddo.

<sup>26</sup> Mi gga mi beil zzir mel ni ddei Arbosobo Yihexrhuaxr ddei xi gga vei mal gger nia.

Ni acixlssor ddei yarma ddei baxr mel sser a, acixlssor zeixl nr ddo.”

<sup>27</sup> Yihexrhuaxr Moxrxi leil bbeix: “Ngo ddar eilmel dax zox dae a, ni nei Yirsaexllixl su ca mel dax bbeixharzaxr a. Yel ni ddar eilmel vaexr deix nia.” <sup>28</sup> Moxrxi Yihexrhuaxr dax halmaex licei xixl licei ni hher a. Yar zzo lei nr zzor, ajjix lei nr dda. Yihexrhuaxr bbeixharzaxr dae ddar mel, hherdder yar miardal dae cei tiuxr, legelbbe nr pir leil vaexr deix gger a.

### Moxrxi Xinaer Worga Leil Zei Lei

<sup>29</sup> Moxrxi leixrhher gga lixfaxr vaexr deix dae legelbbe nr pir vei dae a Xinaer worga leil zeijjixr lei car, yar Yihexrhuaxr dax ddar biar goxr a, qiaxrmeix ddei bbobbolbbo bbo dae yar armael nr saexl. <sup>30</sup> Yalluixr nei Yirsaexllixl su ca maelmaerjjia Moxrxi qiaxrmeix ddei bbobbolbbo bbo dae ggie mia a dder yar dax lei naer

nr bel. <sup>31</sup> Nael Moxrxi yaa leil gger lei ae a, yel Yalluixr nei Yirsaexllixl su ca ddei vaervaerpor mel maelmaerjgia yar dax halmaex ssi a. Moxrxi dder yaa dax ddar biar. <sup>32</sup> Giedae Yirsaexllixl su ca maelmaerjgia Moxrxi dax lei a, yar dder Yihexrhuaxr Xinaer wor-ga leil miardal dae ddar mel Yirsaexllixl su ca mel leil bbeix gger a. <sup>33</sup> Moxrxi yaa dax ddar biar teixl ho a dder mae ar co sser a, qiaxrmeix ddei leil bbe gex du lei a. <sup>34</sup> Nael Moxrxi Yihexrhuaxr leil zi ggie xi gga ddir a, Yihexrhuaxr dax ddar biar ssi car dder mae co vei pixl a yar ddux lei zzeze ci. Yar ddux lei car, Yihexrhuaxr yar leil miardal dae ddar mel Yirsaexllixl su ca mel leil biar gger. <sup>35</sup> Yirsaexllixl su ca mel Moxrxi qiaxrmeix ddei leil bbobbolbbo bbo ggie mia a, Moxrxi yoxl mae co vei a, qiaxrmeix leil bbe gex du lei. Yar Yihexrhuaxr dax ddar biar ssi car a dder mae co vei pixl.

### Wornol Nixixl Cir Ni Ddei Lixlfaxr

**35** <sup>1</sup> Moxrxi Yirsaexllixl su ca mel leil ae si lei a, yaa leil bbeix: “Yihexrhuaxr nia leil miardal a bei mae dae lol mel eine a: <sup>2</sup> ‘Miar qiuxl ni bei. Sir ni cir ni nael, Yihexrhuaxr leil weix a bbe teixl lei a Yihexrhuaxr ddei wornol nixixl cir ni bei. Ha eil ni gga miar bei su cirddei-hanga leil bei zil gger nia. <sup>3</sup> Wornol nixixl cir ni, nia hher ggie cirmaex-hanga gga adoxl lei zi nr ddo,’ ” eine bbeix a.

### Zzaegu Gger A Sexlmuxl Zi

<sup>4</sup> Moxrxi Yirsaexllixl su ca maelmaerjgia leil bbeix: “Yihexrhuaxr miardal dae mel mel eine a: <sup>5</sup> ‘Nia Yihexrhuaxr leil zzaegu ho nia. Ha nixmox zzar ho ggeze mel dder Yihexrhuaxr leil ho labox mel vei si lei ddo: hherdder piu, sae, zzir, <sup>6</sup> maebbiur laxllaxr, jjiussi yixrsaexr nei nineix, zzir mesixlsixl, acixl me, <sup>7</sup> ssar ni dae yabol zzi, yarzi naxrcixl zzi, zaxljiaxr muxl; <sup>8</sup> de doxl labox saercor ssuvi, halae mei labox saercor ssuvi nei hexzzi bei a sser dae nerxiuxiu mel, <sup>9</sup> halae yirfuxrdaexr xiux leil nei nixmoxzo ddei leil bbe gex dae hal co leil hha gex ddu bbo dae yol neixlneix mel nei kebal balsixr mel nga a,” eine bbeix a.

## Sexlmuxl Gga Zzaegu Mel

<sup>10</sup> “Nia ca mel gga azo bei a lei yarzi bei seir yarzi bei naxrcixl ca hal mel lei a, Yihexrhuaxr miardal dae cirza-hanga sserddu mel bei: <sup>11</sup> hherdder Sexlmuxl, Sexlmuxl leil woxrgexddu lavulzzar hal co, Sexlmuxl leil woxrgexddu teixlsibbor hal co, algerle, daxr gex labox jiaxjiax, jiaxjiax ddei leil lagexddu, sseigu nei suir hha ji ddu; <sup>12</sup> bbezzir nei bbezzir ddei leil bil labox daxrzzo, bbezzir ggabilddu nei ngo hherggie dax giex kae dae mae co. <sup>13</sup> Zaezir nei zaezir leil bil labox daxrzzo, zaezir ddei leil sserddu zzaegu maelmaerjjia; ngo meirsaer qir leil ngo leil ziddu aba; <sup>14</sup> de dol deix labox ddei nei de dol deix labox ddei leil sser labox zzaegu, de nei de doxl labox saer-cor ssuvi; <sup>15</sup> nerxiuxiu hexzzi doxldeixddu ddei nei hal ddei leil bil labox daxrzzo; doxl deix labox saer-cor ssuvi nei nerxiuxiu hexzzi hal mel, Sexlmuxl ddir ggie alddur peixl leil gaxl gex dae mae co; <sup>16</sup> adoxl gga cu a zzeir seixlziggie taex, hal taex sser dae zzir bei teixl lei jiaxjiax paxr, hal taex leil bil labox daxrzzo nei hal taex leil sserddu zzaegu maelmaerjjia, cir labox larggu nei larggu doldeixddu; <sup>17</sup> zzaexggu ddei leil weixr gex dae mae mel, sseigu nei sseigu hha ji ddu, zzaexggu ddir ggie alddur peixl leil gaxl gex dae mae co; <sup>18</sup> Sexlmuxl nei zzaexggu ddei leil weixr gex dae mel leil sser dae giexrngexl nei baezo; <sup>19</sup> ngo leil zi su mel Sexlmuxl gga ngo leil zi car veixr dae, yarzi naexr naxrcixl naexr teixl lei pia hal mel nei ngo leil zi su Yalluixr halae yar ddei ssor mel ngo leil zi car veixrddu pia mel nga a, ’ ” eine bbeix a.

## Cassor-Worssor Mel Zzaegu Gger

<sup>20</sup> Yirsaexllixl su ca mel maelmaerjjia lei Moxrxi dax nr hher a. <sup>21</sup> Ha nixmox zzar zzaegu ho ggese su hal mel dder zzaegu vei si lei a, Yoharggie Zaxlpoxr ddei zi a sserddu bei, Yihexrhuaxr leil zi a sserddu bei nei Yihexrhuaxr leil zi car veixrddu pia bei. <sup>22</sup> Ha nixmox zzar zzaegu ho ggese capor nei ssormaer mel lei sae bei teixl lei ddexr labox mel hherdder [pia leil bixrgexddu/xiuze], nolzzu, leixrdox, leixrzzu mel vei si lei a, Yihexrhuaxr leil ho lei.



<sup>23</sup> Ha maebbiur laxllaxr, jjiussi yixrsaexr nei nineix, zzir mesixlsixl, acixl me, ssar ni dae yabol zzi, yarzi naxrcixl zzi eilmel zza su mel dder vei si lei a. <sup>24</sup> Ha piu nei zzir zza su mel lei vei si lei a Yihexrhuaxr leil ho a. Ha arddolmaex zaxljiaxr muxl sser zoxr a dder vei si lei a. <sup>25</sup> Azo bei a lei yarzi bei seir yarzi bei naxrcixl ssormaer hal mel lei yaa armael ddei armael maebbiur vaexr a, yaa vaexr teixl lei maebbiur laxllaxr, jjiussi yixrsaexr, nineix nei zzir mesixlsixl mel vei si lei a. <sup>26</sup> Ha nixmox zzar bei ggese ssormaer mel lei acixl me sser a maebbiur vaexr. <sup>27</sup> Vaervaerpor mel yirfuxrdaexr xiux leil nei nixmox zo ddei leil bbe gex dae hal co leil hha gex labox, bbo dae yol neixlneix nei kebal balsixr mel vei si lei a. <sup>28</sup> Yoxl nerxiuxiu mel nei saercor ssuvi vei a de doxl, mei labox ssuvi nei hexzzi bei. <sup>29</sup> Ha nixmox zzar Yihexrhuaxr leil zzaegu ho gger ggese su Yirsaexllixl su capor ssormaer lei zzaegu vei si lei a, Yihexrhuaxr Moxrxi leil miardal lol miar mel bei.

### Sexlmuxl Bei Su Ca

<sup>30</sup> Moxrxi Yirsaexllixl su ca mel leil bbeix: “Yihexrhuaxr Yoxrdaxl ddei cuxr gga Hul'aer ddei lilbol, Wulixl ddei ssor Birsarlaxl leil tiur ho a. <sup>31</sup> Arbosobo ddei Xiu ddei yar dax bbilbbi hher ji dae a, yar leil olnolddu lol, jilixr lol, azo leil saexl lol, cirza-hanga leixrhher miar lei bei var lol, <sup>32</sup> cirza-hanga arsae bei nia xiar teixl lei xie lol. Piu, sae nei zzir hal mel sser a, azo zzaegu lei ddaexr var lol. <sup>33</sup> Yoxl yar lei ddaexr deix labox balsixr mel kiexl var lol, six mel leil lei kiexl var lol, halae kebal azo lerler leixrhher miar hazzi zae bei var lol. <sup>34</sup> Yihexrhuaxr yoxl yar leil nei Daxl ddei cuxr gga Yalxisarmor ddei ssor Yalhexlixyalboxr leil kebal ca leil cirza-hanga lei mul gger bbesur zza lol. <sup>35</sup> Yihexrhuaxr halae yaa leil bbesur gger a, cirza-hanga lei bei var lol bir dae a bbeix: azo lerler kiexl, azo lerler bei a arsae bei nia huax, maebbiur laxlax, jjiussi yixrsaexr, nineix mel sser a hhexrnaexr, halae cirza-hanga mae ddaexr. Yaa mel cirza-hanga miar mel bei bbesur zza, halae cirza-hanga huax dae hal mel lei huax bbesur zza.

**36**<sup>1</sup> Moxrxi bbeix: “Birsarlixl nei Yalhexrlixlyalboxr, halae Yi-hexrhuaxr olnolddu lol, jilixr lol, bbesur zza lol nei arsae Sexlmuxl zi nia saexl lol ca maelmaerjjia lei, Yihexrhuaxr yaa leil miardal dae mel dax zox dae a bei ssi nia,” eine bbeix a.

### Ca Mel Zzaegu Zzeili-Zzeilor Ho

<sup>2</sup> Moxrxi dder Birsarlixl, Yalhexrlixlyalboxr nei Yihexrhuaxr olnolddu lol, azo bei a lei yarzi bei seir yarzi bei naxrcixl lol, halae bei dax lei ggesse ca hazza leil ae si lei a, yaa leil miar bei lol. <sup>3</sup> Yaa dder Moxrxi dax Yirsaexllixl su ca mel Sexlmuxl zi a sser labox ho dae zzaegu mel vei si a. Nael cassor-worssor mel halae bbecir-bbenehe lei ggesese a ho dae zzaegu mel vei si lei a Moxrxi leil gger. <sup>4</sup> Yel Sexlmuxl zi su azo bei a lei yarzi bei seir yarzi bei naxrcixl ca hazza armael ddei miar lei nr bei, <sup>5</sup> Moxrxi dax lei a bbeix: “Cassor-worssor ho dae zzaegu mel, bir Yihexrhuaxr miardal a bei lol a sser zoxr mel leil hormo miur leixl ho a,” bbaexl eine bbeix. <sup>6-7</sup> Sexlmuxl zi labox ho dae zzaegu mel maelmaerjjia lei sser loxr ddo, halae hormo nirzzei dae. Yel Moxrxi dder cassor-worssor hher ggie cirmaex-hanga miardal a, cassor-worssor mel leil zeixleixr Sexlmuxl zi a sser labox zzaegu ho nr ssa bbeix gger.

### Sexlmuxl Bei

<sup>8</sup> Sexlmuxl zi su ca mel gga, azo bei a lei yarzi bei seir yarzi bei naxrcixl ca mel, mae cei co sser a Sexlmuxl bei. Mae eilmel mel zzir mesixlsixl arla hal mel nei maebbiur laxllaxr, jjiussi yixrsaexr, nilneix mel sser a ddaexr teixl lei; halae Birsarlixl mi ca hal ddei yarzi naexr seir yarzi naexr naxrcixl naexr a Jiluxlboxr naexr deix. <sup>9</sup> Mae eilmel circo-hanga lei zzi dax leilei a nga; siggiebbaer nael ceinir (12) gocixr, kuaxggiebbaer nael nr (2) gocixr. <sup>10</sup> Yar mae eil ngor co zzicarzzi dax naexr gex du lei, mae hal ngor co lei zzicarzzi dax naexr gex du lei. <sup>11</sup> Yel mae vaervaer eil nr co yarqir leil laxllaxr laexsaer nolvar naexr gex, <sup>12</sup> cir co leil laexsaer nolvar ngorceimo naexr gex, zzircarzzi dax mal dae. <sup>13</sup> Yoxl sae sser a algerle ngor-

ceimo bei; mae vaervaer eil nr co leil cirgo a gaxl gex du lei, eine nga a saelnei Sexlmuxl ar ddei loxr.

<sup>14</sup> Birsarlixl yoxl acixl me sser a mae ceidil co ddaexr a Sexlmuxl ddei leil ggaxrsibbor wol gex labox bei. <sup>15</sup> Circo-hanga zzi dax leilei a nga: siggiebbaer nael, ceiso (13) gocixr; kuax ggiebbaer nael, nr (2) gocixr. <sup>16</sup> Yar ngor co a zzicarzzi dax naexr gex du lei a vaervaer ar co loxr lol, kebal hal qiuxlco lei zzicarzzi dax naexr gex du lei a vaervaer ar co loxr lol. <sup>17</sup> Mae vaervaer eil nr co yarqir leil, cir co leil laexsaer nolvar ngorceimo naexr gex. <sup>18</sup> Yoxl zzir sser a algerle ngorceimo bei a, mae vaervaer nr co zzi leil gaxl gex du lei a, ggaxrsibbor wol gex labox ar co loxr lol. <sup>19</sup> Halae ggaxrsibbor wol gex labox co ggaxrne ssar ni dae yabol zzi ar co bbe gex, zeixleixr yarzi zae yarzi naxrcixl zzi ar co bbe gex a, ollele bbe gex dae co bei.

<sup>20</sup> Yar zaxljiaxr muxl sser a, Sexlmuxl ddei leil ngier dae lol jiaxjiax mel bei. <sup>21</sup> Jiaxjiax cirddei-hanga lei muggiebbaer nael li (4) gocixr, kuaxggiebbaer nael qiuxlceiqiuxl (66) gofei. <sup>22</sup> Jiaxjiax cirddei-hanga leil lei suir nnel zza. Yel jiaxjiax mel leil zzicarzzi dax gga gex du lei lol. Jiaxjiax maelmaerjia ciryoxxr a nga. <sup>23</sup> Yaa Sexlmuxl ddei naxrfa piar a gga jiaxjiax nrzeimo bei, <sup>24</sup> jiaxjiax woxrke piu sser a bei teixl lei suir hha ji ddu licei taex zza, jiaxjiax cir ddei woxrke piu sser a bei teixl lei suir hha ji ddu nnel dox gex dae. <sup>25</sup> Yaa yoxl Suxlmuxl ddei beirfa piar a gga lei jiaxjiax nrzeimo bei, <sup>26</sup> nei piur sser a suir hha ji ddu licei taex bei, jiaxjiax cirddei-hanga woxrke lei suir nnel zza. <sup>27</sup> Sexlmuxl ddei giedae piar a gga, hherdder xifa piar a gga, jiaxjiax qiuxller bei. <sup>28</sup> Sexlmuxl ddei giedae piar a gga giexrluxl ddei gga jiaxjiax nnel bei. <sup>29</sup> Jiaxjiax nnel jia ddei jiasibbor nael suir hha ji ddu cir ddei gga a hha ji; ggaxrsibbor nael nolvar ar ddei hha gex a nr ha lol. Giexrluxl nnel jia lei eine bei nia. <sup>30</sup> Yel maelmaer a mel jiaxjiax heixller nei piu sser a bei teixl lei suir ha ji ddu ceiqiuxlmo zza, jiaxjiax cirddei-hanga jiasibbor piu sser a bei teixl lei suir hha ji ddu nnel zza.

<sup>31</sup> Yaa yoxl zaxljiaxr muxl sser a jiaxjiax ddei leil lagexddu bei; Sexlmuxl eilpiar a gga jiaxjiax mel leil lagexddu ngor caex bei gger;

<sup>32</sup> Sexlmuxl halpiar a gga jiaxjiax mel leil lagexddu ngor caex bei gger; yoxl Sexlmuxl ddei giedae piar a gga, hherdder xifa piar a gga jiaxjiax mel leil lagexddu ngor caex bei gger. <sup>33</sup> Jiaxjiax agala gga lagexddu caex mel, Seuxmuxl eilpiar a gga cirdae a halpiar a gga gger ci. <sup>34</sup> Yar sae sser a jiaxjiax mel leil ba gex du lei, halae sae nolvar hha gex a, lagexddu caex leil cua gel seir lol; lagexddu caex leil lei sae sser a ba gex.

<sup>35</sup> Yar maebbiur laxllaxr, jjiussi yixrsaexr, nineix nei zzir mesixl-sixl arla hal mel sser a, Sexlmuxl ddei mae co ddaexr. Yarzi bei seir yarzi bei naxrcixl ca hal mel Sexlmuxl ddei mae co leil Jiluxlboxr naexr deix. <sup>36</sup> Yar yoxl zaxljiaxr muxl sser a Sexlmuxl ddei mae co leil sseigu li taex bei gger, sae sser a ba gex; sseigu mel leil sae sser a bei teixl lei algerle zza. Yaa yoxl piu sser a, sseigu mel leil hha ji ddu li taex bei gger. <sup>37</sup> Yar maebbiur laxllaxr, jjiussi yixrsaexr, nineix nei zzir mesixlsixl arla hal mel sser a, vixlux naexr mel sael a Sexlmuxl ddei alddur peixl leil gax gex ddu mae co naexr. <sup>38</sup> Yar yoxl alddur peixl leil gaxl gex dae mae co leil sseigu ngor taex bei gger, sseigu mel leil algerle bei deix, sseigu ddei ollele nei sseigu mel leil daxr gex dae huixrdaxldaxl mel lei sae sser a ba gex, yoxl zzir sser a sseigu hha ji ddu ngor taex bei gger.

### Yueguixl Bei

**37** <sup>1</sup> Birsarlxl zaxljiaxr muxl sser a yueguixl bei. Siggiebbær nael, cirxiucei (110) gofei zza, kuaxggiebbær nael qiuxlceiqiuxl (66) gofei zza, muggiebbær nael qiuxlceiqiuxl (66) gofei zza. <sup>2</sup> Lavulzzar nei lamaebbaer lei sae lillil a sser a ba gex du lei; ggaxr-sibbor yarqir leil nael, zaza-lili lei sae sser a ser sael a ar lel kiexl deix. <sup>3</sup> Yoxl sae nolvar liller bei a, yueguixl qihher li bbor leil hha deix; eilpiar a nolvar nnel, halpiar a nolvar nnel. <sup>4</sup> Zaxljiaxr muxl sser a daxrzzo nr ba bei, sae sser a ba gex du lei. <sup>5</sup> Daxrzzo nr ba yueguixl nr piar a gga sae nolvar mel gga cua ji a, yueguixl bil cexr lol. <sup>6</sup> Sae lillil a sser a yueguixl ggabil ddu bei, siggiebbær nael cirxiucei (110) gofei, kuaxggiebbær nael qiuxlceiqiuxl (66) gofei. <sup>7</sup> Sae sser a Ziluxlboxr nnel ddaexr teixl lei a, yueguixl ggabil ddu

ddei nr piar a gga hha deix gger. <sup>8</sup> Eilpiar a Ziluxlboxr ar ddei bei, halpiar a Ziluxlboxr ar ddei bei. Yar yueguixl ggabil ddu nr piar a gga Ziluxlboxr nrnel bei a, yueguixl ggabil ddu ddei dax cirgo a hher gex dae, <sup>9</sup> Ziluxlboxr nrnel ddoleixr ddei darmumu ddaexr kae dae a, yueguixl ggabil ddu ddei leil bbe gex dae; yaa qiaxrmeix ddei zzi-carzzi dax mal dae a, yueguixl ggabil ddu ddei leil i dae.

### Aba Dol Labox Zaezir Bei

<sup>10</sup> Yar zaxljiaxr muxl sser a zaezir ar zoxr bei; siggiebbaer nael heixlceiheixl (88) gofei zza, kuaxggiebbaer nael liceili (44) gofei zza, muggiebbaer nael qiuxlceiqiuxl (66) gofei zza. <sup>11</sup> Sae lillil a sser a, ba gex du lei; ggaxrsibbor yarqir leil nael, zaza-lili lei sae sser a ser sael a ar lel kiexl deix. <sup>12</sup> Zaezir zoxr zaza-lili sirceingor (75) golir bei kuax dax, kuax teixl lei eil ddei zaza-lili nael sae sser a ser sael a ar lel kiexl deix. <sup>13</sup> Yoxl sae nolvar liller bei a, zaezir li giexr-luxl gga qihher li bbor leil hha deix. <sup>14</sup> Sae nolvar hha ggie mel, bei kuax teixl lei ddei dax naer dae. Eine nga a, daxrzzo ddei cua gel a zaezir bil cexr. <sup>15</sup> Yar zaxljiaxr muxl sser a daxrzzo nr ba bei, sae sser a ba gex du lei a, zaezir bil cexr lol. <sup>16</sup> Yoxl sae lillil a sser a zaezir zoxr leil sser labox mel bei, hherdder paxrzi, tiuxrge halae (puxrto zzubbaer) zi a ddox labox nei beizi.

### De Baer Deix Labox Bei

<sup>17</sup> Yar sae lillil a sser a de doxl deix ggie ar ddei bei; de doxl deix ggie yarzibbor ddei, agala gga yarhher caex, veixzox, vixlux, veix-nix mel lei cir pir leil a ddaexr teixl lei.

<sup>18</sup> De baer deix labox nr piar a gga yarbaxlleixr qiuxl baxlleixr ggax teixl lei, eilpiar a gga so baxlleixr, halpiar a gga so baxl leixr. <sup>19</sup> Eilpiar a gga yarbaxlleixr arddol baxlleixr leil lei vixlux so pex zza, vixlux eil so pex mel saerpaer vixlux lesel, veixzox zza, vixlux zza; Halpiar a gga yarbaxlleixr arddol baxlleixr leil lei vixlux so pex zza, vixlux eil so pex mel saerpaer vixlux lesel, veixzox zza, vixlux zza; de doxl deix ggie ddei leil ggax teixl lei qiuxl baxlleixr lei eine a. <sup>20</sup> De doxl deix ggie ddei agala gga hal caex leil mel vixlux li pex

zza, vixlux eil li pex lei saerpaer vixlux lesel, veixzox zza, vixlux zza. <sup>21</sup>Yarbaxlleixr cir zze woxrke veixzox ar ddei zza, so zze jjia lei eine a. <sup>22</sup>Veixnix, yarbaxlleixr nei de doxl deix ggie, eilmel maelmaerjjia lei sae lillil a ar co sser a ddaexr teixl lei. <sup>23</sup>Sae lillil a sser a, de doxl deix ggie ddei leil de sir zar bei; halae de xi ddei leil ddaex labox zzirda nei de xi ddaex ji ddu paxrzi bei. <sup>24</sup>Yar sae lillil a soceingor (35) zi sser a, de doxl deix ggie nei de doxl deix ggie ddei leil sser labox cirza-hanga bei.

### Hexzzi Doxl Deix Labox Ar Taex Bei

<sup>25</sup>Yar zaxljiaxr muxl sser a, hexzzi doxl deix ddu ar taex bei. Eil taex mel sixlfa ar taex a. Siggiebbaer nei kuaxggiebbaer nael, liceingor (45) gofei; muggiebbaer nael, gecei (90) gofei. Eil taex ddei giexrluxl baexlaex li baex jjia lei eil taex leil niar gex dae. <sup>26</sup>Yar sae lillil a sser a, eil taex leil ggaxrsibbor, zaza-lili nei giexrluxl baexlaex li baex leil ba gex du lei, yoxl sae sser a eil taex ddei zaza-lili ser sael a ar lel bei deix. <sup>27</sup>Yar yoxl eil taex leil bil a, sae dil labox sae nolvar cir piar a gga ar ddei bei a, sae ser woxrke hha gex. Eine nga a mel, eil taex leil bil labox ddaxrzzo nr ba dder sae dil cexr a. <sup>28</sup>Yar zaxljiaxr muxl sser a, bil labox ddaxrzzo bei, halae sae sser a, ba gex du lei. <sup>29</sup>Yoxl ner xiuxiu mei labox mel sael a bei a, bbe teixl lei a, mei labox ssuvi nei ner xiuxiu hexzzi bei.

### Arbosobo Leil Zzeir Seixlziggie Ggie Ddei Bei

**38** <sup>1</sup>Birsarlixl Zaxljiaxr muxl sser a, Arbosobo leil zzeir seixlziggie bei. Eil ddei mel sixlfa ar ddei a. Siggiebbaer nei kuaxggiebbaer nael, nr (2) gocixr nr (2) gocuil zza; muggiebbaer nael, cir (1) gocixr so (3) gocuil zza. <sup>2</sup>Yar Arbosobo leil zzeir seixlziggie ddei giexrluxl li piar a gga giexrluxl baexlaex li baex bei gex; eil ddei dax cirgo a niar dae lol a, zzir sser a ba gex du lei. <sup>3</sup>Yar zzir sser a, cirza-hanga sser labox bei, hherdder kurlu larggu, calcal, paxrzi, hor kal a cagexddu nei saernir huax ji ddu bei. <sup>4</sup>Yar yoxl zzir sser a, Arbosobo leil zzeir seixlziggie ddei leil jiaxjiax ar paxr bei gger

a, Arbosobo leil zzeir seixlziggie ddei leil yarqierbbaer li piar a gga hha gex, agala gga giex gex ggie halmaex zzezze ddeix ci lol.

<sup>5</sup> Jiaxjiax paxr giexrluxl liller leil zzir nolvar liller bei gger a, daxr-zzo cua ji labox bei. <sup>6</sup> Yoxl Zaxljiaxr muxl sser a, daxrzzo bei, zzir sser a ba gex du lei. <sup>7</sup> Daxrzzo ba Arbosobo leil zzeir seixlziggie ddei nr piar a gga nolvar mel gga cua ji; eine nga a mel, hal ddei leil bil cexr. Halae barpir sser a, Arbosobo leil zzeir seixlziggie ddei bei, eil ddei agalazzar mel ko dae.

### Zzir Larggu Bei

<sup>8</sup> Yar zzir sser a, cir labox zzir larggu nei larggu dol deix ddu bei, eilmel mel Sexlmuxl alddur dax miar bei gger su ssormaer mel ddei jixlzi mel sser a bei.

### Yihexrhuaxr Sexlmuxl Ddei Zaza-Lili

<sup>9</sup> Yar zzir mesixlsixl mel sser a ddaexr du lei mae mel Sexlmuxl ddei leil weixr gex du lei a zzaexggu bei. Naxrfa piar a gga hal co siggiebbaer liceili (44) gocixr zza. <sup>10</sup> Mae co weixr deix labox ssei nrzei taex zza. Zzir sser a bei teixl lei ssei hha ji ddu nrzei taex zza; ssei leil niar dae algerle mel nei ssei leil daxr gex dae huixrdaxldaxl mel piu sser a bei. <sup>11</sup> Baexrfa piar a gga weixr gex labox mae co lei siggiebbaer liceili (44) gocixr zza. Ssei lei nrzei taex zza; zzir sser a bei teixl lei ssei hha ji ddu nrzei taex zza; ssei leil niar dae algerle mel nei ssei leil daxr gex dae huixrdaxldaxl mel piu sser a bei. <sup>12</sup> Xifa piar a gga weixr gex labox mae co siggiebbaer nael, nrzeinr (22) gocixr zza. Ssei cei taex zza, ssei hha ji ddu cei taex zza; ssei leil niar dae algerle mel nei ssei leil daxr gex dae huixrdaxldaxl mel piu sser a bei. <sup>13</sup> Dofa piar a gga, hherdder merni ddux lei ggie piar a gga weixr gex labox mae co lei siggiebbaer nrzeinr (22) gocixr zza. <sup>14</sup> Gilmi ddei eilpiar a gga weixr gex ddu mae co siggiebbaer nael, qiuxl (6) gocixr qiuxl (6) gocuil zza. Ssei so taex zza, ssei hha ji ddu so taex zza. <sup>15</sup> Gielmi ddei halpiar a gga lei eilmel sael a nga. Gielmi ddei nr piar a cir piar a gga weixr gex ddu siggiebbaer qiuxl (6) gocixr qiuxl (6) gocuil mae ar co zza, ssei so taex zza, ssei hha

ji ddu so taex zza; <sup>16</sup> Zzaexggu zaza-lili mae maelmaerjgia lei zzir mesixlsixl a sser a bei. <sup>17</sup> Ssei hha ji ddu mel zzir sser a bei, ssei leil niar dae algerle mel nei ssei leil daxr gex dae huixrdaxldaxl mel piu sser a bei, ssei ollele mel piu sser a ba du lei. Zzaexggu zaza-lili ssei hazza lei piu sser a bei teixl lei huixrdaxldaxl mel gga gex du lei. <sup>18</sup> Zzaexggu ddei gielmi peixl leil gaxl gex ddu mae co mel, maebbiur laxllaxr, jjiussi yixrsaexr, nineix nei zzir mesixlsixl arla hal mel sser; halae vixlux naexr mel sael a naexr a naexr teixl lei; siggiebbaer nael ge (9) gocixr zza, muggiebbaer nael nr (2) gocixr zza. Muggiebbaer mel, zzaexggu leil weixr gex dae mae mel dax ciryoxr a nga.

<sup>19</sup> Mae co weixr deix labox ssei li taex zza, zzir sser a bei teixl lei ssei hha ji ddu li taex zza; ssei leil niar dae algerle mel nei ssei leil daxr gex dae huixrdaxldaxl mel piu sser a bei, ssei ollele mel piu sser a ba du lei. <sup>20</sup> Sexlmuxl leil nei zzaexggu zaza-lili sser dae giexngexl maelmaerjgia lei zzir sser a bei.

### Sexlmuxl Gga Sser Dae Piu Sae Zzir Hazza

<sup>21</sup> Ggaxrsibbor biar dae mel mel, yueguixl dol ji dae Sexlmuxl ddei gga sser dae zzaegu maelmaerjgia nga a; Moxrxi miardal dae mel dax zox dae a, Arbosobo leil zi su Yalluixr ddei ssor Yirtamar Lixl-weixl su ca mel leil miardal a, hhe lol mel nga a. <sup>22</sup> Ha Yihexrhuaxr Moxrxi leil miardal dae mel, maelmaerjgia lei Yoxrdaxl ddei cuxr gga ca Ful'aer ddei lilbol, Wulixl ddei ssor Birsarlixl bei a. <sup>23</sup> Yar dax cirgo a bei dax su mel, Daxl ddei cuxr gga ca Yalxisarmor ddei ssor Yalhexrlixlyalboxr ca dae; yar mel cirza-hanga kiexl var nei xiar teixl lei xie, halae maebbiur laxllaxr, jjiussi yixrsaexr, nilneix nei zzir mesixlsixl sser a vixlux naexr var.

<sup>24</sup> Sexlmuxl zi a gger dae sae mel, Sexlmuxl gga cex ddei dax zox dae a, maelmaerjgia a mel cirdu (1,000) zi zza. <sup>25</sup> Hhe goxr ca mel gger dae piu mel, Sexlmuxl gga cex ddei dax zox dae a, maelmaerjgia a sodu lixiu socei (3,430) zi zza. <sup>26</sup> Ha hhe goxr capor mel gga, nrzei koxl leil ddeix su mel qiuxlceimeir sodu ngorxiu ngorceimo (603,550) zza. Sexlmuxl gga ddei cex dax zox dae a, ca cir ddei a



piu qiuxl taex sax. <sup>27</sup> Yar piu sodu lixiu (3,400) zi sser a, Sexlmuxl ddei ssei hha ji ddu nei weixr gexr dae mae mel ddei ssei hha ji ddu bei; ssei hha ji ddu cirxiu taex ddei mel piu sodu lixiu (3,400) zi sser a; piu socei li (34) zi sser a, ssei hha ji ddu ar taex bei. <sup>28</sup> Yar piu socei (30) zi sser a ssei mel ddei algerle bei, ssei ollele ba gex, halae ssei ollele mel leil huixrdaxldaxl bei gger. <sup>29</sup> Cassor-worssor mel ho lei zzir mel nrdu lixiu nrzei ngor (2,425) zi zza. <sup>30</sup> Yar zzir eilmel sser a Sexlmuxl ddei gielmi peixl dax ssei hha ji ddu mel, Arbosobo leil zzeir seixlziggie taex, seixl zi dae mel cu deix ddu jiaxjiax paxr nei Arbosobo leil zzeir seixlziggie taex leil sser labox maelmaerjgia bei, <sup>31</sup> halae zzaexggu zaza-lili ssei hha ji ddu mel, zzaexggu gielmi peixl dax ssei hha ji ddu mel, Sexlmuxl gga hedi maelmaerllia nei zzaexggu zaza-lili hedi maelmaerjgia bei.

### Arbosobo Leil Zi Su Mel Leil Pia Naexr Gger

**39** <sup>1</sup> Birsarlixl maebbiur laxllaxr, jjiussi yixrsaexr, nineix sser a pia zaelzae bei a, Sexlmuxl gga Arbosobo leil zi car veixr, yoxl Yalluixr leil Arbosobo leil zi car veixr labox pia bei gger, eil ddei mel Yihexrhuaxr Moxrxi leil miardal mel dax zox dae arddeir a.

<sup>2</sup> Yar sae bei teixl leil maebbiur nei maebbiur laxllaxr, jjiussi yixrsaexr, nineix, halae zzir mesixlsixl hal mel sser a teixlsibbor veixr labox yirfuxrdaexr xiux bei. <sup>3</sup> Sae mel bbolbbor a deil mal gger a, mesixlsixl a cir zex cir zex ddaex teixl lei a, maebbiur laxllaxr, jjiussi yixrsaexr, nineix dax cirgo a yarzi naexr seir yarzi naexr naxrcixl naexr deix. <sup>4</sup> Yoxl yarsael nr zex bei a, yirfuxrdaexr xiux ddei paezixlleixr nr piar a gga hha gex a, neixl zir cexr lol. <sup>5</sup> Guaxlguaxl xiux ddei maelsael zex yirfuxrdaexr xiux sael a naexr a, yirfuxrdaexr xiux leil neixl gex. Eil zex mel, sae bei teixl lei maebbiur nei maebbiur laxllaxr, jjiussi yixrsaexr, nineix, halae zzir mesixlsixl arla hal mel sser a naexr. Eilmel mel Yihexrhuaxr Moxrxi leil miardal dae mel dax zox dae a bei arddeir a.

<sup>6</sup> Yoxl naxrcixlcixl mo legelbbe nilni nr pir ddaexr teixl lei a, sae bei teixl lei kur dae mel gga ddaexr ji gger, sul kiexl mel sael a, Yir-

saexllixl ddei ssor mel ddei mi mel kiexl deix gger. <sup>7</sup> Legelbbe nilni eil nr yirfuxrdaexr xiux ddei paezixlleixr leil gaxl gex ddu nr zex leil hha deix a, Yirsaexllixl su ca mel leil holcir labox legelbbe bei; eilmel mel Yihexrhuaxr Moxrxi leil miardal dae mel dax zox dae a bei arddeir a.

### Nixmoxzo Leil Bbex Gex Ddu Co Bei

<sup>8</sup> Yaa yoxl sae bei teixl lei maebbiur, maebbiur laxllaxr, jjiussi yixrsaexr, nineix, halae zzir mesixlsixl arla hal mel sser a, yarzi naexr seir yarzi naexr naxrcixl naexr a nixmoxzo ddei leil bbe gex ddu ar co bei, yirfuxrdaexr xiux bei mel sael a bei. <sup>9</sup> Nixmoxzo ddei leil bbe gex ddu eil co mel sixlfa ar co a; ar zaexrzaexr xixl, siggiebbaer nei kuaxggiebbaer lei nrzei nr (22) gofei zza. <sup>10</sup> Eil co leil mel balsixr li lul hha gex nia; xilmeir lul nael, balsixr nilni, yol saelsae, yol nilni; <sup>11</sup> nr lul ddei nael, balsixr nibaexbaex, balsixr laxllaxr, zuaxlsixr; <sup>12</sup> so lul ddei nael, jjiussi yixrsaexr yol, naxrcixlcixl mo legelbbe piulpiu nei jjiussi yixrsaexr suirji; <sup>13</sup> li lul ddei nael, suircayuxl, naxrcixlcixlmo legelbbe nilni, bixlyuxl. Eilmel maelmaerjjia lei sae bei teixl lei kur dae mel gga ddaexr ji. <sup>14</sup> Eil ceinir taex leil mel cir taex leil Yirsaexllixl ddei ssor ddei mi ar ddei kiexl deix nia, hherdder Yirsaexllixl su ca ceinir cuxr nga a.

<sup>15</sup> Nixmoxzo leil bbe gex ddu co leil sae lillil a sser a, baezo vaexr sael a yarsael vaexr. <sup>16</sup> Yoxl sae sser a hha ji ddu nnel nei sae nolvar nnel bei a, nixmoxzo leil bbe gex ddu co ddei ggaxrsibbor giexrluxl nr piar a leil dextl ngexl. <sup>17</sup> Sae sser a bei teixl lei yarsael nr zex nixmoxzo leil bbe gex ddu co ddei ggaxrsibbor giexrluxl nr piar ddei nolvar mel gga sae gel. <sup>18</sup> Yarsael kebal oldde hal nr piar a kur dae nnel gga dextl gex gger a, yirfuxrdaexr xiux ddei xilmeir piar a gga paezixlleixr leil gaxl gex dae yarsael mel leil hha gex. <sup>19</sup> Sae sser a nolvar nnel bei a, nixmoxzo leil bbe gex ddu co ddei yarzi-bbor giexrluxl nr piar a leil dextl ngexl, hherdder yirfuxrdaexr xiux dax naer dae lavulzzar yarqir leil nga a. <sup>20</sup> Yoxl sae nolvar nnel bei a, yirfuxrdaexr xiux xilmeir piar a gga, paezixleixr leil yarsael zex jiasibbor do gga maelsael dax naer ggie ha gex, hherdder naexr-

zixlggie dax naer dae yarzi naexr seir yarzi naxrcixl naexr teixl lei maelsael zex ggaxrne halmaex nga a. <sup>21</sup> Halae yixrsaexr laxllaxr yarsael ar zex sser a, nixmoxzo ddei leil bbe gex ddu co ddei nolvar ddei nei yirfuxrdaexr xiux ddei nolvar ddei leil, zzi dax neixl gex du lei, yel nixmoxzo leil bbe gex ddu co, yarzi naexr seir yarzi naexr naxrcixl naexr teixl lei maelsael zex dax naelnaer a hher dae lol, eine nga a jjiar nr var, eine bei a mel, Yihexrhuaxr Moxrxi leil miardal dae ddar mel dax zox dae a bei arddeir a.

Arbosobo Leil Zi Su Mel Arbosobo Leil Zi Car Kebal Veixr Labox Pia

<sup>22</sup> Yar guaxlguaxl woxrke veixr dae pia darsisi xiux ddaexr; yixrsaexr maelmaerjjia lei laxllaxr a.

<sup>23</sup> Eil xiux ggaxrsibbor agala gga mel leigguqir bei labox ar ddei dol dae; leigguqir yarqir ddei leil arleixr ler, yel nr xiaxr lol. <sup>24</sup> Eil xiux yarzibbor zaza-lili maebbiur laxllaxr, jjiussi yixrsaexr, nineix nei vaexr teixl lei zzir mesixlsixl mel sser a, sulmiuxrsaer bei gex.

<sup>25</sup> Yoxl sae lillil a sser a hwaellael bei, hwaellael mel eil xiux yarzibbor zaza-lili sulmiuxrsaer agala gga naexr ji. <sup>26</sup> Eil xiux yarzibbor zaza-lili mel sae bei teixl lei huaellael ar taex, sulmiuxrsaer ar taex, sae bei teixl lei huaellael ar taex, sulmiuxrsaer ar taex naexr ji. Eilmel maelmaerjjia lei Yihexrhuaxr Moxrxi leil miardal dae ddar mel dax zox dae a bei.

<sup>27</sup> Yaa zzir mesixlsixl sser a ddaexr teixl lei mel Yalluixr nei yar ddei ssor mel leil kukurzzar veixr labox pia naexr gger. <sup>28</sup> Halae zzir mesixlsixl sser a oltex zex nei oldde leil ba gex labox co bei, vaexr teixl lei zzir mesixlsixl mel sser a luldaddur bei, <sup>29</sup> yoxl maebbiur laxllaxl, jjiussi yixrsaexr, nineix, halae vaexr teixl lei zzir mesixlsixl sser a, vixlux naexr mel sael a maelsael naexr. Eilmel mel Yihexrhuaxr Moxrxi leil miardal dae mel saexl a bei. <sup>30</sup> Yar sae lillil a sser a, bbe teixl lei a oldde leil ddexr labox ddei leil paexrzi ar pir bei. Hal pir leil mel 'bbe teixl lei a, Yihexrhuaxr ddei bei,' eine kiexl deix dae. <sup>31</sup> Yoxl yarsael laxllaxr ar zex sser a, paexrzi pir oltex zex ddei xilmeirbbaer piar a gga neixl gex gger. Eilmel mel Yihexrhuaxr Moxrxi leil miardal dae mel dax zox dae.

## Sexlmuxl Bei Teixl A

<sup>32</sup> Sexlmuxl bei miar a mel, maelmaerjjia dder eine bei jjia a. Ha Yihexrhuaxr Moxrxi leil miardal dae mel dder Yirsaexllixl su ca mel bei a. <sup>33</sup> Yaa Sexlmuxl nei Sexlmuxl gga sser labox hazza Moxrxi dax ho mal ci a; hherdder algerle, daxr gex labox jiaxjiax, jiaxjiax ddei leil lagexddu, sseigu nei suir hha ji ddu; <sup>34</sup> ssar ni dae yabol zzi wol gex ddu co, yarzi zae yarzi naxrcixl zzi wol gex ddu co nei Arbosobo hher ggie alddur peixl leil gaxl gex dae mae co; <sup>35</sup> yueguixl nei yueguixl ddei leil bil labox daxrzzo, yueguixl ggabil ddu; <sup>36</sup> zaezir nei zaezir leil sser labox zzaegu maelmaerjjia, halae Arbosobo leil zi labox aba mel; <sup>37</sup> sae lillil a sser a bei teixl lei de dol deix labox, de nei halmaex gga sser dae cirza-hanga, halae de doxl labox ssuvi. <sup>38</sup> Sae sser a bei teixl lei hexzzi doxl deix ddu taex, bbe teixl lei a, mei labox ssuvi, hexzzi ner xiuxiu arla hal mel, Sexlmuxl ddei gga ddir ggie alddur peixl leil gaxl gex dae mae co; <sup>39</sup> Arbosobo leil zzeir seixlziggie zzir bei teixl lei taex nei hal taex leil sser dae zzir bei teixl lei jiaxjiax paxr, hal taex leil bil labox daxrzzo nei hal taex leil sser labox hazza, cir labox zzir larggu nei larggu dol deix ddu; <sup>40</sup> zzaexggu ddei leil weixr gex dae mae co, sseigu nei sseigu hha ji ddu, zzaexggu ddei gielmi peixl ddei mae co, baezo, giexrngexl, halae Sexlmuxl gga sser labox cirza-hanga. <sup>41</sup> Arbosobo leil zi su mel Sexlmuxl gga ngo leil zi car veixr dae, yarzi naexr naxrcixl naexr teixl lei pia mel nei Arbosobo leil zi su Yalluixr halae yar ddei ssor mel yar leil zi car veixr labox pia eilmel nga a. <sup>42</sup> Miar eilmel maelmaerjjia lei Yirsaexllixl su ca mel Yihexrhuaxr Moxrxi leil miardal dae mel dax zox dae a bei. <sup>43</sup> Yihexrhuaxr arsae miardal, yaa dder arsae bei a. Moxrxi yaa miar maelmaerjjia lei bei jjia a mia a dder yaa leil seir lol.

## Yihexrhuaxr Ddei Sexlmuxl Zi

**40** <sup>1</sup> Yihexrhuaxr Moxrxi leil bbeix gger a bbeix: <sup>2</sup> “Ni Guxlsixlxixu ddeix teixl leil Sexlmuxl zi du lei nia. <sup>3</sup> Yueguixl ddei Sexlmuxl lavulzzar giex gga dol ji a, mae ar co gaxl gex a, yueguixl ddei leil

jiul gex du lei nia. <sup>4</sup> Zaezir zoxr lamaebbar giex gga bbax dil nia, zaezir zoxr leil baer labox zzaegu mel baer har nia. De dol deix labox ddei lei hal giex gga bbax dil nia, de mel doxl du lei nia. <sup>5</sup> Sae sser a bei teixl lei hexzzi doxl labox ddei lei hal giex gga yueguixl xilmeir dol nia; Sexlmuxl gga ddir ggie halmaex mae ar co gaxl deix nia. <sup>6</sup> Ngo leil zzeir seixl zi a cu deix ggie ddei Sexlmuxl ddei ggucirmi dol nia. <sup>7</sup> Cir labox larggu taex Sexlmuxl nei ngo leil zzeir seixl zi a cu deix ggie ddei agala gga dol ji; larggu gga ajjix ji. <sup>8</sup> Yoxl zzaex-ggu zaza-lili mae gaxl du lei nia; zzaexggu gga ddir ggie halmaex mae ar co gaxl deix nia. <sup>9</sup> Sexlmuxl nei Sexlmuxl gga dol ji dae maelmaerjjia leil ssuvi mei deix gger a kebal hal mel dax bbe teixl lei a ngo ddei loxr lol. <sup>10</sup> Yoxl ngo leil zzeir seixl zi a cu deix ggie ddei leil nei hal ddei leil sser labox maelmaerjjia leil, bbe teixl lei a mei labox ssuvi mel mei deix gger a kebal hal mel dax bbe teixl lei a ngo ddei loxr lol. <sup>11</sup> Ni lei cir labox larggu nei larggu dol ji ggie ddei leil ssuvi mei deix gger a, kebal hal mel dax bbe teixl lei a ngo ddei loxr lol. <sup>12</sup> Yalluixr nei yar ddei ssor mel leil Sexlmuxl alddur ggucirmi lei lol a, ajjix sser a ggecir cir lol. <sup>13</sup> Yalluixr leil ngo leil zi a veixr labox pia xiux veixr gex gger nia, yoxl yar leil ssuvi mei deix gger a, kebal ca mel dax bbe teixl lei a, ngo leil zi su bei lol. <sup>14</sup> Yoxl yar ddei ssor mel leil lei lol a, yaa leil kukurzzar veixr labox pia darsisi xiux veixr gger. <sup>15</sup> Yarbbor leil arsae ssuvi mei deix gger mel, yaa leil lei arsae mei deix gger a, yaa leil ngo leil zi su bei lol nia. Yaa leil ssuvi mei deix gger a mel, arddolcar ci a lei ngo leil zi su bei cexr lol, yaa cirzeix-hanga leil ngo leil visser lol,” eine bbeix a.

<sup>16</sup> Moxrxi eine bei a mel, maelmaerjjia lei Yihexrhuaxr yar leil miardal dae mel dax zox dae a bei. <sup>17</sup> Giedae cir koxl Guxlsixlxiu ddeix teixl leil Sexlmuxl ddei dder zi du lei a. <sup>18</sup> Moxrxi Sexlmuxl ddei zi du lei a, ssei hha ji ddu mel hha gex, jiaxjiax mel daxr du lei, huixrhuixrsi zzargger mel daxr ji, sseigu mel dae ji. <sup>19</sup> Yar Sexlmuxl leil ggaxrsibbor wol gex labox co wol gex, teixlsibbor wol gex labox co wol gex. Eilmel mel, Yihexrhuaxr yar leil miardal dae mel dax zox dae a bei. <sup>20</sup> Yar lixfaxr vaexr deix dae legelbbe nr pir yueguixl ddei gga ji a, daxrzzo ddei yueguixl nr piar a gga cua ji, yueguixl

ggabil ddu ddei yueguixl ddei leil dol deix gger. <sup>21</sup> Yueguixl ddei Sexlmuxl gga bil dil a, yueguixl ddei leil jiul gex ddu mae co gaxl gex a, yueguixl ddei leil jiul gex. Eilmel mel, Yihexrhuaxr yar leil miardal dae mel dax zox dae a bei. <sup>22</sup> Yoxl zaezir zoxr leil Sexlmuxl gga dol ji gger, Sexlmuxl ddei baexrfa piar a gga, mae co maelleil dol dae. <sup>23</sup> Yoxl zaezir ddei leil Arbosobo leil zi labox aba ddei dol deix dae. Eilmel mel, Yihexrhuaxr yar leil miardal dae mel dax zox dae a bei. <sup>24</sup> Yoxl de dol deix labox ddei Sexlmuxl gga dol ji gger, Sexlmuxl naxrfa piar a gga, zaezir zoxr deixrgoxr dol dae. <sup>25</sup> Yihexrhuaxr meixsaer qir leil de doxl. Eilmel mel Yihexrhuaxr yar leil miardal dae mel dax zox dae a bei. <sup>26</sup> Sae bei teixl lei hexzzi doxl deix labox ddei Sexlmuxl gga mae co xilmeir leil dol dae; <sup>27</sup> hexzzi doxl deix ggie hexzzi ner xiuxiu a hal mel cu. Eilmel mel, Yihexrhuaxr yar leil miardal dae mel dax zox dae a bei. <sup>28</sup> Yoxl Sexlmuxl gga ddir ggie halmaex mae ar co gaxl deix. <sup>29</sup> Arbosobo leil zzeir seixl zi a cu deix ggie ddei Sexlmuxl ggucirmi dol gger, Arbosobo leil zzeir seixl zi dae mel nei loxlmoxr zi dae mel halmaex zi. Eilmel mel Yihexrhuaxr yar leil miardal dae mel dax zox dae a bei. <sup>30</sup> Cir labox larggu ddei Sexlmuxl nei Arbosobo leil zzeir seixl zi a cu deix ggie ddei agala gga dol ji; cir labox larggu ddei gga ajjix dol ji gger a cir cexr lol. <sup>31</sup> Moxrxi nei Yalluixr, halae Yalluixr ddei ssor mel larggu eil ddei gga qihher leixrhher cir. <sup>32</sup> Yaa Sexlmuxl gga ddir bbeixsaer Arbosobo leil zzeir seixlziggie ddei dax ssi naer car dder qihher leixrhher cir. Eilmel mel Yihexrhuaxr yar leil miardal dae mel dax zox dae a bei. <sup>33</sup> Sexlmuxl nei Arbosobo leil zzeir seixlziggie zaza-lili weixr gex du lei a zzaexggu bei, halae alddur ddir ggie mae ar co gaxl gex. Eine nga a, Moxrxi dder miar maelmaerjjia bei jjia a.

### Zico Mel Sexlmuxl Ddei Leil Bbe Gex Dae

<sup>34</sup> Halcar, zico ddei Sexlmuxl ddei leil bbe gex dae a, Yihexrhuaxr ddei bbobbolbbo mel dder Sexlmuxl ddei leil bbilbbi zoxl gex dae a. <sup>35</sup> Zico ddei Sexlmuxl ggaxrne nor dae, halae Yihexrhuaxr ddei bbobbolbbo mel Sexlmuxl ddei leil bbilbbi zoxl gex dae a, yel Moxr-

xi Sexlmuxl ddei gga ddir nr cexr. <sup>36</sup> Ha zico ddei Sexlmuxl ggaxrne nr nor, ddeix jjixr car, Yirsaexllixl su ca mel dder ssi; <sup>37</sup> zico ddei ddeix nr jjixr arddeirnga a nael, yaa dder nr ssi, zico ddei ddeix jjixr zzezze xia ci. <sup>38</sup> Jjumo cir zex gga, eilnirgggu nael, Yihexrhuaxr ddei zico mel Sexlmuxl ddei ggaxrne nor dae; eilmerxixl nael, zico mel gga adoxl hher ji dae a, Yirsaexllixl su cassor-worssor mel mia ddo.